

କରକ୍ରିୟା ମଣ୍ଡଳୀର ବିଶ୍ୱାସୀମାନଙ୍କୁ ପାଠକଙ୍କ ପ୍ରଥମ ପତ୍ର
କରକ୍ରିୟା ମଣ୍ଡଳୀର ଲକ୍ଷ୍ୟମାନଗଣେ
ପାଠକ ପଢ଼ୁମ୍ଭର ଚିଠି ଲେଖିଲାଟା
ଏ ବଇ ବିସଇତେଇ ଜାନ୍‌ବାଟା

ପଢ଼ୁମ୍ଭ କରକ୍ରିୟା ଚିଠି ପେରିତ୍ ପାଠକ ଲେଖିରଇଲା । ଏଟା ଜିସୁ କିରିସ୍ତ ଜନମ୍ ଅଇକରି ୫୫ ବରସ୍ ପତେ ଲେଖିରଇଲା । ୧:୧ପାଠକ ଲେଖିରଇଲା ଦୁଇଟା ଚିଠି ବିତ୍ରେଅନି ଏଟା ୧ ମ ଚିଠି । ସେ ଏପିସିତେଇ ରଇଲା ବେଲାଇ ଏ ଚିଠି ଲେଖିରଇଲା । ମାକିଦନିଆଅନି କରକ୍ରିୟା ବାସାଅଇଲା ଆଗେ ଲେଖାଅଇରଇଲା । ୧୭:୫-୯ ।

ପାଠକ ଏ ଚିଠିଟାଣେ ମଣ୍ଡଳୀ ବିତ୍ରେ ଅଇତେ ରଇବା କରାପ୍ କାମ୍, ଦଲ୍ ଦଲ୍ ବିତ୍ରେ ବେଗ୍‌ଲା ବେଗ୍‌ଲି ଅଇବାଟା, ପାପ୍ କାମ୍ କରବାଟା ଜାନିରଇଲା । ଏ ସବୁ ବିସଇ ମଣ୍ଡଳୀର ଲକ୍ଷ୍ୟମାନ ଗଣେ ସୁନିକରି ଏ ସବୁର ଉତ୍ତର ଦେବାକେ ଦିଆନ୍ ଦେଇତେ ରଇଲା । କରକ୍ରିୟା ନଅରେ ମୁନୁସ୍ ପିଲା ମାଇଜିଟକି ଅଇବା କରାପ୍ କାମ୍ ପାଇ ଡାକ୍‌ପୁଟା ରଇଲା । ତେବର୍ ପାଇ ମଣ୍ଡଳୀମନ୍‌କେ ଏନ୍ତାରି ଅସୁବିଦାମନ୍ ଆଇତେ ରଇଲା । ୧ ମ କରକ୍ରିୟା ଆଲାଦ୍ ବିସଇ ଗଟେକ୍ ବାଗ ଦାରିଆତେ ।

ଏ ବଇଟାଣେ ରଇବାଟା

- ୧. ପାଠକ କରକ୍ରିୟା ରଇବା ଲକ୍ଷ୍ୟମନ୍‌କେ କୁଆର୍ ଜାନାଇଲାନି ଆରି ସେମାନର୍ ପାଇ ପରମେସର୍‌କେ ଦନିଅବାଦ୍ ଦେଲାନି । ୧:୧-୯
- ୨. ପାଠକ କରକ୍ରିୟା ମଣ୍ଡଳୀଅନି ସୁନି ରଇବା ମଣ୍ଡଳୀ ମଣ୍ଡଳୀ ବେଗ୍‌ଲି ଜାଇରଇବା ବିସଇ ସିକିଆ ଦେଲାନି । ୧:୧୦;୪:୨୧
- ୩. ବିନ୍‌ଟା ଅଇଲାନି ମାଇଜିଟକି ମୁନୁସ୍ ପିଲା ଅଇବା କରାପ୍ କାମ୍ କରି ଗଟେକ୍ ଲକ୍ ଆରି ଗଟେକ୍ ଲକ୍‌କେ କରର୍ ଦୁଆର୍ ଜାକ ନେବା ବିସଇ ଲେଖିଆତେ । ୫-୬

୪. ପରେ ଜିବା ବିସଇ ମୁରତିମନ୍ଦକେ ବଲିଦେବାଟା, ସବୁ ମିସିକରି ପାର୍ତନା କର୍ବାଟା, ଆଡ଼ମାଇ ଦାନ୍ ପାଇଲାଟା ଆରି ମରି କରି ଆରି ତରେକ୍ ଉର୍ବାଟା ବିସଇ ଲେକା ଆଟେ । ୭-୧୫
୫. ସାରାସାରି ସେ ନିଜେ କର୍ତ୍ତେରଇବା କେତେଟା ବିସଇ ଲେକିକରି ସାରାଇଲାନ୍ତି । ୧୬

^୧ ମୁଇ ପାଉଲ୍ ଆରି ଆମର୍ ସଙ୍ଗର୍ ବିସ୍ବାସି ସସ୍ତିନା ଜୁଆର୍ ଜାନାଇଲୁନି । ପର୍ମେସର୍ ମନ୍ କଲା ଇସାବେ କିରିସ୍ଟ ଜିସୁର୍ ପେରିଡ଼ ଅଇବାକେ ମକେ ବାଟିଆଟେ ।

^୨ ✨କରନ୍ତିୟ ନଅରେ ରଇବା ପର୍ମେସର୍ ମଣ୍ଡଲିର୍ ଲକ୍ମନ୍ଦକେ ଲେକ୍ଲୁନି । ପର୍ମେସର୍ ତମ୍ବେ ଜିସୁକିରିସ୍ଟ ସଙ୍ଗ୍ ମିସାଇ, ତାର୍ ନିଜର୍ ଲକ୍ କଲାଆଟେ । ଆରି ମାପୁରୁ ଜିସୁକିରିସ୍ଟକେ ଉପାସନା କର୍ବା, ସବୁ ଜାଗାଇ ରଇବା ଲକ୍ମନ୍ଦ ସଙ୍ଗ୍ ତମ୍ବେ ସୁକଲ୍ ଅଇବାକେ ବାଟିଆଟେ । ସେ ଆମର୍ ମାପୁରୁ ଆରି ତାକର୍ ମିସା ।

^୩ ଆମର୍ ବାବା ପର୍ମେସର୍ ଆରି ଜିସୁ କିରିସ୍ଟ ତମ୍ବେ ଜିବନ୍ ଦୁକାଇ ସାନ୍ତି ଦେଅ ।

କିରିସ୍ଟର୍ ଟାନେ ଆସିର୍ବାଦ୍

^୪ କିରିସ୍ଟ ଜିସୁର୍ଟାନେ ପର୍ମେସର୍ ଜେନ୍ତି ଜିବନ୍ ଦୁକାଇରଇଲା, ସେ ଜିବନ୍ ଦୁକାନିର୍ ଲାଗି, ମୁଇ ସବୁବେଲେ ତମ୍ବେ ବିସଇନେଇ ପର୍ମେସର୍କେ ଦନିଅବାଦ୍ ଦେଲିନି ।

^୫ କାଇକେବଲେ ତମ୍ବେ କିରିସ୍ଟ ସଙ୍ଗ୍ ମିସିକରି ଆଟାସ୍ ବଲି ପର୍ମେସର୍ ତମ୍ବେ ଲଡାକେ ଅଇବା ସବୁ ବିସଇ, ତମ୍ବେ କାତା ଅଇବା ବପୁ ଆରି ସବୁ ରକାମର୍ ଗିଆନ୍ ଦେଇଆଟେ । ^୬ କିରିସ୍ଟର୍ ବିସଇନେଇ ତମ୍ବେ ଜନ୍ କବର୍ କଇରଇଲୁ, ସେଟା ଟିକ୍ ଆକା ବଲି ଜାନା ପଡ଼ଲାନ୍ତି । ^୭ ତେବେ ତମ୍ବେ ଆମର୍ ମାପୁରୁ ଜିସୁ କିରିସ୍ଟର୍ ଏ ଜଗତେ ବାଉଡ଼ି ଆଇବାଟା ଜାଗିରଇବାକେ ସବୁ ରକାମର୍ ଆଡ଼ମାର୍ ଦାନ୍ ମିଲାଇ ଆଟାସ୍ । ^୮ ଜେନ୍ତିକି ଆମର୍ ମାପୁରୁ ଜିସୁ ଆଇବା ଦିନେ

✨ ୧:୨ ୧:୨ ପେରିଡ଼ ୧୮:୧

ତମ୍ଭେ କାଲ ମିସା ନିନ୍ଦା ନ ଅ । ଏଟାର୍‌ପାଇ ମାପୁରୁ ତମ୍ଭେ ସାରାସାରି ଜାକ ମିସା ତବିର୍ କରି ସଙ୍ଗଇସି ।

^୯ ଜନ୍ ପର୍ଯ୍ୟନ୍ତ ଲାଗି ତମେ ତାର ପଥ ଜିଣୁ କିରିସଟ, ଆମର୍ ମାପୁରୁରସଙ୍ଗ ମିସିବିଡି ରଇବାକେ ବାଟିଅଇ ଆଚାସ, ସେ ସେନ୍ତି କରସି ଆକା ବଲି ତାଟ୍ ସଙ୍ଗ ବିସ୍‌ବାସ୍ କଲାସନି ।

ବିସ୍‌ବାସିମନ୍ ବେଗଲା ବେଗଲି ଅଇବାଟା

^{୧୦} ଏ ମର୍ ବାଇବଇନିମନ୍, ଆମର୍ ମାପୁରୁ ଜିଣୁ କିରିସଟର୍ ନାଉଁ ଦାରି ମୁଇ ତମ୍ଭେ ବାବୁଜିଆ କଲିନି, ଜେନ୍ତିକି ତମେ ସବୁଲକ୍ ଗଟେକ୍ କାତାଇ ରାଜି ଉଆ, ଆରି ତମର୍ ତମର୍ ବିତ୍‌ରେ ବେଗଲା ବେଗଲି ଉଆନାଇ । ମାତର୍ ତମେ ଗଟେକ୍ ଦଲ୍, ଗଟେକ୍ ମନ୍ ଆରି ଗଟେକ୍ କାତାଇ ରାଜି ଉଆ । ^{୧୧} ତମର୍ ତମର୍ ବିତ୍‌ରେ ଲାଗାଜଡା ଆଚେ ବଲି ମୁଇ କିଲିୟର୍ କୁଟୁମେ ଅନି ସୁନିଆଟି । ^{୧୨} *ମୁଇ ବାବୁଲିନି, ତମର୍ ବିତ୍‌ରେ କେତେଲକ୍ କଇବାଇ, ଆମେ ପାଉଲର୍ ବାଟେ ଜିବାଲକ୍, କେତେଲକ୍ ଆପଲର୍ ବାଟେ ଜିବାଲକ୍, କେତେଲକ୍ କେପାର ବାଟେ ଜିବା ଲକ୍, ଆରି କେତେଲକ୍ ଆମେ କିରିସଟର୍ ବାଟେ ଜିବା ଲକ୍ । ^{୧୩} କିରିସଟକେ ମୁକା ମୁକା କରି ବାଗ୍ ବାଗ୍ କଲାପାରା ଦଲ୍ ଅଇଆଚାସ୍ । ମୁଇ ପାଉଲ୍, ତମର୍ ପାଇ କୁରସେ ମରିରଇଲି କି ? କି ତମେ ପାଉଲର୍ ନାଉଁ ଦାରି ତୁବନ୍ ନେଇରଇଲାସ୍ ?

^{୧୪} *ସେଟାର୍‌ପାଇ କିରିସପ ଆରି ଗାଅକେ ଚାଡ୍‌ଲେ ତମର୍ ବିତ୍‌ରେ ଆରି କାକେ ମିସା ତୁବନ୍ ଦେଇ ନାଇ ବଲି ମୁଇ ପର୍ଯ୍ୟନ୍ତକେ ଦନିଅବାଦ୍ ଦେଲିନି । ^{୧୫} ତମେ ମର୍ ନାଉଁ ଦାରି ତୁବନ୍ ନେଇଆଚାସ୍ ବଲି କେତେବେଲେ କେ ମିସା କଇଦେବାଇ । ^{୧୬} *ଉଁ ତିପାନ୍‌କେ ଆରି ତାର କୁଟୁମର୍ ଲକ୍‌କେ ମିସା ତୁବନ୍ ଦେଇରଇଲି । ଆରି କାକେ ତୁବନ୍ ଦେଲିଆଟି କି ନାଇ ବଲି ମକେ ଏଡ୍ ଆସେ ନାଇ । ^{୧୭} କାଇକେବଇଲେ କିରିସଟ ମକେ ତୁବନ୍ ଦେବାକେ ପାଟାଏ ନାଇ, ନିମାନ୍ କବର୍ ଜାନାଇବାକେ ପାଟାଇଲା ଆଚେ । ଜଦି ଲକ୍‌ମନର୍ ଗିଆନ୍ ଇସାବେ ସେଟା

* **୧:୧୨** ୧:୧୨ ପେରିଡ୍ ୧୮:୨୪ * **୧:୧୪** ୧:୧୪ ପେରିଡ୍ ୧୮:୮; ପେରିଡ୍ ୧୯:୨୯; ରମିୟ ୧୭:୨୩ * **୧:୧୭** ୧:୧୭ ୧ମ କରନ୍ତଃ ୧୭:୧୫

ମୁଇ କରତି, ସେନ୍ତାର ଆଲେ କିରିସ୍ତର କୁରସର କବରର ବପୁ
 ଉନା ଅଇତା ।^{୧୮} କୁରୁପ୍ନାସ୍ ଅଇଜାଇତେରଇବା ଲକ୍ମନର୍ପାଇ,
 କୁରୁସେ ଅଇଲା କିରିସ୍ତର ମରନର୍ କାତା, କାଇ ମୁଲିଅ ନାଇ ।
 ମାତର୍, ଆମର୍ପାଇ ସେଟା ପର୍ମେସରର୍ ବପୁ । ଆମେ ମୁକ୍ତି
 ପାଇତେରଇବା ଲକ୍ମନ୍ ।^{୧୯} ତେବେ ଦରମ୍ ସାସ୍ତରେ ଏନ୍ତି
 ଲେକାଆଟେ,

ମୁଇ ଗିଆନ୍ ରଇବା ଲକ୍ମନର୍ ଗିଆନ୍ ନସାଇବି,
 ଆରି ବୁଦି ରଇବା ଲକ୍ମନର୍ ବୁଦି
 କାଇ ଲତାକେ ନ ଆଇଲା ପାରା କର୍ବି ।

^{୨୦} ତେବେ ଗିଆନ୍ ରଇବା ଲକ୍ମନର୍ ବିସଇ କାଇଟା କଇଅଇସି
 ? ସାସ୍ତର୍ ସିକାଉମନର୍ ବିସଇ କାଇଟା କଇ ଅଇସି ? ଆରି ଏ
 ଜୁଗର୍ ଦଦାପେଲା ଅଇବା ଲକ୍ମନର୍ ବିସଇ କାଇଟା କଇଅଇସି ?
 ପର୍ମେସର୍ ଏ ଜଗତର୍ ଗିଆନ୍ ରଇବା ଲକ୍ମନ୍କେ କାଇ ଲତାକେ
 ନ ଆଇବାଟା ବଲି କଏ ନାଇ କି ?

^{୨୧} ଏ ଜଗତର୍ ଲକ୍ମନ୍ ତାକର୍ ଚାଲାକିସକ୍ ପର୍ମେସର୍କେ
 ନ ଜାନତ୍ ବଲି, ସେ ନିଜର୍ ଗିଆନ୍ ଇସାବେ ଚିକ୍କଲା । ଆମେ
 ଜାନାଇବା ବିସଇ ଜନ୍ଟା କି କାଇ ମୁଲିଅ ନାଇ ବଲି ଲକ୍ମନ୍
 କଇବାଇ, ସେଟା ବିସ୍ବାସ୍ କର୍ବା ଲକ୍ମନ୍କେ ମୁକ୍ତି ଦେବାକେ
 ପର୍ମେସର୍ ସାର୍ଦା ଅଇଲା ।^{୨୨} ଜିଉଦିମନ୍ କାବା ଅଇଜିବା ଚିନ୍
 ପାଇ ଦାବି କଲାଇନି । ଗିରିକ୍ମନ୍ ଗିଆନ୍ କଜଲାଇନି ।^{୨୩} ମାତର୍
 ଆମେ କୁରୁସ୍ ଉପରେ ଚଗାଇ ଅଇରଇବା କିରିସ୍ତର୍ ବିସଇ
 ଜାନାଇଲୁନି । ଏ କାତା ସୁନ୍ଲେ ଜିଉଦିମନ୍ ରିସା ଅଇଗାଲାଇନି
 ଆରି ଜିଉଦି ନଇଲା ଲକ୍ମନ୍ ସେ କାତାର୍ କାଇ ମୁଲିଅ ନାଇ ବଲି
 ବାବ୍ଲାଇନି ।^{୨୪} ମାତର୍ ଜିଉଦି ଅଅଡ୍, କି ଜିଉଦି ନଇଲା ଲକ୍
 ଅଅଡ୍, ଜନ୍ ଲକ୍ମନ୍ ବାଟି ଅଇଆଟଡ୍, ସେମନର୍ ପାଇ କିରିସ୍ତ
 ପର୍ମେସରର୍ ବପୁ ଆରି ପର୍ମେସରର୍ ଗିଆନ୍ ପାରା ଆଟେ ।
^{୨୫} ତେବେ ଜନ୍ଟା ପର୍ମେସରର୍ ବକୁଆ ବିସଇ ସେଟା ମୁନ୍ସର୍
 ଗିଆନେ ଅନି ଅଦିକ୍ ଆଟେ, ଆରି ଜନ୍ଟା ପର୍ମେସରର୍ ଦୁର୍ବଲ୍
 ବିସଇ, ସେଟା ମୁନ୍ସର୍ ବପୁଟାନେଅନି ଅଦିକ୍ ବପୁ ।

^{୨୬} ଏ ବାଇବଇନିମନ୍, ପର୍ମେସର୍ ତମକେ ବାବ୍ଲା ବେଲେ
 ତମେ କେନ୍ତାର ରଇଲାସ୍ ବାବିଦେକା । ଜଗତର୍ ବିଦି ଇସାବେ

ବେସିଲକ୍ ଗିଆନି ନ ରଇଲାସ୍ । ବେସିଲକ୍ ନେତା ନ ରଇଲାସ୍
 ଆରି ବଡ଼ ଗରେ ଜନମ ନ ଅଇରଇଲାସ୍ ।^{୨୭} ପରମେସର ଗିଆନି
 ଲକ୍ମନକେ ଲାଜ୍ କରାଇବାକେ ଜଗତର ଦୁର୍ବଲ୍ ଲକ୍ମନକେ
 ବାଚ୍ଲା, ଜେନ୍ତୁକି ଜଗତେ ଗିଆନି ରଇବା ଲକ୍ମନ ଆରି ବପୁ ରଇବା
 ଲକ୍ମନ ଲାଜ୍ ଅଇଜିବାଇ ।^{୨୮} ତେବର୍ ପାଇ, ପରମେସର ଏ
 ଜଗତର କାଇ ଲତାକେ ନ ଆସେ ବଲି କଇବା ଲକ୍ମନକେ, ଆରି
 ସବୁବେଲେ ତଲେ ରଇ ଲକ୍ମନ ଗିନ୍ କରତେରଇବା ଲକ୍ମକେ
 ବାଚ୍ଲାଆଚେ ।^{୨୯} ଜେନ୍ତାର କି ଜଗତ୍ ବିତ୍ରେ ଜନ୍ ଲକ୍ମନ
 ବଡ଼ ବଲି ନାମାଇ ଅଇବାଇ, ସେମନ୍ କାଇ ଲତାକେ ନ ଆସତ୍
 ଆରି ପରମେସରର୍ ମୁଆଟେ କେ ମିସା ବଡ଼ପନ୍ ଅଇ ନ କଅତ୍ ।
^{୩୦} ମାତର୍ ପରମେସର ତମକେ କିରିସ୍ଟ ଜିସୁର ସଙ୍ଗ୍ ମିସାଇଆଚେ
 ଆରି ସେ କିରିସ୍ଟକେସେ ଆମର୍ପାଇ ଗିଆନ୍ ପାରା କରିଆଚେ
 । ତାରଲାଗି ଆମେ ପରମେସର ସଙ୍ଗ୍ ସତ୍ ମିସାବିତା ଅଇଲାଟା
 ଆରିତରେକ୍ ଜଡ଼ିଅଇଲାଆଚେ । ଆମେ ଦରମ୍ ଆରି ସୁକଲ୍ ଲକ୍
 ଅଇ ପାପେ ଅନି ମୁକ୍ତି ପାଇଆଚୁ ।^{୩୧} ମାତର୍ ଜେନ୍ତୁ ଦରମ୍
 ସାସ୍ତରେ ଲେକା ଅଇଆଚେ, ଜେ ଜଦି ବଡ଼ପନ୍ ଅଇସି, ତେବେ ସେ
 ମାପୁରୁ କଲା କାମ୍ ତେଇ ବଡ଼ପନ୍ ଅ ।

୨

କୁରୁସ୍କାଟେ ମଲା କିରିସ୍ଟର୍ କାତା

^୧ ଏ ବାଇବଇନିମନ୍, ଜେଡ଼କିବେଲେ ମୁଇ ତମର୍ ଲଗେ
 ପରମେସରର୍ ଟିକିନିକି କାତା ସୁନାଇବାକେ ଆସି ରଇଲି
 ପଣ୍ଡିତମନର୍ ପାରା କି ବାସଣ୍ ଦେବା ଲକ୍ମରପାରା ବଡ଼ ବଡ଼ କାତା
 କଇ ନ ରଇଲି ।^୨ କାଇକେବଇଲେ କୁରୁସ୍କ କାଟେ ମରିରଇବା
 ଜିସୁ କିରିସ୍ଟକେ ଚାଡ଼ି ଆରି ବିନ୍ ବିସଇ ତମକେ ନ କଇ ବଲି
 ମୁଇ ଟିକ୍ କଲି ।^୩ *ସେବେଲେ ମୁଇ ତମର୍ ଲଗେ ଦୁର୍ବଲ୍ ଅଇ
 ଭରିକରି ରଇଲି ଆରି ତର୍ତ୍ତରି ଗଜ୍ଗଜି ରଇଲି ।^୪ ଜେନ୍ତୁକି ତମର୍
 ବିସ୍ବାସ୍ ମୁନ୍ସର୍ ଗିଆନ୍ ଉପ୍ରେ ନ ରଇକରି ପରମେସରର୍ ବପୁ
 ଉପ୍ରେ ବାନ୍ଧିଅଇ ରଅ ।^୫ ତେବର୍ପାଇ ମର୍ ସିକିଆ ଆରି ମୁଇ
 ସୁନାଇବା ବାକିଅ, ମର୍ ନିଜର୍ ଗିଆନେ ଅନି ନ ରଇଲା । ଚାଲାକି

* ୨:୩ ୨:୩ ପେରିଡ଼ ୧୮:୯

କାତା କଇକରି ମୁଇ ସୁନାଇଲାଟା ତମ୍ଭକେ ବିସ୍‌ବାସ୍ କରାଇନାଇ ।
ମାତର୍ ପର୍ମେସରର୍ ଆତ୍ମା ଆରି ତାର୍ ବପୁ ସଙ୍ଗ୍ ମୁଇ କଇଲା
ବିସଇ ସତ୍ ବଲି ଜାନାପଡ଼ଲା ।

ପର୍ମେସରର୍ ଗିଆନ୍

^୬ ଏଲେମିସା ଆମେ ଜେଡେବଲ୍ ଆତ୍ମାକ ବଢ଼ିରଇବା
ବିସ୍‌ବାସିମନର୍ ସଙ୍ଗ୍ ରଇଲାବେଲେ ଗିଆନ୍ କାତା କଇଲୁନି
। ମାତର୍ ସେଟା ଏ ଜୁଗର୍ ଗିଆନ୍ ନଏଁ କି ଏ ଜୁଗର୍ ନସ୍ତ
ଅଇଜାଇରଇବା ନେତାମନର୍ ଗିଆନ୍ ନଏଁ । ^୭ ନାଇ, ଜନ୍ ଗିଆନ୍
ବିସଇ ଆମେ କଇଲୁନି, ସେଟା ପର୍ମେସରର୍ ଟିକିନିକି ଗିଆନ୍
କାତା । ପୁର୍ବେ ପର୍ମେସର୍ ତାର୍ ଜଜ୍‌ନା କାକେ ମିସା ଜାନାଏ
ନାଇ । ସେ ଜଜ୍‌ନା ଇସାବେ, ପର୍ଭକେ ଆମର୍ ମଇମାର୍‌ପାଇ
ସେ ବାଟିରଇଲା । ^୮ ଏ ଜୁଗର୍ ଅଦିକାରିମନ୍‌କେ ମିସା ସେଟା
ବୁଜଡ଼ନାଇ । କାଇକେବଇଲେ ସେମନ୍ ସେଟା ଜାନିରଇଲେ
ଡାକ୍‌ପୁଟା ମାପୁରୁକେ କୁରସେ ମାରି ନ ରଇତାଇ ।

^୯ ଜେନ୍ତାରି କି ସାସ୍‌ତରେ ଲେକା ଆଟେ,
ଜନ୍‌ଟାକି କାର୍ ଆଁକି କେବେ ଦେକେନାଇ,
କାର୍ କାନ୍ କେବେ ସୁନେ ନାଇ ଆରି କେ ମିସା କେବେ ବାବି ନ
ରଅଡ଼, ସେ ସବୁ ବିସଇ,
ପର୍ମେସର୍ ଜନ୍ ଲକ୍‌ମନ୍‌କେ ଆଲାଦ୍ କଲାମି,
ଡାକ୍‌ପାଇ ଡିଆର୍ କଲାଆଟେ ।

^{୧୦} ମାତର୍ ଆମ୍ଭକେସେ ପର୍ମେସର୍ ତାର୍ ଟିକିନିକି ବିସଇ
ଜାନାଇଆଟେ । ସେ ସୁକଲ୍ ଆତ୍ମାସେ ସବୁ ବିସଇ ସିକାଇସି ଆରି
ତାର୍ ବିଡ଼ରେ ରଇବା ଟିକିନିକି ଚିନ୍ତା ମିସା କର୍ସି । ^{୧୧} ମୁନ୍‌ସ୍ କର୍‌ବା
ଚିନ୍ତା ସବୁ ତାର୍ ବିଡ଼ରେ ରଇବା ଆତ୍ମାକେ ଚାଡ଼ଲେ ଆରି କେ
ମିସା ନାଜାନଡ଼ । ସେନ୍ତସେ ପର୍ମେସରର୍ ସବୁ ଚିନ୍ତା କଲାଟା ତାର୍
ଆତ୍ମାକେ ଚାଡ଼ିଦେଲେ ଆରି କେ ମିସା ନାଜାନଡ଼ । ^{୧୨} ଏ ଜଗତର୍
ଲକ୍‌ମନ୍ ପାଇରଇବା ଆତ୍ମା ପାରା ଆମେ ପାଉନାଇ । ମାତର୍
ପର୍ମେସରର୍ ଆତ୍ମା ପାଇଆବୁ । ଜେନ୍ତାରିକି ଜନ୍ ସବୁ ବିସଇ
ଆମ୍ଭକେ ସେ ଦେଲାଆଟେ, ସେଟା ସବୁ ଆମେ ଜାନ୍‌ବୁ ।

୧୩ ତେବେ ସେ ସବୁ ବିସଇ ମିସା ଆମେ ଜଗତର ଗିଆନ୍ ଇସାବେ ସିକାଉନାଇ, ମାତର ଜନ୍ ବିସଇ ଆମ୍ଭେ ପରମେସରର ସୁକଲ୍ ଆତ୍ମା ସିକାଇଲା ଆଚେ, ସେ ବିସଇ ଆକା ସିକାଇଲୁନି । ଜନ୍ ଲକ୍ଷ୍ମୀନ୍ ସୁକଲ୍ ଆତ୍ମା ପାଇଆଚଡ଼, ସେ ଲକ୍ଷ୍ମୀନ୍ କେ ଏ ଆତ୍ମାରୁ ବିସଇ ସିକାଇଲୁନି । ୧୪ ମାତର ସୁକଲ୍ ଆତ୍ମା ନ ପାଇ ରଇବା ଲକ୍ଷ୍ମୀ, ଆତ୍ମାରୁ ବିସଇ ନ ମାନେ, ମାତର ସେଟାମନ୍ ତାରପାଇ ଗଟେକ୍ କାଇଟା ନାଜାନ୍ବା ବକୁଆ ପାରା, ଆରି ସେ ସେଟା ବୁଝି ନାପାରେ, କାଇକେବଇଲେ ସେ ସବୁ ବିସଇ ସୁକଲ୍ ଆତ୍ମା ସିକାଇଲେ ସେ ବୁଝିଅଇସି । ୧୫ ମାତର ଜନ୍ ଲକ୍ଷ୍ମୀନ୍ ଆତ୍ମା ପାଇଆଚଡ଼, ସେ ସବୁ ବିସଇର ମୁଲିଅ, ସଡ଼ ବାବେ ବିଚାର କରସି । ଏଲେ ମିସା ତାକେ କେ ବିଚାର ନ କରଡ଼ । ୧୬ ସାସ୍ତରେ ଲେକା ଅଇଲାପାରା କେ ମିସା ମାପୁରୁ ମନର କାତା ଜାନି ନାପାରଡ଼, କି କେ ମିସା ତାକେ ସିକାଇ ନାପାରଡ଼ ।

ମାତର ଆମେ କିରିସ୍ତର ମନ୍ ପାଇଆରୁ ।

୩

ମଣ୍ଡୁଲିଗାନେ କିର ଜାତି

୧ ଏ ବାଇବଇନିମନ୍, ମୁଇ କରନ୍ତଃତେଇ ରଇଲାବେଲେ ସୁକଲ୍ ଆତ୍ମା ପାଇଲା ଲକ୍ଷ୍ମୀନ୍ ଇସାବେ ତମ୍ଭେ କାତା ଅଇ ନାପାରଲି । ମାତର ନିଜେ ମନ୍ କଲା ଇସାବେ ରଇବା ଲକ୍ଷ୍ମୀନ୍ ଇସାବେସେ କାତା ଅଇଲି । କାଇକେ ବଇଲେ ତମେ ସେବେଲେସେ, ବିସ୍ବାସ୍ କରବାକେ ମୁଲିଆଇ ରଇଲାସ୍ । କିରିସ୍ତର ତେଇ କଅଁଲା ପିଲାମନର ପାରା । ୨ *ମୁଇ ତମ୍ଭେ ଆର୍ କାଦି ନ ଦେଇ କରି ଦୁଦ୍ କାଇବାକେ ଦେଇରଇଲି । କାଇକେବଇଲେ ତମେ ଆର୍ କାଦି କାଇବାରୁ ନାପାରତେ ରଇଲାସ୍ । ଏବେ ମିସା ନାପାରାସ୍ । ୩ ତେବେ, ତମେ ନିଜର ମନ୍ କଲା ଇସାବେ ରଇବା ଲକ୍ଷ୍ମୀନ୍ ପାରା ଆଚାସ୍ । ମୁଇ ଏଟାରୁ ପାଇ କଇଲିନି, କାଇକେବଇଲେ ତମର ତମର ବିତ୍ରେ ଇସା ତଲା, ଲାଗାଜତା ଆରି ଜାତିନିତି ଆଚେ । ତମେ ନିଜର ମନ୍ କଲା ଇସାବେ ରଇବା ଲକ୍ଷ୍ମୀ ବଲି ଜାନାପଡ଼ଲାନି । ଜଗତର ଲକ୍ଷ୍ମୀନ୍ ପାରା,

ନିଜର ମନ୍ କଲ୍ମା ଇସାବେ ଚଲ୍ମାଚଲ୍ମତି କଲ୍ମାସ୍ନି । ୪ ✨ଜେନ୍ତ୍ରିକି ତମର ବିତ୍ତରେ କେତେଲକ୍ କଇବାଇ, ଆମେ ପାଉଲର ବାଟେ ଗାଲୁନି । ତେଇଅନି ଆରି କେତେଲକ୍ କଇବାଇ, ଆମେ ଆପଲର ବାଟେ ଗାଲୁନି । ସେଡ଼କିବେଲେ ତମେ କାଇ ନିଜର ମନ୍ କଲ୍ମା ଇସାବେ ରଇବା ଲକ୍ ନୁଆସ୍ କି ?

* ସେ ଇସାବେ ଦେକ୍ଲେ ଆପଲ୍ କେ ? ଆରି ମୁଇ ମିସା କେ ? ଆମେତା ଅବ୍‌କା ସେବା କରୁମନ୍ । ଜେନ୍ତ୍ରିକି ତମ୍‌କେ ବିସ୍‌ବାସ୍ କରବାକେ ଆମେ ସାଇଜ କଲୁ । ପର୍‌ମେସର୍ ଆମ୍‌କେ ଜନ୍ କାମ୍ କରବାକେ ଦେଇରଇଲା, ଆମେ ସେ କାମ୍ କରିଆରୁ । ୬ ✨ମୁଇ ମୁଞ୍ଜି ରପ୍‌ଲା ଲକ୍ ପାରା, ଆରି ଆପଲ୍ ଗତେ ପାନିଦେଲା ଲକ୍‌ର୍ ପାରା । ମାତର୍ ପର୍‌ମେସର୍ ସେ ଗର୍ ବଡ଼ାଇଆତେ । ୭ ସେନ୍ତ୍ରିସେ ଜେ ରପିରଇସି ଆରି ଜେ ପାନି ଦେଇସି, ତାକର୍ କାଇଟା ନାଇ, ଜେ ବଡ଼ାଇରଇସି, ସେ ପର୍‌ମେସର୍ ସେ ସବୁଟା । ୮ ଜେ ରପ୍‌ଲା ଆତେ ଆରି ଜେ ପାନି ଦେଲାଆତେ, ସେ ଦୁଇଲକ୍ ଗଟେକ୍ କାଇଆଲେ ଲଡ଼ାରପାଇ କାମ୍ କଲ୍ମାଇନି । କାଇକେବଇଲେ ସେମନ୍‌କେ ପର୍‌ମେସର୍ ନିଜର୍ ନିଜର୍ କାମ୍ ଇସାବେ ପୁରୁସ୍‌କାର୍ ଦେଇସି । ୯ ଆମେ ପର୍‌ମେସର୍ ସଙ୍ଗ୍ କାମ୍ କରବା କୁଲିଆର୍ ମନ୍ । ଆରି କରନ୍ତ୍ରିୟର୍ ବିସ୍‌ବାସିମନ୍ ତମେ, ପର୍‌ମେସର୍ ଚାସ୍ କରବା ଜମି, ଆରି ତାର୍ ଗର୍ । ୧୦ ପର୍‌ମେସର୍ ମକେ ଦେଇରଇବା ତାର୍ ଜିବନ୍ ଦୁକାନି ଇସାବେ ମୁଇ ଗଟେକ୍ ସବୁ ଜାନିରଇବା ଗର୍ ତିଆର୍‌କରୁ ପାରା କୁନାଦି ବସାଇଆତି । ସେବେଲେଅନି ବିନ୍ ଲକ୍ ତାର୍ ଉପ୍‌ରେ ତିଆର୍ କଲାନି । ମାତର୍ ତିଆର୍ କରବା ବେଲେ ତମେ, ଗଟେକ୍ ଗଟେକ୍ ଲକ୍ ଜାଗ୍‌ରଡ଼ ରଇବାର୍ ଆତେ । ୧୧ କାଇକେବଇଲେ, ଜନ୍ କୁନାଦି ତିଆର୍ ଅଇସାର୍‌ଲା ଆତେ, ତାକେ ଚାଡ଼ି ଅଲ୍‌ଗା କୁନାଦି କେ ମିସା ତିଆର୍ କରି ନାପାରଡ଼ । ସେ କୁନାଦିର୍ ମୁଲ୍ ପାକନା ଅଇଲାନି ଜିସୁକିରିସ୍‌ଟ । ୧୨ ମାତର୍ କେତେକ୍ ଗର୍ ବାନ୍ଧୁମନ୍ କୁନାଦି ଉପ୍‌ରେ ସୁନା, ରୁପା ଆରି ବେସି ଦାମ୍ ଅଇବା ପାକନା ସଙ୍ଗ୍ ବାନ୍ଧୁଲାଇନି । ଆରି କେତେକ୍ ଲକ୍ ଦାରୁ, ଗାଁସ୍ ଆରି ପିରି ସଙ୍ଗ୍ କୁନାଦି ଉପ୍‌ରେ ବାନ୍ଧୁଲାଇନି । ୧୩ କିରିସ୍‌ଟ ଆରି ତରେକ୍ ଆଇବା

✨ ୩:୪ ୩:୪ ୧ମ କରନ୍ତଃସ୍ତ ୧:୧୨ ✨ ୩:୬ ୩:୬ ପେରିଡ଼ ୧୮:୪-୧୧; ପେରିଡ଼ ୧୮:୨୪-୨୮

ଦିନେ ଗଟେକ୍ ଗଟେକ୍ ଲକ୍ଷ୍ମୀ କରନ୍ତଃସ୍ୟ ସବୁ କାମ୍ କେନ୍ଦ୍ରାଟା ବଲି ଜଇଟାନ୍ତେ ଜାନାପତିଜାଇସି । ସେଟା ଗଟେକ୍ ଏନ୍ତି ବେଲା ଆଇସି ଜେଡେବେଲେ ସବୁ ଜିନିଷ ଜଇଟାନ୍ତେ ପଡ଼ାଇ ପରିକା କରାଅଇସି । ୧୪ ଜନ୍ମଲକ୍ଷ୍ମୀନ୍ କରନ୍ତଃସ୍ୟ କୁନାଦି ଉପରେ ଜଇର୍ ପରିକାଟାନ୍ତେ ନ ନସେ, ସେ ପୁରୁଷକାର୍ ପାଇସି । ୧୫ ଜଦି ଜାର୍ କାମ୍ ପତି ଜାଇସି, ସେ କାମ୍ କରୁକେ କାଇଟା ନ ମିଲେ । ମାତର୍ ସେ ଲକ୍ଷ୍ମୀ ଲାଗତେରଇବା ଜଇଟାନ୍ତେଅନି ରକିଆ ପାଇଲା ପାରା ନିଜେ ରକିଆ ପାଇସି ।

୧୬ ☆ତମେ ନିକ ସଙ୍ଗ୍ ଜାନିଆରାସ୍, ତମେ ଅଇଲାସ୍ନି ପରମେସରର୍ ମନ୍ଦିର୍ । ଆରି ତାର୍ ଆତ୍ମା ତମର୍ ଗାଗଡ଼ ବିଡ଼ରେ ବାସାଅଇଆଟେ । ୧୭ ଜଦି କେ ମିସା ପରମେସରର୍ ମନ୍ଦିର୍ ନସାଇସି, ତେବେ ପରମେସର୍ ତାକେ ନସାଇସି । କାଇକେବଇଲେ ପରମେସରର୍ ମନ୍ଦିର୍ ସୁକଲ୍ଟା । ତମେମନ୍ ଆକା ସେ ମନ୍ଦିର୍ ।

୧୮ ନିଜୁକେ ମିସା ନାଡ଼ାଇ ନ ଉଆ । ଜେ ଜଦି ମୁଇ ଜଗତର୍ ଇସାବେ ଗିଆନ୍ ରଇବାଲକ୍ ବଲି ମନେ ମନେ ବାବ୍ସି, ତେବେ ସେ ସଡ଼ ଗିଆନ୍ ପାଇବାକେ ଆଲେ, କାଇଟା ନାଜାନ୍ଲା ବକୁଆ ଲକ୍ଷ୍ମୀପାରା ଅଇବାର୍ ଆଟେ । ୧୯ କାଇକେବଇଲେ ଏ ଜଗତର୍ ଗିଆନ୍ ପରମେସରର୍ ମୁଆଟେ କାଇ ଲଡ଼ାକେ ନ ଆସେ । ଜେନ୍ତିକି ସାସ୍ତରେ ଲେକା ଆଟେ, ଗିଆନ୍ ରଇଲା ଲକ୍ଷ୍ମୀନ୍ତେ ତାକର୍ ଚାଲାକିତେଇସେ ପରମେସର୍ ଦାର୍ସି । ୨୦ ଆରିତରେକ୍ ସାସ୍ତରେ ଲେକାଆଟେ । ଗିଆନ୍ ରଇବା ଲକ୍ଷ୍ମୀନ୍ ବାବ୍ସାଟା ସବୁ ଚୁଟାଇସେ ବଲି ପରମେସର୍ ଜାନିଆଟେ । ୨୧ ଆରି କେ ମିସା ଲକ୍ଷ୍ମୀନ୍ କରନ୍ତଃସ୍ୟ କାମ୍ଟାନ୍ତେ ବଡ଼ପନ୍ ନ ଉଆ । ଏବେ ତମେ ସବୁ ବିସଇର୍ ଅଦିକାର୍ ପାଇଆରାସ୍ । ୨୨ ଜଦି ମୁଇ ଅଇଲେ କି, ଆପଲ୍ ଅଇଲେ କି, ପିତର୍ ଅଇଲେ କି, ଜଗତର୍ କାଇଟା ମିସା ଅଇଲେ, ତମେ ମଲେ କି ବର୍ଲେ, ଏବେ ଜାଇଟା ଅଇଲେ କି ପର୍କେ ଜନ୍ଟା ଅଇଲେ ମିସା, ସବୁ ବିସଇ ତମର୍ ମଙ୍ଗଲ୍ ପାଇସେ । ୨୩ ମାତର୍ ତମେ କିରିସ୍ତର୍ ଲକ୍ଷ୍ମୀ, ଆରି କିରିସ୍ତ ପରମେସରର୍ ।

☆ ୩:୧୭ ୩:୧୭ ୧ମ କରନ୍ତଃସ୍ୟ ୬:୧୯; ୨ୟ କରନ୍ତଃସ୍ୟ ୬:୧୭

୪

କିରିସ୍ତର ପେରିଡ଼ମନ୍

^୧ ତେବେ ତମେ ଆମ୍ଭଙ୍କେ କିରିସ୍ତର ସେବା କରୁମନ୍ ବଲି ନାମ୍ବାର୍ ଆତେ । ଆରି ପର୍ଯ୍ୟେସର୍ ଆମ୍ଭଙ୍କେ ଟିକିନିକି ସତ୍ ବିସଇର୍ ବାଣ୍ଟାରଗରିଆର୍ ଦାଇଡ଼ ଦେଲାଆତେ । ^୨ ଆରି ସେନ୍ତାରି ଦାଇଡ଼ ନେଇରଇବା ସେବାକରୁମନ୍ ସତ୍ ବାବେ କାମ୍ କରବାର୍ ଆତେ । ^୩ ମାତର୍ ତମର୍ ବିତ୍ରେ କେଡେକ୍ ଲକ୍ କି, ବିନ୍ ଲକ୍ କେ ମିସା ମର୍ କାମ୍ ଦେକି ମକେ ବିଚାରନା କଲେ, ମକେ କାଇଟା ନ୍ୟ । ମୁଇ ନିଜେ ମର୍ ବିଚାରନା ନ କରି । ^୪ କାଇକେବଇଲେ ମୁଇ ନିଜର୍ ବିରୁଦେ କାଇ ଦସ୍ କଲାଟା ମର୍ ମନ୍ ନାଜାନେ । ଅଇଲେ ମିସା ମୁଇ ଇତି କାଇ ଦସ୍ ନ କଲା ଲକ୍ ବଲି କଇନଏ । ମାତର୍ ଜେ ମକେ ବିଚାର କରସି, ସେ ମାପୁରୁ । ^୫ ସେଟାରପାଇ ତମେ କାକେ ମିସା କାଇ ବିସଇ ନେଇ ବିଚାର କରାନାଇ । କାଇକେବଇଲେ ବିଚାରନା କରବାକେ ବେଲା ଅଏ ନାଇତା । ମାପୁରୁ ବିଚାରନା କରବାକେ ଆଇବାଜାକ ଜାଗା । ମାପୁରୁ ଆଇଲେ ଆକା ସାରାସାରି ବିଚାରନା ଅଇସି । ସେ ଆନ୍ଦାର୍ ବିତ୍ରେ ଲୁଚ୍ତେ ରଇଲା ସବୁ ବିସଇ ଉଜଲେ ଦେକାଇ ଦେଇସି । ଆରି ଲକ୍ମନର୍ ମନ୍ ବିତ୍ରେ କାତା ସବୁ ଦେକାଇ ଦେଇସି । ସେଡ଼କି ବେଲେ ସବୁଲକ୍ ପର୍ଯ୍ୟେସର୍ ଟାନେଅନି ଲାଡ଼ ପାଇବାଇ ।

^୬ ଏ ବାଇବଇନିମନ୍, ମୁଇ ଏ ସବୁ କାତା ତମେ ସିକା ବଲି, ମର୍ ବିସଇ ଆରି ଆପଲର୍ ବିସଇ ଉଦାଅରନ୍ ଦେଇ କଇଲି । ଜେନ୍ତୁକି ସାସ୍ତରେ ଲେକାଅଇଲାଟାନର୍ ଅରଡ଼ ତମେ ସିକସା । ସାସ୍ତରେ ଜେଡ଼କି ସବୁ ଲେକା ଅଇଲାଆତେ, ତାର୍ଟାନେଅନି ଅଦିକ୍ କରାନାଇ । ସେନ୍ତାରି କଲେ କାକେ ମିସା ନେଇକରି ବଡ଼ପନ୍ ନ ଉଆସ୍, ଆରି କାକେ ମିସା ଇନ୍ ନ କରାସ୍ । ^୭ କାଇକେବଇଲେ ବିନ୍ ଲକ୍ଟାନେଅନି କେ ତମକେ ବଡ଼ କରଡ଼ ନାଇ । ଆରି ଜନ୍ ଗୁଣ୍ ତମେ ଦାନ୍ ଇସାବେ ମିଲାଇଆଟାସ୍ ସେଟା ପର୍ଯ୍ୟେସର୍ ଦେଲାଆତେ । ତେବେ ତମର୍ ନିଜର୍ଟା ବଲି ବଡ଼ପନ୍ ଅଇ କଇ ନାପାରାସ୍ ।

୮ ତମକେ ଦରକାର୍ ରଇଲା ସବୁ ବିସଇ ମିଲାଇ ଆଟାସ୍ କି ? ତମେ କାଇ ସାଉକାର୍ ଅଇସାରି ଆଟାସ୍ କି ? ଗଟେକ୍ ଗଟେକ୍

ରାଜା ଅଇଜାଇଆରାସ୍ କି ? ଏଲେ ମିସା ଆମେ ଅଇ ନାପାରୁଲୁନି । ସତଇସେ ତମେ ରାଜାଅଇତାସ୍ କି ? ସେନ୍ତାଆଲେ, ଆମେ ମିସା ତମର୍ ସଙ୍ଗ୍ ରଇ କାମ୍ କରୁ । ୯ ମାତର୍ ମୁଇ ବାବ୍ଲିନି ପର୍ମେସର୍ ଆମର୍ ପାରା ପେରିତ୍ତମନ୍‌କେ ଦାଡିର୍ ସାରାସାରି ଜାଗା ଦେଲାଆତେ । ଜଗତର୍ ସବୁ ଲକ୍ ଆରି ସର୍ଗର୍ ଦୁତ୍ତମନ୍ ଦେକ୍‌ତେ ରଇବାବେଲେ ଆମେ, ବନ୍ଦି ଅଇଲା ଲକ୍‌ମନ୍‌କେ ମରାଇବାକେ ନେଲାପାରା ଆରୁ । ୧୦ ଆମେ କିରିସ୍‌ଟର୍ ଲାଗି ବକୁଆ ଲକ୍, ମାତର୍ ତମେ କିରିସ୍‌ଟର୍ ସଙ୍ଗ୍ ମିସ୍‌ଲାର ପାଇ ବୁଦିରଇବା ଲକ୍ । ଆମେ ଦୁର୍ବଲ୍, ମାତର୍ ତମେ ବପୁରଇବା ଲକ୍, ତମ୍‌କେ ଲକ୍‌ମନ୍ ସନ୍‌ମାନ୍ ଦେଲାଇନି, ମାତର୍ ଆମ୍‌କେ ସନ୍‌ମାନ୍ ମିଲେନାଇ । ୧୧ ଏବେ ଜାକ ମିସା ଆମ୍‌କେ ପେଟ୍‌ପୁରତେ କାଇବାପିଇବାକେ ମିଲେନାଇ । ପିନ୍‌ବାକେ ବେସି ପୁରନା ବସତର୍ ଆତେ । ଲକ୍‌ମନ୍ ଆମ୍‌କେ ମାର୍‌ଲାଇନି ଆରି ରଇବାକେ ଜାଗା ନଇଲାର୍ ପାଇ ଏନେତେନେ ଅଇ ବୁଲୁଲୁନି । ୧୨ *ଆବଡ୍ କାମ୍ କରି ଆମେ ଦିନକେ ଦିନ ଜୁଲିସୁକି ଗାଲୁନି । କେ ଆମ୍‌କେ ସାଇପ୍ ଦେଲେ ତାକେ ଆମେ ଆସିର୍‌ବାଦ୍ କଲୁନି, ଆରି ଉଡା ସୁନିକରି ମିସା ମୁରଟି କରି ରଇଲୁନି । ୧୩ ନିନ୍‌ଯା ପାଇଲେ, ଆଲାଦର୍ କାତା କଇଲୁନି । ଆମେ ଏବେ ଜାକ ମିସା ଜଗତର୍ କାବରା ପାରା ଅଇଆରୁ । ଲକ୍‌ମନ୍ ଆମ୍‌କେ ଆଣ୍ଟି ଦଇରଇବା ମୁରକି ପାନିପାରା ଦେକ୍‌ଲାଇନି ।

୧୪ ମୁଇ ତମ୍‌କେ ଲାଜ୍ କରାଇବାକେ ଏ ସବୁ ବିସଇ ଲେକିନାଇ, ମାତର୍ ତମ୍‌କେ ମର୍ ଆଲାଦର୍ ପିଲାଟକି ବଲି ଏତାଇ କରି ଚେତ୍‌ନା ଦେବାକେ, ଏ ସବୁ ଲେକ୍‌ଲିନି । ୧୫ କାଇକେବଇଲେ ତମର୍‌ଟାନେ କିରିସ୍‌ଟର୍ ବିସଇ ସିକାଇବାକେ କେତେକ୍ କେତେକ୍ ଗୁରୁ ରଇଲେ ମିସା, ବାବା ଇସାବେ ତମ୍‌କେ ବେସି ଲକ୍ ନାଇ । କିରିସ୍‌ଟ ଜିସୁର୍‌ତେଇ ମିସ୍‌ଲାର ପାଇ ମୁଇ ତମର୍ ବାବା ଅଇଗାଲି । କାଇକେବଇଲେ ମୁଇ ତମ୍‌କେ ଜିସୁକିରିସ୍‌ଟର୍ ସୁବ୍‌କବର୍ କଇରଇଲି । ୧୬ *ତେବେ ମୁଇ ତମ୍‌କେ ବାବୁଜିଆ କରି କଇଲିନି, ମୁଇ ଜାଇଟା କଲିନି ତମେ ମିସା ସେନ୍ତାରି କରା । ୧୭ ସେଟାପାଇ ମୁଇ ତିମତିକେ ତମର୍ ଲଗେ ପାଟାଇ ଆତି । ମୁଇ ତାକେ ଆଲାଦ୍

☆ ୪:୧୭ ୪:୧୭ ପେରିଡ୍ ୧୮:୩ ☆ ୪:୧୭ ୪:୧୭ ୧ମ କରନ୍ତଃ ୧୧:୧; ପିଲିପିୟ ୩:୧୭

କଲିନି । ସେ ମର୍ ନିଜର ପିଲା ପାରା ଆରି ମାପୁରୁର ସେବାକାମେ ସବୁ ନିକସଙ୍ଗ କରସି । ଜେଡ଼କିବେଲେ ସେ ତମରଟାନେ ଆଇସି, କିରିସଟରତେଇ ମିସଲାର ପାଇ ବଲି ମୁଇ କେନ୍ତି ଚଲାଚଲ୍ତି କଲିନି, ସେ ବିସଇନେଇ ସେ ତମକେ କଇସି । ସେ ସମାନ ବିସଇ, ସବୁ ମଣ୍ଡଲିର ବିସବାସିମନ୍ଦକେ ମୁଇ ସିକାଇଲିନି ।

୧୮ ସେ କରନ୍ତିଅତେଇ ଆରି କେବେ ନ ଆସେ, ବଲିକରି ତମର ବିଡ଼ରର କେତେ ଲକ୍ ବଡ଼ପନ୍ ଅଇଆଟାସ୍ । ୧୯ ମାତର ଜଦି ମାପୁର ମନ୍ କଲେ ମୁଇ ଦାପୁରେ ତମରଟାନେ ଆଇବି । ଏ ବଡ଼ପନିଆ ଲକ୍ମନ୍ କାଇ କାତା ଅଇଲାଇନି ବଲି ମୁଇ ନିଜେ ଜାନ୍ବି ଆରି ତାକର ବପୁ ପରମେସରଟାନେଅନି କି ନାଇ, ସେଟା ଜାନ୍ବି । ୨୦ ପରମେସରର ରାଇଜ୍, ଅବକା କାତା ଅଇବା ବିସଇ ନଏଁ, ମାତର ବପୁର ସଙ୍ଗ ରଇବା ବିସଇ । ୨୧ ମୁଇ ଆଇଲାବେଲେ ତମକେ କେନ୍ତି ଚଲାଚଲ୍ତି ଦେକାଇବାର ଆଚେ ? ମୁଇ ବେଡ଼ତାଙ୍ଗ ଦାରି ତମର ଲଗେ ଆଇବାର କି, ଆଲାଦ୍ ଆରି ସାନ୍ତିର ମନ୍ ଦାରି ଆଇବି ?



ମଣ୍ଡଲିତେଇ ବେବିଚାର

୧ ମୁଇ ସତ୍ତସେ ସୁନ୍ଲି ଜେ, ତମର ବିଡ଼ରେ ବେସିଆ କାମ୍ ଆଚେ । ଆରି ଏନ୍ତାରି ବେସିଆ କାମ୍, ଜନ୍ଟାକି ବିସବାସ୍ ନ କଲା ଲକ୍ମର ବିଡ଼ରେ ମିସା ନାଇ । ଜେନ୍ତାରକି ନିଜର ସାନ୍ ଆୟାର ସଙ୍ଗ ସୁଆବସା ଅଇଲାନି । ୨ ଆରି ତମର ବିଡ଼ରେଅନି ଗଟେକ୍ ଲକ୍ ଏନ୍ତାରି କାମ୍ କଲାଆଚେ, ତେବେ ତମେ କାଇକେ ବଡ଼ପନ୍ ଦେକାଇଲାସ୍ନି ? ସେ କିରିରଇବା ପାପ୍ କାମର ଲାଗି ଲାଜ୍ ଅଇକରି ସେନ୍ତାରି ଲକ୍ମକେ ତମର ବିଡ଼ରେଅନି ବାରକରାଇ ଦେବାର ରଇଲା । ୩ ମୁଇ ଗାଗଡ଼ ଇସାବେ ତମର ଟାନେ ନ ରଇଲେମିସା ସେନ୍ତି କରୁବାର ରଇଲା, ଏଲେ ମିସା ଆଡ଼ମାଇ ତମର ସଙ୍ଗ ଆଚି । ଜେ କି ଏନ୍ତାର କାମ୍ କିରିଆଚେ, ମୁଇ ତେଇ ରଇଲା ପାରା, ବେସି ବଡ଼ ଦସ୍ କଲା ଲକ୍ମକେ ଡ଼ଣ୍ଡ ଦେବାର ଆଚେ ବଲି ମାପୁରୁ ଜିସୁକିରିସଟର ନାଉଁ ଦାରି, ମୁଇ ବିଚାର କରି ସାରାଇ ଆଚି । ୪ ତମେ ମାପୁରୁ ଜିସୁର ନାଉଁଦାରି ଗଟେକ୍ଲଗେ ରୁଣ୍ଡ ଅଇଲା ବେଲେ ମର୍ ଆଡ଼ମା ଆରି ମାପୁରୁ ଜିସୁର

ବପୁ ତେଇ ଆଚେ । ୫ ଏନ୍ତାରି ଲକ୍‌କେ ତାର୍ ଗାଗଡ୍ କୁରୁପ୍‌ନାସ୍ ଅଇଜିବାକେ ସଇତାନର୍ ଆତେ ସର୍ପି ଦେବାର୍ ଆଚେ । ସେନ୍ତାର୍ କଲେ ମାପୁରୁ ଆରି ତରେକ୍ ଆଇବା ବେଲେ ତାର୍ ଆଡ୍‌ମା ରକିଆ ପାଇପାର୍ସି ।

୬*ଏନ୍ତାରି ଲକ୍‌କେ ତମର୍ ମଣ୍ଡଲିତେଇ ସଙ୍ଗଇକରି ଏନ୍ତି ବଡ୍‌ପନ୍ ଅଇବାଟା ବଲ୍‌ନାଇ । ମନେ ରକା କଣ୍ଡେକ୍ କମିରର୍ ଲାଗି, ତକଟ୍‌ଲା ସବୁ ଗୁଣ୍ଡ ଆମର୍ ଅଇଜାଇସି, ଏଟା କାଇ ତମେ ନାଜାନାସ୍ କି ? ୭ ତମର୍ ବିଡ୍‌ରେ ରଇବା ପାପର୍ ପୁରନା କମିର୍ ପିଙ୍ଗିଦେଇ ପୁରାପୁରନ୍ ସୁକଲ୍ ଉଆ । ସେନ୍ତାର୍ କଲେ ତମେ କମିର୍ ନଇତେ ତକଟ୍‌ଲା ନୁଆ ଗୁଣ୍ଡ ପାରା ଅଇସା । ମୁଇ ଜାନି, ଏବେମିସା ତମେ ସେନ୍ତାରି ଆଗାସ୍ । ଆମର୍ ନିସ୍‌ତାର୍ ପରବ୍ ଦିନ୍ ତିଆର୍ ଅଇ ସାର୍‌ଲା ଆଚେ । ପରବର୍ ମେଣ୍ଡାପିଲା ନିଜେ କିରିସ୍‌ଟ୍ ସର୍ପି ଅଇଆଚେ । ଠ ତେବେ ଆସା, ଆମର୍ ପାପ୍ ଆରି କାରାପ୍ ରଇବା ପୁରନା କମିର୍ ଚାଡିଦେଉଁ ଆରି କମିର୍ ନ ମିସିଲା ରୁଟି ପାରା ଜେନ୍ତିକି ସଡ୍ ଆରି ସୁଆଲ୍ ଅଇ ଏ ପରବର୍ ସାର୍‌ଦା କରୁ ।

୮ ମୁଇ ଆଗଡୁ ବେସିଆମନର୍ ସଙ୍ଗ୍ ନ ମିସିବାକେ ଚିଟି ଲେକିରଇଲି । ୯୦ ତାର୍ ଅରଡ୍ ନଏଁ ଜେ ଏ ଜଗତେ ରଇବା ବେସିଆ, ଲବ୍‌ରା, ଚରନା ଆରି ମୁରତି ପୁଜା କର୍‌ବା ଲକର୍ ସଙ୍ଗ୍ ମୁଲ୍‌କେ ମିସା ନାଇ ବଲି । ଜଦି ସେନ୍ତାର୍ କଲେ ତମେ ଜଗଡ୍ ଚାଡି ବାରଇଜିବାକେ ପଡ୍‌ସି । ୯୧ ମାଡର୍ ମର୍ କଇବାଟା ଅଇଲାମି, ଜନ୍ ବାଇ ମୁଇ ବିସ୍‌ବାସି ବଲି କଇକରି ବେବିଚାର୍ କାମ୍ କର୍‌ସି, କି କାଇଟା ଦେବାକେ ମିସା ଲବ୍ କର୍‌ସି, କୁଟ୍ କାତା କଇସି, ପୁଡ୍‌ଲା ପୁଜା କର୍‌ସି, ବିନ୍ ଲକର୍‌ଟା ଦକ୍‌ପକ୍‌କରି ନେଇସି, ଆରି ମାଡୁଆଲ୍ ଅଇସି ବଇଲେ, ତାର୍ ସଙ୍ଗ୍ ମିସାନାଇ । ଏନ୍ତିକି ତାର୍ ସଙ୍ଗ୍ ମିସିକରି କାଇବାର୍ ମିସା ନାଇ ।

୯୨ ବିସ୍‌ବାସ୍ ନ କର୍‌ବା ଲକ୍‌ମନ୍‌କେ ବିଚାର୍ କର୍‌ବାକେ ମୁଇ କେ ? ପରମେସର୍ ସେମନ୍‌କେ ବିଚାର୍ କର୍‌ସି । ଜନ୍ ଲକ୍‌ମନ୍ ମଣ୍ଡଲିତେଇ ରଇବାଇ, ସେମନ୍‌କେ ବିଚାର୍ କର୍‌ବାଟା ଆମର୍ କାମ୍ । ୧୩ ସାସ୍‌ତରେ ଲେକା ଅଇଲାପାରା ତମର୍ ବିଡ୍‌ରେ ଜନ୍‌ଲକ୍

☆ ୫:୬ ୫:୭ ଗାଲାତିୟ ୫:୯

ସେନ୍ଧାରି କାରାପ୍ ଚଲାଚଲ୍ତି କଲାନି, ତାକେ ତମର୍ ବିତ୍ତରେଅନି ବାରକରାଇ ଦିଆସ୍ ।



ବିସ୍ବାସିମନର୍ ବିଚାର୍

^୧ ଜଦି ତମର୍ ବିତ୍ତରେ ଗଟେକ୍ ବିସ୍ବାସି ବାଇକେ ଆରି ଗଟେକ୍ ବିସ୍ବାସି ବାଇର୍ ବିରୁଦେ କାତା ରଇଲେ, ସେଟା ବିଚାର୍ କର୍ବାକେ ବିସ୍ବାସ୍ ନ କଲା ବିଚାର୍କାରିଆର୍ ଲଗେ ଜାଆ ନାଇ । ତାର୍ ବାଦୁଲେ ବିସ୍ବାସିମନ୍ ସେଟା ବିଚାର୍ କରତ୍ । ^୨ ମନେ ରଅ, ପର୍ମେସରର୍ ଲକ୍ମନ୍ ଜଗତର୍ ଲକ୍ମନ୍ ବିଚାର୍ କର୍ବାଇ । ସେନ୍ଧାର୍ଆଲେ, ଏ ଗଟେକ୍ ସାନ୍ ବିସଇ ବିଚାର୍ କରିନାପାରାସ୍ କି ? ^୩ ଏଦେ ସୁନା ! ଦିନେକ୍ ଆମେ ସରଗର୍ ଦୁଡ଼ମନ୍କେ ବିଚାର୍ କର୍ବୁ । ତେବେ ଏ ଜିବନେ ଆଇବା ସାନ୍ ସାନ୍ ବିସଇ ବିଚାର୍ କର୍ବାକେ ଅଦିକ୍ ସଅଜ୍ ନଏଁ କି ? ^୪ ଜଦି ବିନ୍ ବିସ୍ବାସି ମନର୍ ସଇଁ ଲାଗାଜତା ଅଇଲେ ରାଜିନାମା କର୍ବାକେ ତମର୍ ମଣ୍ଡୁଲି ବିତ୍ତରେ ବିସ୍ବାସ୍ ଇସାବେ ସନ୍ମାନ୍ ନ ପାଇବା ଲକର୍ଟାନେ କାଇକେ ଗାଲାସନ୍ ? ^୫ ମୁଇ ତମ୍କେ ଲାଜକରାଇବାକେ ଏ କାତା ଲେକିଆତି । ବିସ୍ବାସି ବାଇ ବାଇ ବିତ୍ତରେ କିରମାର ଅଇଲାଟା ରାଜିନାମା କର୍ବାକେ ସତଇସେ ତମର୍ ବିତ୍ତରେ ଗଟେକ୍ ମିସା ବୁଦି ରଇଲା ଲକ୍ ନାଇ କି ? ^୬ ଏଦେ ଦେକା ! ଏଟା କେନ୍ଧାର୍ କଲାସନ୍ ? ଗଟେକ୍ ବିସ୍ବାସି ବାଇ ଆରି ଗଟେକ୍ ବାଇର୍ ବିରୁଦେ ବିଚାର୍ନା ଗରେ ଗାଲାନି, ଆରି ସେ ବିଚାର୍ନା, ବିସ୍ବାସ୍ ନ କରୁମନ୍କେ ସର୍ପିଦେଲାସନ୍ ।

^୭ ତମେ ତମର୍ ତମର୍ ବିତ୍ତରେ ଲାଗାଜତା ଅଇକରି କରଟ୍ ଦୁଆର୍ ଜାକ ଗାଲାସନ୍ । ଇତିଅନି ଜାନା ପଡ଼ଲାନିଜେ ମିସାବିତାଟାନେ ପୁରାପୁରୁନ୍ ଆରି ଜାଇ ଆଟାସ୍ । ତମର୍ ପାଇ ଅନିଆଇ ମୁର୍ଚିକରି, କେତି ଅଇବାଟା ମୁର୍ଚିକରି ରଇଲେ ନିକ ଅଇତା ।^୮ ତାର୍ ବାଦୁଲେ ତମର୍ ତମର୍ ବିତ୍ତରେ ଅନିଆଇ ଆରି କେତି କଲାସନ୍ । ସେଟା ମିସା ନିଜର୍ ବିସ୍ବାସି ବାଇବଇନିମନ୍କେ ! ^୯ ମନେରଅ ଜନ୍ ଲକ୍ମନ୍ ପାପେରଇକରି ବର୍ତ୍ତବାଇ ସେମନ୍ ପର୍ମେସରର୍ ରାଇଜେ ଜାଇ ନାପାରତ୍ । ନିଜେ ନାଡାଇ ଉଆନାଇ । ଜନ୍ ଲକ୍ମନ୍ ନିୟମ୍ ବିରୁଦେ ଚଲାଚଲ୍ତି କଲାଇନି କି ମୁର୍ଚି ପୁଜା କଲାଇନି କି

ବେବିଚାର କାମ୍ କଲାଜନି କି ମନସ୍ ମନସ୍ ବିତ୍ରେ ଆରି ମାଇଜି ମାଇଜି ବିତ୍ରେ ଅଇବା କାରାପ୍ କାମ୍ କଲାଜନି, ବେସିଆ କାମ୍ କଲାଜନି, ^{୧୦} ଚରନା ଅଇଲାନି, କି ଦନ୍ ଲବରା ଅଇଲାନି, ମାତୁଆଲ୍ କି ନିନ୍ଦା କରବାଲକ୍ ଅଇଲାନି କି ଅଲ୍‌ଗା ଲକର୍ ଜିନିସ୍ ଚରାଇବା ଲକ୍ ଅଇଲାନି, ଏମନ୍ ପର୍ମେସରର୍ ରାଇଜେ ଜାଇ ନାପାରତ୍ । ^{୧୧} ମାପୁରୁକେ ବିସବାସ୍ କରବା ଆଗୁତୁ, ତମର୍ ବିତ୍ରେ କେ କେ ଏନ୍ତାରି ଅଇରଇଲାସ୍, ମାତର୍ ପର୍ମେସର୍ ତମର୍ ପାପ୍ ସବୁ ଦଇ ଦେଲା । ଆରି ମାପୁରୁ ଜିସୁ କିରିସ୍ଟ ଆରି ସୁକଲ୍ ଆତ୍ମାର୍ ଲାଗି ଦରମ୍ ବଲାଇ ଅଇଆଟାସ୍ ।

ବେବିଚାରେ ଅନି ବାଉଡା

^{୧୨} ✧ ତମର୍ ବିତ୍ରେ କେତେଲକ୍ କଇବାଇ, “ମୁଇ ଜନ୍‌ଟା ମନ୍ କଲିନି, ସେଟା କର୍ବି” । ମୁଇ କଇବି, “ଉଁ, ସେଟା ସତ୍, ମାତର୍ ସବୁ ବିସଇ ମର୍ ପାଇ ନିକ ନର୍ସି ।” କେତେଲକ୍ କଇବାଇ ସବୁ କରବାକେ ମର୍ ଅଦିକାର୍ ଆଟେ, । ମାତର୍ ମୁଇ କଇବି, ଜନ୍ ବିସଇ ମିସା ମକେ ଦାରି ରକିରଇବାକେ ମୁଇ ନ ଦେଇ, । ^{୧୩} କେତେଲକ୍ କଇବାଇ, ପେର୍ ଜଦି କାଦି କାଇବାକେ ମନ୍ କଲାନି ବଇଲେ କାଦି କାଇବାଟା ନିକ, । ମାତର୍ ମୁଇ କଇଲିନି, ପର୍ମେସର୍ ଗଟେକ୍ ଦିନ୍ ଏ ଦୁଇଟାକେ ମିସା କୁରୁପ୍‌ନାସ୍ କର୍ସି । ଗାଗଡ୍ ବେବିଚାର୍ କାମ୍ କରବାକେ ନାଇ, ମାତର୍ ମାପୁରୁର୍ ସେବା କରବାକେ ଲାଗ । ଗାଗଡ୍‌କେ ଦରକାର୍ ଅଇବାଟା ମାପୁରୁ ଜାଗାଇସି । ^{୧୪} ପର୍ମେସର୍, ମାପୁରୁ ଜିସୁକେ ତାର୍ ନିଜର୍ ବପୁସଙ୍ ମଲାତେଇଅନି ଉଟାଇଲା । ସେନ୍ତାରିସେ ଆମ୍‌କେ ମିସା ଉଟାଇସି, ।

^{୧୫} ତମର୍ ଗାଗଡ୍ କିରିସ୍ଟର୍ ଗାଗଡେ ମିସିକରି ଆଟେ, ଏଟା କାଇ ତମେ ନାଜାନାସ୍ କି ? ତେବେ ମୁଇ କାଇ କିରିସ୍ଟର୍ ଗାଗଡର୍ ଗଟେକ୍ ବାଗ୍ ନେଇକରି ବେସିଆର୍ ଗାଗଡେ ମିସାଇବି କି ? ନାଇ, ସେନ୍ତାରି କେବେ ମିସା ନ ଅ । ^{୧୬} ମାତର୍ ଜେ ବେସିଆ ସଙ୍ ମିସସି, ସେ ତାର୍ ସଙ୍ ଗଟେକ୍ ଗାଗଡ୍ ଅଇସି । ଏଟା ତମେ ନାଜାନାସ୍ କି ? କାଇକେବଇଲେ ଲେକା ଅଇଆଟେ, ସେ ଦୁଇଲକ୍ ଜାକ ଗଟେକ୍

ଅଇବାଇ । ୧୭ ମାତର ଜେ ମାପରୁର୍ ସଙ୍ଘ୍ ମିସ୍ସି, ତାର୍ ଆତ୍ମା ଆରି ମାପରୁର୍ ଆତ୍ମା ଗଟେକ୍ ଅଇଜାଇସି ।

୧୮ ବେବିଚାର୍ କାମେଅନି ଦୁରିକେ ରୁଆ । ଲକ୍ମନ୍ କାଇ ବିନ୍ ପାପ୍ କଲେ ମିସା, ସେଟା ତାର୍ ଗାଗତର୍ ବିରୁଦେ ନର୍ସ । ମାତର ଜେ ବେବିଚାର୍ କାମ୍ କର୍ସି, ସେ ନିଜର୍ ଗାଗତ୍ ବିରୁଦେ ପାପ୍ କର୍ସି । ୧୯ ଖମନେ ରଅ, ତମର୍ ଗାଗତ୍ ସୁକଲ୍ ଆତ୍ମା ରଇବା ମନ୍ଦିର୍, ଜନ୍ ଆତ୍ମା ତମର୍ ବିତ୍ତରେ ବାସା ଅଇଲାଆତେ, ସେଟା ପର୍ମେସରର୍ ଗାନେଅନି ମିଲାଇ ଆଗାସ୍ । ତମେ ନିଜେ, ନିଜର୍ ନୁଆସ୍ ମାତର୍ ପର୍ମେସରର୍ । ୨୦ କାଇକେବଇଲେ ପର୍ମେସର୍ ତମ୍‌କେ ଜବର୍ ଦାମ୍ ଦେଇକରି ଗେନିଆତେ, ସେଟାର୍ ପାଇ ତମର୍ ଗାଗତର୍ କାମ୍ ସଙ୍ଘ୍ ପର୍ମେସରର୍ ମଇମା କରା ।



ବିବା ବିସଇରେ ନିୟମ୍

୧ ଏବେ ତମେ ଲେକ୍‌ଲାଟାନେ ଜନ୍ ସବୁ ବିସଇ ଆତେ, ସେ ସବୁର୍ ଉତର୍ ମୁଇ ଦେବି । ତମେ ପାଚାରିରଇଲାସ୍ ବିସ୍‌ବାସିମନ୍ ବିବା ନ ଅଇବାଟା ନିକ କି ? ୨ ଡ୍ ସେଟା ସତ୍, ମାତର୍ ବେସି ଲକ୍ ବେବିଚାର୍ କାମେ ତଲାଚଲ୍‌ତି କଲାଇନି । ମୁଇ କଇଲିନି ଗଟେକ୍ ଗଟେକ୍ ମୁନୁସକେ ତାର୍ ନିଜର୍ ମାଇଜି ଆରି ଗଟେକ୍ ଗଟେକ୍ ମାଇଜିକେ ତାର୍ ନିଜର୍ ମୁନୁସ୍ ରଇବାର୍ ଆତେ । ୩ ଗଟେକ୍ ମନସ୍ ବିବା ଅଇଲାର୍ ଲାଗି, ତାର୍ ମାଇଜିକେ କରରଇବା ସବୁ ଦାଇଡ୍ କର୍ବାର୍ ଆତେ । ସେନ୍ତାରିସେ ମାଇଜି ମିସା ତାର୍ ମୁନୁସକେ କର୍ବାର୍ ଆତେ । ୪ ମାଇଜିକେ ତାର୍ ନିଜର୍ ଗାଗତର୍ ଅଦିକାର୍ ନାଇ, ମାତର୍ ମୁନୁସର୍ ଆତେ । ସେନ୍ତାରିସେ ମୁନୁସକେ ତାର୍ ନିଜର୍ ଗାଗତର୍ ଅଦିକାର୍ ନାଇ, ମାତର୍ ମାଇଜିର୍ ଆତେ । ୫ ଦୁଇ ମାଇଜି ମୁନୁସ୍ ବେଗ୍‌ଲିକରି ନ ରଅଡ୍ । ମାତର୍ ବେଗ୍‌ଲିକରି ରଇବାର୍ ଆଲେ, ଦୁଇ ଲକ୍ ରାଜି ଉଆ । ଜେନ୍ତାରି କି ସେ ବେଗ୍‌ଲି ରଇବା ବେଲାଇ, ପାର୍ତନା କରିଅଇସି । ମାତର୍ ତାର୍‌ପତେ ଆରିତରେକ୍ ଆସି ମିସାଆ । ଏନ୍ତାରିକଲେ ସଇତାନର୍ ପରିକାତେଇ ଅନି ତମେ

☆ ୬:୧୯ ୬:୧୯ ୧ମ କରନ୍ତଃସ୍ ୩:୧୭; ୨ୟ କରନ୍ତଃସ୍ ୬:୧୭

ରକିଆ ପାଇସା । କାଇକେବଇଲେ ତମ୍ଭେ ମୁରଚିକରି ରଇବା ବପୁ
ଭନା ଆହେ ।

^୭ ଏ ବିସଇ ମୁଇ ତମ୍ଭେ ଜେଡୁକି କଇଲି ଆରି, ସେଟା
ଆଦେସ୍ ଦେଲା ପାରା କଇନାଇ, ମାତର୍ ତମର୍ ଦୁର୍ବଲ୍ ଜାନିକରି
ଉପଦେସ୍ ଦେଲା ପାରା କଇଲିନି । ^୭ ତମେ ସବୁଲକ୍ ମର୍ପାରା ବିବା
ନ ଉଆ ବଲି ମୁଇ ମନ୍ କଲିନି । ମାତର୍ ଗଟେକ୍ ଗଟେକ୍ ଲକ୍‌କେ
ପର୍‌ମେସରର୍ ଟାନେଅନି ମୁଲିଅ ରଇବା ଦାନ୍ ମିଲିଆତେ । ଗଟେକ୍
ଲକ୍‌କେ ଗଟେକ୍ ରକାମଟା ଆରି ବିନ୍ ଲକ୍‌କେ ବିନ୍ ରକାମ୍ ଦାନ୍
ଦେଲାଆତେ ।

^୮ ଏବେ ମୁଇ ବିବା ନ ଅଇରଇବା, ଆରି ରାଣ୍ଡି ମାଇଜିମନ୍‌କେ
କଇଲିନି, ତମେ ମର୍ ପାରା ଏକ୍‌ଲା ରଇଲେ ତମର୍‌ପାଇ ନିକ
ଅଇସି । ^୯ ମାତର୍ ତମେ ଜଦି ମନର୍ ଲାଲ୍‌ସା ମୁରଚିକରି ରଇ
ନାପାରୁଲାସ୍‌ନି ବଇଲେ, ବିବା ଅଇବାଟା ନିକ । କାଇକେବଇଲେ
ଲାଲ୍‌ସାଇ ପଡ଼ିଜିବା ବାଦୁଲେ ବିବା ଅଇବାଟା ନିକ ।

^{୧୦} ✨ ମାତର୍ ବିବା ଅଇବା ବିସ୍‌ବାସିମନ୍‌କେ ମୁଇ ଆଦେସ୍ ଦେଲିନି,
ମୁଇ ଦେଇ ନାଇ ମାତର୍ ମାପୁରୁ ଦେଲାନି । ଜଦି ତମେ ଗଟେକ୍
ବିବାଇ ମାଇଜି, ସେନ୍ତାର ଆଲେ ମୁନୁସ୍‌କେ ଚାଡ଼ି ବିନେ ନ ରୁଆ ।

^{୧୧} ଜଦି ତାକେ ଚାଡ଼ଲେ, ବିବା ନ ଅଇତେ ରୁଆ । ନଇଲେ ଆରି
ଗଟେକ୍ ତର୍ ନିଜର୍ ମୁନୁସ୍ ସଙ୍ଗ୍ ମିସା । ଜଦି ତମେ ବିବାଇ ମୁନୁସ୍,
ନିଜର୍ ମାଇଜିକେ ନ ଚାଡ଼ା ।

^{୧୨} ଏବେ ମୁଇ ବିସ୍‌ବାସିମନ୍ ଜେ କି ବିସ୍‌ବାସ୍ ନ କଲାଟାମନ୍‌କେ
ବିବା ଅଇଆତଡ଼, ସେମନ୍‌କେ କଇଲିନି, ମୁଇ କଇନାଇ ମାପୁରୁ
କଇଲାନି, । ଜଦି ଗଟେକ୍ ବିସ୍‌ବାସି, ବିସ୍‌ବାସ୍ ନଇଲା ମାଇଜିକେ
ବିବା ଅଇଲାଆତେ, ଆରି ସେ ମାଇଜି ତାର୍ ସଙ୍ଗ୍ ମିସି ରଇବାକେ
ମନ୍ କର୍‌ସି ବଇଲେ, ସେ ବାଇ ତାକେ ନ ଚାଡ଼ । ^{୧୩} ଆରି ଜନ୍
ବିସ୍‌ବାସି ମାଇଜି ବିସ୍‌ବାସ୍ ନ କଲା ମୁନୁସ୍‌କେ ବିବାଅଇରଇସି,
ଆରି ସେ ତାର୍‌ସଙ୍ଗ୍ ମିସି ରଇବାକେ ମନ୍ କର୍‌ସି, ତେବେ
ସେ ନିଜର୍ ମୁନୁସ୍‌କେ ନ ଚାଡ଼ । ^{୧୪} କାଇକେବଇଲେ ଜଦି
ତମେ ଗଟେକ୍ ବିସ୍‌ବାସି ମାଇଜି, ବିସ୍‌ବାସ୍ ନ କର୍‌ବା ମୁନୁସ୍‌କେ
ବିବା ଅଇଆଚାସ୍, ତର୍ ମୁନୁସ୍ ତର୍ ସଙ୍ଗ୍ ମିସ୍‌ଲାର୍‌ପାଇ ତାକେ

✧ ୭:୧୦ ୭:୧୦ ମାଡ଼ିଉ ୫:୩୨;୧୯:୯; ମାର୍‌କ ୧୦:୧୧,୧୨; ଲୁକ୍ ୧୭:୧୮

ପରମେସର ତାର ନିଜର ସୁକଲ ଲକ୍ କଲାଆତେ । ସେନ୍ତାରିସେ ବିସ୍ବାସ୍ ନ କରିରଇବା ମାଇଜିକେ, ପରମେସର ଡାକଲା ଆତେ । କାଇକେବଇଲେ ସେ ବିସ୍ବାସ୍ କରବା ମନସ୍ ସଙ୍ଗ୍ ମିସଲା ଆତେ । ଏନ୍ତାରି ନ ରଇଲେ ତମର୍ ପିଲାମନ୍ ବିସ୍ବାସ୍ ନ କରବା ଲକର୍ ପିଲାମନ୍‌ପାରା ଅଇତାଇ । ମାତର୍ ଏବେ ସେମନ୍‌କେ ମିସା ପରମେସର ତାର ନିଜର ଲକ୍ କଲାଆତେ ।

୧୫ ସେ ଜାଇଟା ମିସା ଅ, ଜଦି ଗଟେକ୍ ବିସ୍ବାସ୍ ନ କଲା ଲକ୍ ତାର ବିସ୍ବାସି ମାଇଜି କି ମୁନୁସର୍ ଟାନେଅନି ବିନେ ଅଇବାକେ ମନ୍ କଲାନି ବଇଲେ, ସେ ବିନେ ଅ । ଏନ୍ତାରି ଅଇଲେ କିରିସଟକେ ବିସ୍ବାସ୍ କରବା ମାଇଜି କି ମୁନୁସ୍ ବିବା ବନ୍ଦନେ ଅନି ମୁକ୍ଲି ଆତେ । ପରମେସର ତମକେ ସାନ୍ତିସଙ୍ଗ୍ ମିସି ବିଡି ଜିଇବାକାଇବାକେ ଡାକଲା ଆତେ । ୧୬ ଅଇପାରେ, ତୁଇ ଗଟେକ୍ ବିସ୍ବାସି ବିବାଅଇଲା ମାଇଜି, ତର୍ ବିସ୍ବାସ୍ ନ କଲା ମୁନୁସ୍‌କେ କିରିସଟର୍ ଟାନେ ବିସ୍ବାସ୍ କରାଇପାରୁସ୍ । ସେନ୍ତାରିସେ ତୁଇ ଗଟେକ୍ ବିସ୍ବାସି ବିବାଅଇଲା ମୁନୁସ୍, ତର୍ ବିସ୍ବାସ୍ ନ କଲା ମାଇଜିକେ କିରିସଟର୍ ଟାନେ ବିସ୍ବାସ୍ କରାଇ ପାରୁସ୍ ।

ପରମେସର କଇଲା ଇସାବେ ଚଲାଚଲ୍‌ତି କରା

୧୭ ମାପୁରୁ ଜାକେ ଜେନ୍ତି ଜିବନ୍ ଦୁକାଇ ଆତେ, ପରମେସର ଜାକେ ଜନ୍ ଇସାବେ ଡାକଲା ଆତେ, ସେ ସେନ୍ତାର ଜିଉନା କାଉନା କର । ମୁଇ ସବୁ ମଣ୍ଡୁଲିଟାନେ ଏ ରକାମ ଆଦେସ୍ ଦେଲିନି । ୧୮ ଜଦି ତମେ ଗଟେକ୍ ସୁନତ୍ ଅଇଲା ଜିଉଦି ଲକ୍ ଆରି ପରମେସର ତମକେ ଡାକଲାଆତେ, ସେନ୍ତାର୍ ଆଲେ ତମେ ତମର୍ ଗାଗ୍‌ଡେଅନି ସୁନତ୍ ଚିନ୍ ଲିବାଇବାକେ ଚେସ୍‌ଟା କରା ନାଇ । ସେନ୍ତାରିସେ ତମେ ଜଦି ଜିଉଦି ନ ଅଇଲା ଲକ୍ ଜାକେ କି ପରମେସର ଡାକଲା ଆତେ, ତମେ ସୁନତ୍ ଅଇବାକେ ଚେସ୍‌ଟା କରାନାଇ । ୧୯ ଲକ୍‌ମନ୍ ସୁନତ୍ ଅଇବାଟା କି ସୁନତ୍ ନ ଅଇବାଟା କାଇଟା ନାଇ, ପରମେସରର୍ ଆଦେସ୍ ମାନ୍‌ବାଟାସେ ମୁକ୍‌ଅ । ୨୦ ମାପୁରୁ ତମକେ ଜନ୍ ଇସାବେ ଡାକିଆତେ, ତମେ ସେ ଇସାବେ ରୁଆ । ୨୧ ପରମେସର ତମକେ ଡାକଲାବେଲେ ତମେ କାଇ ଗଡିଦାଙ୍ଗ୍‌ତା ରଇଲାସ୍ କି ? ସେ ବିସଇନେଇ ମନ୍‌ଦୁକ୍ କରାନାଇ । ଜଦି ତର୍ ସାଉକାର୍ ତକେ ମୁକ୍‌ଲାଇଲାନି, ତେବେ

ଉଚିତା । ୨୨ ମାପରୁ ତାଙ୍କୁଲାବେଳେ ଜେ ଗତିଦାଙ୍ଗତା ରଇଲା ସେ ଏବେ ମୁକୁଲି ରଇଲା ଲକ୍ । କାଇକେବଇଲେ ମାପରୁ ତାକେ ମୁକୁଲାଇ ଆଚେ । ସେନ୍ତାରିସେ ଏବେ ଜେ ମୁକୁଲିକରି ଆଚେ, ସେ କିରିସ୍ତର ଗତିଦାଙ୍ଗତା । ୨୩ ତମ୍‌କେ ଅଦିକ୍ ଦାମ୍ ଦେଇ ଗେନାଅଇଆଚେ । ଲକ୍‌ମନର୍ ଗତିଦାଙ୍ଗତା ଉଆ ନାଇ । ୨୪ ଏ ବାଇବଇନିମନ୍, ତମ୍‌କେ ପର୍‌ମେସର୍ ତାଙ୍କୁଲାବେଳେ ଜନ୍ ଇସାବେ ରଇଲାସ୍, ସେ ଇସାବେ ପର୍‌ମେସର୍ ସଙ୍ ମିସିକରି ରଇବାର୍ ଆଚେ ।

ବିବା ନ ଅଇରଇବା ଆରି ରାଣ୍ଡି ମାଇଜିମନର୍ ବିସଇରେ ପରସନ୍

୨୫ ଏବେ ମୁଇ ବିବା ନ ଅଇଲା ଦାଙ୍ଗତାଦାଙ୍ଗତି ବିସଇନେଇ ଲେକ୍‌ବି । ସେ ବିସଇନେଇ ମାପରୁର୍ ଲଗେଅନି କାଇ ଆଦେସ୍ ପାଇନାଇ । ମାତର୍ ପର୍‌ମେସର୍ ମକେ ଦୟା କରି ଗଟେକ୍ ସତ୍‌ଦରମ୍ ଲକ୍ ଇସାବେ ନିଜର୍ ମନର୍ କାତା କଇଲିନି ।

୨୬ ଏବର୍ ଦୁକ୍ କସ୍‌ଟର୍ ବେଲା ଏତାଇଲେ, ମୁଇ ବାବ୍‌ଲିନି ଗଟେକ୍ ଲକ୍ ଜେନ୍ତାରି ଆଚେ, ସେନ୍ତାରିସେ ରଇବା ଦରକାର୍ । ୨୭ ତମେ କାଇ ମାଇଜି ସଙ୍ ବାନ୍ଧିଅଇ ଆଚାସ୍ କି ? ସେନ୍ତାଆଲେ ମୁକୁଲବାକେ ଚେସ୍‌ଟା କରାନାଇ । ତମେ କାଇ ବିବା ଉଆସ୍ ନାଇ କି ? ସେନ୍ତାଆଲେ ମାଇଜି କଜ୍‌ବାକେ ଚେସ୍‌ଟା କରାନାଇ । ୨୮ ଜଦି ତମେ ବିବାଅଇ ଆଚାସ୍, ବଇଲେ ତମେ ପାପ୍ କରାସ୍ ନାଇ । ଜଦି ଗଟେକ୍ ଦାଙ୍ଗତି ବିବାଅଇସି, ସେ ମିସା ପାପ୍ କରେନାଇ । ମାତର୍ ବିବାଅଇଲା ଲକ୍‌ମନ୍ ଦୁକ୍ କସ୍‌ଟ୍ ମୁରଚିକରି ରଇବାକେ ପଡ୍‌ସି । ଏନ୍ତାରି ଦୁକ୍ କସ୍‌ଟର୍ ବେଲାଇ ସିତିଅନି ରକିଆ ପାଆ, ବଲିକରି ମୁଇ ମନ୍ କଲିନି ।

୨୯ ମାତର୍ ଏ ବାଇମନ୍ ମୁଇ ତମ୍‌କେ କଇଲିନି, ଏବେ ଆମ୍‌କେ ଅଲପ୍ ଦିନ୍ ଆଚେ । ଏଟାର୍ ପାଇ ଏବେଅନି ଜେ ବିବା ଅଇଆଚେ ସେ ବିବା ନ ଅଇଲା ଲକ୍‌ର୍ ପାରା ରଅ । ୩୦ ସେନ୍ତାରିସେ ଜନ୍ ଲକ୍‌ମନ୍ କାନ୍ଦାବୁବା ଅଇରଇଲାସ୍‌ନି, ସେମନ୍ କାନ୍ଦାବୁବା ନ ଅଇ ରଇଲା ଲକ୍‌ର୍ ପାରା ରୁଆ । ଆରି ଜନ୍ ଲକ୍‌ମନ୍ ସାର୍‌ଦା ଅଇରଇଲାଇନି, ସେମନ୍ ସାର୍‌ଦା ନ ଅଇଲା ଲକ୍‌ର୍ ପାରା ଅଇ ରଅଡ୍ । ଜନ୍ ଲକ୍‌ମନ୍ ଗେନ୍‌ବାଇ, ସେଟା ନିଜର୍‌ଟା ନ୍ୟୁ ବଇଲାପାରା ରଅଡ୍ ।

୩୧ ଜନ୍ ଲକ୍ମନ ଜଗତର ଜିନିଷ ନେଇ ବେବାର୍ପାନି କଲାଲନି, ସେମାନ ସବୁବେଳେ ସେ ବିସଇ ଚିନ୍ତା ନ କଲା ଲକ୍ମନ ପାରା ରଥ । କାଇକେବଇଲେ ଜନ୍ ଜଗତେ ଆମେ ଆତୁ, ସେ ଜଗତର ସବୁ ଜିନିଷ ବୁଡ଼ିଜାଇସି ।

୩୨ ମାତର ତମେ ଏ ବିସଇନେଇ ତେରେପେତେ ଉଆନାଇ । ବିବା ନ ଅଇଲା ଲକ୍ମନ ସବୁବେଳେ ମାପୁରୁର ସେବା କାମ କରବାକେ ମନ କର । କାଇକେବଇଲେ ମାପୁରୁକେ ସାରଦା କରାଇବାଟା ତାର ମୁକ୍ତିଅ କାମ । ୩୩ ମାତର ଜେ ବିବାଅଇଆତେ, ସେ ଏ ଜଗତର ସବୁ ବିସଇନେଇ ଚିନ୍ତା କରସି । କାଇକେବଇଲେ ସେ ତାର ମାଇଜିକେ ସାରଦାସଙ୍ଗ ରକ୍ତବାକେ ମନ କରସି । ୩୪ ସେନ୍ତ୍ରସେ ତାର ମନ ଦୁଇବାଟେ ଜିକ୍ଷାନ ଅଇଲାନି । ବିବା ନ ଅଇଲା ମାଇଜି କି ଦାଙ୍ଗି ମାପୁରୁ କାମର ବିସଇ ଚିନ୍ତା କରସି । କାଇକେବଇଲେ ସେ ତାର ଗାଗଡ଼ ଆରି ଆତ୍ମା ପର୍ଯ୍ୟେସରକେ ସର୍ପି ଦେବାକେ ମନ କରସି । ମାତର ବିବା ଅଇଲା ମାଇଜି ଏ ଜଗତର ସବୁଦିନର ବିସଇ ଚିନ୍ତା କରସି । କାଇକେ ବଇଲେ ତାର ମୁନୁସକେ ସାରଦା କରବାକେ ସେ ବାବ୍ତେ ରଇସି ।

୩୫ ଏ କାତା ମୁଇ ତମକେ ନିଜର ମଙ୍ଗଲର ପାଇ କଇଲିନି । ତମକେ ଆଦେସ ମାନବାକେ ଦେଇ ନାଇ ମାତର ତମେ ଜେନ୍ତ୍ରକି ସତ୍ ବାବେ ଚଲାଚଲ୍ତି କରି ଏନେତେନେ ଚିନ୍ତା ନ ଅଇକରି ପୁରାପୁରୁନ୍ ବାବେ ମାପୁରୁକେ ସର୍ପି ଅଇବାକେ କଇଲିନି ।

୩୬ କନିଆ ମାଙ୍ଗନି ଅଇଲାପତେ ଜଦି ଜନ୍ ମନସ୍ ତାର ମାଙ୍ଗଲା ମାଇଜି ସଙ୍ଗ ଟିକ୍ସଙ୍ଗ ଚଲାଚଲ୍ତି କରି ନାପାରଲାନି ଆରି ତାର ଲାଲସା ସେ କନିଆ ଉପରେ ବଡ଼ିଗାଲାନି, । ତାର ଇସାବେ ବିବା ଅଇବାର ଆତେ ଆକା ବଇଲେ, ସେ ବିବା ଅଇ ପାରେ । ଏଟାରପାଇ କାଇ ପାପ୍ ନାଇ । ୩୭ ମାତର ସେ ଜଦି କାର ବାଦିଅ ନ ଅଇ ତାର ମନ ତାଟ୍ କରି ଟିକ୍କଲେ, ଆରି ତାର ମନ କଲାଟା ପୁରାପୁରୁନ୍ ଦାରି ରକ୍ତିପାରଲେ, ସେ ଡିଣ୍ଡା ଟକିକେ ବିବା ନ କଲେ ନିକ । ୩୮ ତେବେ ଜାକେ ଡିଣ୍ଡା ଟକିର ମାଙ୍ଗନି ଅଇଲା ଆତେ, ସେ ଟିକ୍ କାମ୍ କଲାନି, ମାତର ଜେ ବିବା ନ ଅଏ, ସେ ତାର ତେଇଅନି ଅଦିକ୍ ନିମାନ୍ କାମ୍ କଲାନି ।

୩୯ ମୁନୁସ୍ ଜିବନ୍ ରଇବା ଜାକ, ମାଇଜି ବାନ୍ଦି ଅଇରଇସି । ଜଦି ମୁନୁସ୍ ମରିଜାଇସି, ତେବେ ମାଇଜି ମାପରୁକେ ବିସ୍‌ବାସ୍ କରବା ଲକ୍‌କେ, କାକେ ମିସା ବିବା ଅଇପାରସି । ୪୦ ମୁଇ ବାବ୍‌ଲିନି ସେ ବିବା ନ ଅଇ ସେନ୍ତ୍ରସେ ରଇଲେ ଅଦିକ୍ ସୁକ୍ ମିଲ୍‌ସି । ଆରି ଏଟା ପରମେସରର୍ ସୁକଲ୍ ଆଡ଼ମାର୍ ମନ୍ କଲାଟା ବଲି ମୁଇ ବାବ୍‌ଲିନି ।

୮

ପୁଜା କଲା ପର୍ଯ୍ୟାନ୍ ବିସଇ ପର୍ଯ୍ୟନ୍

୧ ଏବେ ମୁଇ ଦେବିଦେବ୍‌ତାମନ୍‌କେ ପୁଜ୍‌ଲା ମାଉଁସ୍ ବିସଇନେଇ ଲେକ୍‌ଲିନି । ଏଟା ସତ୍ ଜେ ଆମ୍‌କେସେ ବୁଦି ଆଚେ ବଲି ତମେ ଜନ୍‌ଟା କଇଲାସ୍‌ନି, ସେଟା ଆମେ ଜାନିଆରୁ । ସେନ୍ତା ଗଟେକ୍ ଲକ୍‌କେ ଆଁକାର୍ ଜନମ୍ କରାଇସି । ମାତର୍ ଆଲାଦ୍ ଆମର୍ ବିସ୍‌ବାସ୍‌କେ ଡାଟ୍ କରାଇସି । ୨ ଜନ୍ ଲକ୍, ଏ ବିସଇ ମୁଇ ଅଲପ୍ ଜାନିଆଟିବଲି ବାସ୍‌ସି, ସେ ସତଇସେ ଜାଇଟା ଜାନବା ଦରକାର୍, ସେଟା ଜାନେ ନାଇ । ୩ ମାତର୍ ଜନ୍‌ଲକ୍ ଜଦି ପର୍ମେସର୍‌କେ ଆଲାଦ୍ କଲାନ୍ନି, ତାକେ ପର୍ମେସର୍ ଜାନେ ।

୪ ତେବେ ଦେବିଦେବ୍‌ତାମନ୍‌କେ ପୁଜ୍‌ଲା ମାଉଁସ୍ ବିସଇ ଜାନିଆରୁ ଜେ, ଏ ଜଗତେ ଦେବି ଦେବ୍‌ତା ବଲି କାଇଟା ନାଇ । ଆମର୍ ପର୍ମେସର୍‌କେ ଚାଡ଼ିଦେଲେ ଆରି କେ ମିସା ପର୍ମେସର୍ ନାଇ । ୫ କାଇକେବଇଲେ ସରଗ୍ ପୁରେ ଅ କି ମର୍‌ପୁରେ ଅ ଜନ୍‌ଟାମନ୍‌କେ ଦେବିଦେବ୍‌ତା ବଲି କଇଲାଇନି, ଏଲେ ମିସା ସେମନ୍ ରଇପାରଡ୍ । ଏନ୍ତି କେତେକ୍ କେତେକ୍ ଦେବ୍‌ତା ଆରି ମାପରୁ ଆଚଡ୍ । ୬ ସେମନ୍ ରଇଲେ ମିସା ଆମର୍ ଗଟେକ୍ ଆକା ବାବା ପର୍ମେସର୍, ଜନ୍ ବାବା କି ସବୁ ତିଆର୍ କଲାଆଚେ, ଆରି ଆମେ ତାର୍ ଲାଗି ବ୍‌ଟ୍‌ଲୁନି, ମାତର୍ ଗଟେକ୍ ବଲି ମାପରୁ ଜିସୁ କିରିସ୍‌ଟ, ତାର୍ ଲାଗି ସବୁ ବିସଇ ଅଇଆଚେ, ଆରି ତାର୍ ଲାଗି ଆମେ ବ୍‌ଟ୍‌ଲୁନି ।

୭ ଏଲେ ମିସା ଏ ସତ୍ ଗିଆନ୍ ସବୁଲକ୍ ନାଜାନଡ୍ । ମାତର୍ କେତେଲକ୍ ଆଗେଅନି ଦେବି ଦେବ୍‌ତା ଆଚଡ୍ ବଲି ବାବିକରି ସେମନ୍‌କେ ପୁଜା କରି ଆଇଲାଇନି । ସେମନ୍‌ର୍ ବିସ୍‌ବାସ୍ ଡାଟ୍ ନାଇଜେ ଦେବିଦେବ୍‌ତାମନ୍‌କେ ପୁଜ୍‌ଲାଟା କାଇଲେସରି ସେମନ୍

ସୁକଳ୍ ଅଇବାର୍ ନଏ ବଲି ବାବ୍ଲାଇନି । ୮ ମାତର୍ କାଦି କାଇବାଟା, ପରମେସର୍ଟାନେଅନି ଆମ୍ବକେ ବିନେ ନ କରେ । ଆମେ କାଇଲେ କାଇ ଲାବ୍ ନଏ, କି ନ କାଇଲେ ମିସା କାଇଟା ନ ଜାଏ ।

୯ ମାତର୍ କାଇଟା କାଇଲାସ୍ନି ସେ ବିସଇନେଇ ଜାଗରଡ୍ ରୁଆ । ତମେ ଜନ୍ଟା କାଇଲାର୍ ଲାଗି ତମର୍ ଜନ୍ ବାଇର୍ ବିସ୍ବାସ୍ ଡାଟ୍ ନାଇ, ସେ ତମର୍ଲାଗି ପାପ୍ କର୍ବାର୍ ନାଇ । ୧୦ କାଇକେ ବଇଲେ, ତମେ ଗଟେକ୍ ବୁଦି ରଇଲା ଲକ୍ । ପୁଜ୍ଲାଟା କାଇଲେ କାଇଟା ନଏ ବଲି ଜାନାସ୍ । ଜଦି ମନ୍ ବିଡ୍ରେ ବିସ୍ବାସେ ଡାଟ୍ ନଇଲା ତମର୍ ଗଟେକ୍ ବାଇ, ସେ ତମ୍ବକେ ମନ୍ଦିରେ କାଇବାଟା ଦେକ୍ଲେ, ତାକେ ମିସା ପୁଜ୍ଲାଟା କାଇବାକେ ମନ୍ ଲାଗ୍ସି । ୧୧ ତେବେ ସେ ବାଇ ନସ୍ଟ ଅଇଲାନି, କାଇକେବଇଲେ ପୁଜ୍ଲାଟା କାଇଲାକେ ପାପ୍ କଲିନି ବଲି ସେ ବାସ୍ସି । କିରିସ୍ଟ ସେ ବାଇର୍ପାଇ ମଲାଆଟେ ବଲି ମିସା ତମର୍ ମନେ ରଇବାର୍ ଆଟେ । ୧୨ ଏନ୍ତାରି ତମେ ସଙ୍ଗର୍ ବିସ୍ବାସି ବାଇମନର୍ ବିରୁଦେ ପାପ୍ କଲାସ୍ନି ଆରି ତାକର୍ ବୁଜ୍ବା ବପୁ ଉନାଟାକେ, ବାଦା ଦେଇ ମାପ୍ପୁର୍ ଜିସ୍ପୁର୍ ବିରୁଦେ ମିସା ପାପ୍ କଲାସ୍ନି । ୧୩ ତେବେ ମୁଇ ପୁଜ୍ଲା ମାଉସ୍ କାଇଲାର୍ ଲାଗି ମର୍ ବାଇବଇନିମନ୍ଦକେ ପାପ୍ କରାଇଲିନି ବଇଲେ, ମୁଇ କେବେ ମିସା ସେଟା ନ କାଇ । କାଇକେବଇଲେ ସେଟାର୍ଲାଗି ମର୍ ବାଇବଇନିମନ୍ ପାପେ ନ ପଡ୍ଡ ।



ପେରିଡ୍ ସିସ୍ମାନର୍ ଅଦିକାର୍

୧ ମର୍ ଜାଇଟା ମନ୍ କଲାଟା, ସେଟା କାଇ କାରିନାପାରି କି ? ମୁଇ କାଇ ଗଟେକ୍ ପେରିଡ୍ ନଇ କି ? ମୁଇ କାଇ ଆମର୍ ମାପ୍ପୁର୍ ଜିସ୍ପୁର୍ ଦର୍ସନ୍ ପାଇ ନାଇ କି ? ତମେ ସବୁ, ମୁଇ ମାପ୍ପୁର୍ ପାଇ କାରିରଇବା କାମର୍ ଲାଗି ବିସ୍ବାସ୍ କଲାସ୍ ନାଇ କି ? ୨ ଜଦି ମକେ ବିନ୍ ଲକ୍ମନ୍ ଗଟେକ୍ ପେରିଡ୍ ବଲି ନ ନାମ୍ଲେ ମିସା, ତମେ ମକେ ସଡ୍ ଇସାବେ ନାମି ଆଟାସ୍ । କାଇକେବଇଲେ ମାପ୍ପୁର୍ ସଙ୍ଗ୍ ତମର୍ ଜିବନ୍ ମିସ୍ଲାର୍ ଲାଗି, ମର୍ ପେରିଡ୍ ପଦର୍ ସାକି ଆଟାସ୍ ।

୩ ତମେ ଗଟେକ୍ ପେରିଡ଼ କି ? ବଲି ମକେ ପରସନ୍ କରୁବା ଲକ୍ମନକେ ମୁଇ ଏ କାତା କଇବି । ୪ ଆମେ ମାପୁରୁ ଜିସୁର୍ ପେରିଡ଼ ମନ୍ । ତାର୍ କାମର୍ ଲାଗି, କାଇବାଟା କି ପଇବାଟା ମିଲ୍ଲେ, ସେଟା ନେବାର୍ ମର୍ ଅଦିକାର୍ ନାଇ କି ? ୫ ଅଲ୍ଗା ପେରିଡ଼ମନ୍ ପାରା, ପିତର୍ ଆରି ଆମର୍ ମାପୁରୁ ଜିସୁର୍ ବାଇମନ୍ ପାରା, ବିସ୍ବାସ୍ କରିରଇବା ମାଇଜିକେ ବିବା ଅଇକରି ତାକେ ମର୍ ସଙ୍ଗ୍ ନେବାକେ କାଇ ମର୍ ଅଦିକାର୍ ନାଇ କି ? ୬ ଅବ୍ବା ଜିଇବା କାଇବାକେ ମୁଇ ଆରି ବରନବା ଆବଡ଼ କାମ୍ କର୍ତେ ରଇବୁ କି ? ୭ ବାବିଦେକା, ଗଟେକ୍ ସଇନ ଦୁଇଦେ ରଇଲାବେଲେ ନିଜେ କର୍ତ କରି କେବେ କାମ୍ କରିପାରେ କି ? ନାଇ, ନାପାରେ । କି ଗଟେକ୍ ତାସି ତାର୍ କେତେ ଅନି ଅଇଲା ପସଲ୍, ତାର୍ କାଇବାର୍ ଅଦିକାର୍ ନାଇ କି ? ଆରି କେ ଗରୁଗାଇ ପସିରଇକରି ସେମନ୍ ଦୁଦ୍ ନ କାଅଡ଼ କି ?

୮ ମୁଇ କାଇ ଏଟା ମୁନୁସ୍ ଇସାବେ କଇଲିନି କି ? ନିୟମେ ଏଟା ଲେକା ଅଏ ନାଇ କି ? ୯ *ସେ ନିୟମେ ଏନ୍ତାରି ଲେକା ଅଇଆଟେ । ଦାନ୍ ଗାନାଇ ବୁଲ୍ତେ ରଇବା ବଲଦର୍ ତମନାଇ ବାନ୍ଦାନାଇ । ଜେନ୍ତି କି ସେ ଅଲପ୍ ଅଲପ୍ କାଇତେରଇସି । ଏ ନିୟମ୍ ଲେକ୍ଲାବେଲେ ପର୍ମେସର୍ କାଇ ଏ ବଲଦମନ୍ ବିସଇସେ ଚିନ୍ତା କର୍ତେରଇଲା କି ? ୧୦ ଏଟା ଆମର୍ ପାଇ ଲେକା ଅଇଲାଆଟେ । ଜେନ୍ତିକି ଜନ୍ ଲକ୍ମନ୍ କସ୍ବାତେଇ ଆରି କାଟ୍ବାତେଇ ମିସଲାଇ ଆଟଡ଼, ସେମନ୍କେ ତେଇର୍ ପସଲ୍ଟାନେ ବାଗ୍ ମିଲ୍ସି ବଲି ଆସା କରି କାମ୍ କରୁବାଇ । ୧୧ *ଆମେ ତମର୍ ବିତ୍ରେ ଆଡ଼ମାର୍ ମୁଞ୍ଜି ବୁନ୍ଲୁ ଆରୁ । ସେଟାର୍ ପାଇ ତମର୍ଟାନେ ଅନି କାଇ ଜଗତର୍ ପସଲ୍ ପାଇବାକେ ମନ୍ କରୁବାଟା, ଗଟେକ୍ କାରାପ୍ କାତା କି ? ୧୨ ତମର୍ ଟାନେଅନି ଏଟା ଆସା କରୁବାକେ ଜଦି ବିନ୍ ଲକ୍ମନ୍ ଅଦିକାର୍ ଆଟେ, ସେନ୍ତି ବଇଲେ ତାକର୍ଟାନେଅନି ଆମର୍ ଅଦିକାର୍ ବେସି ନଏ କି ?

ଏଲେ ମିସା ସେ ଅଦିକାର୍ ଆମେ ବେବାର୍ କରୁନାଇ, ମାତର୍ କିରିସଟର୍ ସୁବକବରକେ କାଇମିସା ଅସୁବିଦା ନ ଆସ ବଲି ଆମେ ସବୁ ରକାମର୍ କସ୍ଟ ମୁର୍ଚି କରି ରଇଲୁନି । ୧୩ ଜନ୍ ଲକ୍ମନ୍

☆ ୯:୯ ୯:୯ ଏମ ତିନତି ୫:୧୮ ☆ ୯:୧୧ ୯:୧୧ ରମିୟ ୧୫:୨୭

ମନ୍ଦିରେ ସେବା କଲାଈନି, ସେମନ୍ ମନ୍ଦିରେ ଅନି କାଦି ପାଇବାଇ । ଆରି ଜେ ସବୁଦିନେ ବେଦିଟାନେ ବଲି ଦେଲାଈନି, ସେମନ୍ ବେଦିଟାନେ ବଲିକଲା ବାଟାଇ ମିସ୍‌ବାଇ, ଏଟା ତମେ ଜାନିଆଟାସ୍ । ୧୪ ✧ ସୁସମାଚାର୍ ଜାନାଇବା ଲକ୍, ତେଇଅନି ଜିଉନା କାଉନା କରା ବଲି ମାପୁରୁ ଆଦେସ୍ ଦେଲାଆଟେ ।

୧୫ ମାତର୍ ମୁଇ ଏନ୍ତାରି କାଇମିସା ଅଦିକାର୍ ମାଙ୍ଗିନାଇ, ଏ ବିସଇ ଦାବି କର୍‌ବାକେ ମୁଇ ଲେକିନାଇ । ତମର୍‌ଟାନେଅନି ମାଙ୍ଗିବା ବାଦୁଲେ ମୁଇ ମରିଜିବି ସିନା, ନ ମାଙ୍ଗି । କାଇକେବଇଲେ ମୁଇ ତମର୍‌ଟାନେ କାଇଟା ନ ମାଙ୍ଗିତେ କାମ୍ କଲି, ବଲି ବଡ଼ପନ୍ ଅଇବି । ୧୬ ସୁବ୍‌କବର୍ ସୁନାଇଲିନି ବଲି ମର୍ ବଡ଼ପନ୍ ଅଇବା ଅଦିକାର୍ ନାଇ, କାଇକେବଇଲେ ଏଟା ମକେ ତିଆରିରଇବା କାମ୍ । ଜଦି ମୁଇ ସୁବ୍‌କବର୍ ନ ଜାନାଇଲେ ମକେ ବଡ଼ ତଣ୍ଟି ମିଲୁସି । ୧୭ ଏଟା ଜଦି ମୁଇ ନିଜର୍ ମନ୍ କଲା ଇସାବେ କଲେ, କୁଲି ପାଇବାକେ ମର୍ ଅଦିକାର୍ ରଇତା । ମାତର୍ ପର୍‌ମେସର୍ ମକେ ଏ କାମ୍ ସର୍ପି ଦେଲାକେ, ମୁଇ ଏଟା କଲିନି । ୧୮ ସେନ୍ତାର୍‌ଆଲେ ମକେ କେତେକ୍ କୁଲି ମିଲୁଲାନି ? ମର୍ କର୍‌ଟା ପାଇ ମାଙ୍ଗିବାକେ ମର୍ ଦାବି ରଇଲେ ମିସା, ମୁଇ କୁଲି ନ ପାଇତେ ସୁବ୍‌କବର୍ ଜାନାଇଲିନି । ସୁବ୍‌କବର୍ ଜାନାଇବାକେ ଜନ୍ ଅଦିକାର୍ ମୁଇ ପାଇ ଆଟି, ସେଟାସେ ମର୍ କୁଲି ।

୧୯ ଏଟାର୍‌ପାଇ ମୁଇ କାର୍ ତଲିଆ ନାଇ କି କାର୍ ଗତିଦାଙ୍ଗତା ନାଇ । ଅଇଲେ ମିସା କେତେକ୍ କେତେକ୍ ଲକ୍‌କେ କିରିସ୍‌ଟର୍‌ତେଇ ଆନ୍‌ବାକେ ମୁଇ ସବୁଲକର୍ ଗତିଦାଙ୍ଗତା ଅଇଆଟି । ୨୦ ମୁଇ ଜିଉଦି ଲକ୍‌ମନ୍‌କେ ପାଇବାକେ, ତାକର୍ ପାରା ଚଲାଚଲ୍‌ତି କଲିନି, ଜେନ୍ତିକି ମୁଇ ସେମନ୍‌କେ କିରିସ୍‌ଟର୍ ବାଟେ ଆନିପାର୍‌ବି । ମୁଇ ଜଦି ମସାର୍ ନିୟମର୍ ତଲିଆର୍ ନ ଅଇରଇଲେ ମିସା, ସେମନ୍‌କେ କିରିସ୍‌ଟର୍ ବାଟେ ଆନ୍‌ବାକେ, ନିୟମ୍ ମାନିବା ଲକର୍ ପାରା ଚଲାଚଲ୍‌ତି କଲିନି । ୨୧ ସେନ୍ତାରିସେ ଜିଉଦି ନ ଅଇଲା ଲକ୍‌ମନ୍‌ର୍ ସଙ୍ଗ୍ ରଇଲାବେଲେ, ମୁଇ ଜିଉଦି ନିୟମ୍ ମାନି ନାଇ । ସେ ବେଲେ ମୁଇ ଜିଉଦି ନ ଅଇଲା ଲକର୍ ପାରା ଚଲାଚଲ୍‌ତି କର୍‌ବି । ଜେନ୍ତିକି ସେମନ୍‌କେ କିରିସ୍‌ଟର୍ ବାଟେ ଆନିପାର୍‌ବି । ଏଟାର୍ ଅରଡ଼ ନଏଁ ଜେ ମୁଇ ପର୍‌ମେସର୍‌ର୍

✧ ୯:୧୪ ୯:୧୪ ମାଡିଉ ୧୦:୧୦; ଲୁକ୍ ୧୦:୭

ନିୟମ୍ ମାନି ନାହିଁ । କାହିଁକି ବଢ଼ିଲେ ମୁଁ କିରିସ୍ତର ନିୟମର ତଳେ ଆସି ।^{୨୨} ଜେଡେବେଲେ ମୁଁ ବିସ୍ତାପେ ଦୁର୍ବଳ ଲକ୍ଷ୍ୟ ସଙ୍ଗେ ରହି, ତାଙ୍କର ପାରା ଦୁର୍ବଳ ଅଛି । ଜେଡିକି ସେହି ଅଧିକାରି ସେମାନଙ୍କେ କିରିସ୍ତର ବାଟେ ଆନି ପାରୁ । ସେଟାର ପାଇଁ ମୁଁ ବିନ୍ ବିନ୍ ଲକ୍ଷ୍ୟଗଣେ ବିନ୍ ବିନ୍ ରକାମ୍ ଅଛଇଲି । କେଡିକରି ମିସା ମୁଁ ସେମାନଙ୍କେ ରକିଆ କରୁ ।

^{୨୩} କିରିସ୍ତର ସୁବକବର ସବୁବାଟେ ଜାଣାଇବାକେ ଆରି ତାର ଆସିରବାଦ ପାଇବାକେ ମୁଁ ସବୁଟା କଲିନି ।^{୨୪} ଆରାଜିତା ଗାନେ ପାଲାଇବା ଲକ୍ଷ୍ୟ ବେସି ଆତଡ଼, ଏଟା ସଡ଼ । ମାତର ଗଟେକ୍ ଲକ୍ଷ୍ୟକେସେ ପୁରୁସ୍କାର ମିଲୁସି । ଏଟା ତମେ ଜାନିଆଟାସ୍ । ତମେ ମିସା ପୁରୁସ୍କାର ପାଇଲା ପାରା ପାଲାଇ ।^{୨୫} ଜେ ପାଲାଇବାଟାନେ ବାଗ୍ ନେଇସି, ସେ ଅବିଆସ୍ କରି, ତାର ଗାଗଡ଼ ଡାକ୍ କରିରଇସି । ଆରି ସେ ଦାପେ ନସିଜିବା ପୁରୁସ୍କାର ମିଲାଇବାକେ ସେଟା କରୁସି । ମାତର ଆମେ, କେବେ ମିସା ନ ନସବା ପୁରୁସ୍କାର ପାଇବାକେ, ସେଟା କଲୁନି ।^{୨୬} ମୁଁ ଏନେତେନେ ନ ଦେକି ସାରାସାରି କେଟବାଟାନେ ପାଲାଇବା ଲକ୍ଷ୍ୟ ପାରା ଆସି । ମୁଁ ଗଟେକ୍ ବିଦା ସଙ୍ଗେ ଜୁଇଦ୍ କରବା ଲକ୍ଷ୍ୟପାରା, ଜେକି ତାର ବିଦା ମାରଲେ ପାଇସି ଆକା ।^{୨୭} ମୁଁ କସଟ ମୁରତିକରି ଗାଗଡ଼ ମେଲା ଚାଡ଼ିନାଇ । କାହିଁକି ବଢ଼ିଲେ ବିନ୍ ଲକ୍ଷ୍ୟମନର ଲଗେ ସୁବକବର ଜାଣାଇରଇଲେ ମିସା ମକେ ଜେଡିକି ନାହିଁକରି ନ କଅଡ଼ ।

୧୦

ମୁରତିପୁଜା ବିରୁଦ୍ଧେ ଜାଗରତା

^୧ ଏ ମର ବାଢ଼ିବଇନିମନ୍, ଆମର ଆନିଦାଦିମନ୍, ଜନ୍ ଲକ୍ଷ୍ୟମନ୍ ମସାର ବାଟେ ଜାଢ଼ିତେରଇଲା, ସେମାନଙ୍କେ କାଢ଼ି ଅଇଲା ଏତାଇ ଦେକା । ସେମନ୍ ସବୁ ଲକ୍ଷ୍ୟ ବାଦଲ୍ ତଳେ ରଇ ରକିଆ ପାଢ଼ିତେରଇଲା । ଆରି ରକ୍ଷ୍ ସମ୍ପଦୁରେ ନ ବୁଡ଼ତେ ଇଣ୍ଟି ଇଣ୍ଟି ଲକ୍ଷ୍ୟଲା ।^୨ ସେମନ୍ ସବୁ ବାଦଲେ ଆରି ସମ୍ପଦୁରେ ଡୁବନ୍ ନେଲା । ମସାର ସିସମନ୍ ବଲି ସେମାନଙ୍କେ ଗଟେକ୍ ଚିନ୍ ରଇଲା ।^୩ ଆରି ସବୁଲକ୍ଷ୍ୟ ପର୍ମେସର ଜାଗାଇ ରଇବା କାଦି କାଢ଼ିଲା,

୪ ଆରି ସେ ପାକ୍ନାଇ ଅନି ଆଇବା ପାନି କାଇଲାଇ । ସେ ପାକ୍ନା ଅଇଲାନି କିରିସଟ୍ । * ଏଲେନିସା ସେମନର ବିତ୍ତରେ ଅନି ବେସି ଲକ୍‌କେ ପର୍ମେସରର୍ ସାର୍ଦା ନ ରଇଲା । ସେଟାର୍ ପାଇ ସେମନ୍ ମରୁବାଲି ବୁର୍ବୁ ମଲାଇ ।

୬ ସେମନ୍ ଜନ୍ ରକାମ୍ ଆସାର୍ ବିସଇର୍ ପାଇ ଲାଲ୍‌ସା ଅଇ ରଇଲାଇ, ଆମେ ମିସା ସେ ରକାମ୍ ଲାଲ୍‌ସା ନ ଅଇଁ । ସେଟାର୍‌ପାଇ ଏ ସବୁ ଗଟ୍‌ଲା ବିସଇ ଆମର୍‌ପାଇ ଲେକାଅଇଆଚେ । ୭ ଜେନ୍ତିକି ସେମନର ବିତ୍ତରେ ଅନି କେତେଲକ୍ ପୁଡ୍‌ଲା ପୁଜା କର୍‌ବାର୍ ଦାରଲାଇ, ତମେ ସେନ୍ତାରି ପୁଡ୍‌ଲା ପୁଜା କର୍‌ବାଟା, ଆରାମ୍ କରା ନାଇ । ସାସ୍‌ତରେ ଲେକା ଅଇଆଚେ, ଜେନ୍ତିକି ଲକ୍‌ମନ୍ ପୁଜାକଲାଟା କାଇବାକେ ବସିରଇଲାଇ ଆରି ମଦ୍ କାଇକରି ବେବିଟାର୍ କର୍‌ବାର୍ ଦାରଲାଇ । ୮ ଜେନ୍ତିକି ସେମନର ବିତ୍ତରେ କେତେଲକ୍ ବେସିଆ କାମ୍‌କରି ଗଟେକ୍ ଦିନେ କଡେ ତିନ୍ ଅଜାର୍ ଲକ୍ ପର୍ମେସରର୍ ଡଣ୍ଡ ପାଇକରି ମରିଗାଲାଇ । ସେନ୍ତାରି ଆମେ ବେସିଆ କାମ୍ ନ କରୁ । ୯ ସେନ୍ତିସେ ସେମନର ବିତ୍ତରେ କେତେଲକ୍ ମାପ୍‌ରୁକେ ପରିକା କଲାଇ ଆରି ବିସ୍ ରଇବା ସାଁପ୍ ଟକାଇ ଅଇକରି ମଲାଇ । ସେନ୍ତାରି ଆମେ ମାପ୍‌ରୁକେ ପରିକା ନ କରୁ । ୧୦ ସେମନ୍ ଜେନ୍ତିକି ପର୍ମେସରର୍ ବିରୁଦେ ତାକର୍ ତାକର୍ ବିତ୍ତରେ ଦଦାପେଲା ଅଇକରି, କୁରୁପ୍ ନାସ୍ କର୍‌ବା ଦୁତର୍‌ଲାଗି ମରିଆଜିଗାଲାଇ । ତମେ ସେନ୍ତାରି ଦଦାପେଲା ଉଆନାଇ ।

୧୧ ସବୁ ଲକ୍‌ପାଇ ଏ ସବୁ ଗଟ୍‌ନା ଗଟ୍‌ଲା । ଆରି ଆମ୍‌କେ ଚେଡ୍‌ନା ପାଇବାକେ ସେଟା ସବୁ ଲେକାଅଇଆଚେ । କାଇକେବଇଲେ ଏ ଜଗତର୍ ସାରାସାରି ବେଲା ଆସି କେଟ୍‌ଲା ଆଚେ ।

୧୨ ସେଟାର୍‌ପାଇ ଜେ ମୁଇ ନିଜେ ତାଟ୍ ଆତି ବଲି ମନେ ମନେ ଏତାଇସି, ସେ ବିସ୍‌ବାସେ ଅନି ବିନ୍‌ବାଟେ ନ ଜାଆ, ସେଟାର୍‌ପାଇ ଜାଗର୍‌ଡ୍ ରୁଆ । ୧୩ ଆମ୍‌କେ ପରିକା ଜାଇ ପରିକା ଆଇସି, ସେଟା ନୁଆ ବିସଇ ନର୍ବୁ । କାଇକେବଇଲେ ସବୁବେଲେ ଏନ୍ତାରି ଲକ୍‌ମନ୍‌କେ ପରିକା ଆଇତେରଇସି । ମାତର୍ ପର୍ମେସର୍ ତାଟ୍ କାତାଇ ତାଟ୍ ଆଚେ । ଆମ୍‌କେ ମୁର୍ଚି ନାପାର୍‌ଲା ପାରା ପରିକା

ଅଇବାକେ ସେ ନ ଦେଏ । ପରିକା ଆଇବାବେଳେ ସେ ଆମ୍ଭଙ୍କେ ବପୁ ମିସା ଦେଇସି ଆରି ତେଇ ଅନି ରକିଆ ପାଇବା ବାଟ୍ ଦେକାଇସି ।

୧୪ ସେଟାର୍ ପାଇ ଏ ମର୍ ଆଲାଦର୍ ବାଇବଇନିମନ୍, ପୁତ୍‌ଲା ପୁଜା କର୍ବା ଟାନେଅନି ଦୁରିକେ ଉଟିଜା । ୧୫ ମୁଇ ବୁଦି ରଇଲା ଲକ୍‌ମନ୍‌କେ କଇଲା ପାରା କଇଲିନି । ମୁଇ କାଇଟା କଇଲିନି ସେଟା ତମେ ବିତାର୍ କରା । ୧୬ ✨ଜେଡେବେଲେ ଆମେ ମାପ୍‌ରୁର୍ କାଦିର୍‌ପାଇ ରୁଣ୍ଡୁ, ଜନ୍ ମୁତାଇଅନି ଆମେ କାଇବୁ, ସେ ମୁତାର୍‌ପାଇ ଆମେ ପର୍‌ମେସର୍‌କେ ଦନିଅବାଦ୍ ଦେଲୁନି । ସେ ମୁତାଇଅନି କାଇଲାବେଲେ ଆମେ କିରିସର୍‌ ବନିତେଇ ମିସ୍‌ଲୁନି । ଜନ୍ ରୁଟିଆମେ ବାଙ୍ଗାଇବୁ, ସେଟା କାଇଲାବେଲେ କିରିସର୍‌ ଗାଗଡେ ମିସ୍‌ଲୁନି । ୧୭ କାଇକେବଇଲେ ରୁଟି ଗଟେକ୍ ଅଇଲେ ମିସା ଆମେ ବୁଡେକ୍ ଲକ୍ ଆତୁ । ସେ ଗଟେକ୍ ରୁଟି ଆମେ ମିସିକରି କାଇବାବେଲେ ଗଟେକ୍ ଗାଗଡୁ ଅଇଗାଲୁନି ।

୧୮ ଜିଉଦି ମନର୍ ବିସଇ ବାବିଦେକା । ଜନ୍ ଲକ୍‌ମନ୍ ପୁଜାକଲା ମାଉଁସ୍ କାଇଲାଇନି, ସେମନ୍ କାଇ ବେଦିଲଗେ ଉପାସନା କଲାବେଲେ ନ ମିସଡ ? ୧୯ ଏଟାର୍‌ପାଇ ମୁଇ କଇଲିନି ଜେ, ଦେବ୍‌ତାମନର୍ ବଲି କଲା ପର୍‌ସାଦ୍ କାଇଟା ନାଇ କି ପୁତ୍‌ଲା ବଲି କାଇଟା ନାଇ । ୨୦ ପୁତ୍‌ଲାକେ ପୁଜା କରୁମନ୍ ସେମନ୍ ଜନ୍ ଜନ୍‌ଟା ବଲି ଇସାବେ ସର୍‌ପି ଦେଲାଇନି, ସେସବୁ ପର୍‌ମେସର୍‌କେ ନ ସର୍‌ପାଇ କରି ତୁମାମନ୍‌କେ ସରପ୍‌ଲାଇନି । ସେଟାର୍‌ପାଇ, ତମେ ତୁମାମନର୍ ପୁଜାଟାନେ ମିସା ନାଇ । ୨୧ ତମେ ଜଦି ମାପ୍‌ରୁର୍ କାଦିଟାନେ ମିସିଆଗାସ୍, ସେନ୍ତାର୍‌ଆଲେ ତୁମାମନ୍‌କେ ପୁଜିରଇବା କାଦି ତମେ କାଇବାର୍ ନାଇ । ୨୨ ଜଦି ମାପ୍‌ରୁ ଆମର୍ ଉପ୍‌ରେ ରିସା ଅଇଲେ, ତାର୍ ଡଣ୍ଡେଅନି ଆମେ ରକିଆ ପାଇ ନାପାରୁ । କାଇ ମାପ୍‌ରୁର୍ ଟାନେଅନି ଆମେ ଅଦିକ୍ ବପୁ ଆରୁକି ?

୨୩ ✨ସବୁ ବିସଇ କର୍ବାକେ ଆମର୍ ଅଦିକାର୍ ଆରେ, ସେନ୍ତି ସେମନ୍ କଇବାଇ, ସେଟା ସଡ । ମାତର୍ ମୁଇ କଇଲିନି ସବୁ ବିସଇ ଆମ୍ଭଙ୍କେ ସାଇଜ ନ କରେ । ୨୪ କେ ମିସା ଅବ୍‌କା ନିଜର୍ ପାଇ କାଇଟା

✨ ୧୦:୧୭ ୧୦:୧୭ ମାଡିଉ ୨୭:୨୭-୨୮; ମାର୍‌କ ୧୪:୨୨-୨୪; ଲୁକ୍ ୨୨:୧୯,୨୦

✨ ୧୦:୨୩ ୧୦:୨୩ ଏମ କରନ୍ତଃସ୍ତ ୭:୧୨

ନିକ ଅଇସି ବଲି ଚିନ୍ତା ନ କରି, ନିଜର ବାଇମନର ମଙ୍ଗଲ ବିସଇ ମିସା ଚିନ୍ତା କରା ।

୨୫ ଆଟେ ବିକ୍ରି ଅଇବା ଜନ୍ ମାଉଁସ୍ ମିସା କାଇବାର ତମର ଅଦିକାର ଆଟେ, ତମର ବିବେକର ପାଇ ଏଟା ପୁଜା କଲାଟା କି ନାଇ ? ବଲି ନ ପାଟାରି କାଇଦିଆସ୍ । ୨୬ ଜେନ୍ତୁକି ସାସ୍ତରେ ଲେକା ଅଇଲାପାରା ଏ ଗୁଲାଇ ଜଗତେ ରଇବାଟା ମାପୁରୁଟା ।

୨୭ ଜଦି ବିସ୍ବାସ୍ ନ କଲା ଗଟେକ୍ ଲକ୍ ତମକେ ତାର ଗରେ କାଇବାକେ ଡାକ୍ଲେ, ତମେ ଜିବାକେ ମନ୍ କର୍ସା ବଇଲେ ତେଇ ତମକେ ଜାଇଟା ଦେଲେ ମିସା ସେଟା କାଇଦିଆସ୍ । ମାତର ତମର ବିବେକର ଲାଗି ଏଟା ପୁଜାକଲାଟା କି ନାଇ ? ବଲି ପାଟାରି ନାଇ । ୨୮ ମାତର କେମିସା ତମକେ ଏ କାଦି ପୁଜା କଲାଟା । ବଲି କଇଲେ, ସେଟା ନିଟା । ଜେନ୍ତୁକି ସେ କଇଲାରପାଇ ଆରି ତମର ବିବେକରପାଇ ସେଟା କାଆ ନାଇ । ୨୯ ସେଟା ତର ବିବେକର ପାଇ ନାଇ, ସେଟା କଇଲା ଲକ୍ ବିବେକର ପାଇ ।

ବାଦିଅରେ କେ ମିସା ପାଟାରି ପାରତ୍, ଜଦି ଆମର ମନ୍ କଲା ଇସାବେ କାଇଟା ମିସା କରବାକେ ଅଦିକାର ଆଟେ, ବିନ୍ ଲକ୍ ବିବେକର ଲାଗି ମୁଇ କାଇକେ ନ କାଇ ? ୩୦ ସେ କଇସି, “ଜଦି ମୁଇ ପରମେସରକେ ଦନିଅବାଦ୍ ଦେଇ କାଇବି, ତେବେ ମର ସଙ୍ଗର ବିସ୍ବାସିମନ୍ ମକେ କାଇକେ ନିନ୍ଦା ଦେବାର ଆଟେ ?”

୩୧ ତେବରପାଇ ବାଡ୍ କା, କି ପାନି କା, କି ଜାଇଟା ମିସା କରା, ପରମେସର ଡାକ୍ପୁଟା ପାଇବାକେ ସବୁ କରା । ୩୨ ଜିଉଦି ଅ କି ଜିଉଦି ନ ଅଇଲା ଲକ୍ ଅ କି ତମର ସଙ୍ଗର ପରମେସରର ମଣ୍ଡଲିର ବିସ୍ବାସି ଅ, କାକେ ମିସା ତମର ଚଲାଚଲ୍ତି ଦେକି ନିନ୍ଦା ପାଇବାକେ ଦିଆସ୍ନାଇ । ୩୩ ତମେ ମରପାରା ଚଲାଚଲ୍ତି କରା, ମୁଇ ସବୁଲକ୍ ମଙ୍ଗଲ୍ ଅ ବଲି ଚେସ୍ଟା କଲିନି । ମୁଇ ମର ନିଜର ମଙ୍ଗଲ୍ ଅ, ବଲି ଚିନ୍ତା କରିନାଇ, ମାତର ସବୁଲକ୍ ମଙ୍ଗଲ୍ ଅ ବଲି ଚିନ୍ତା କଲିନି । ଜେନ୍ତୁକି ସେମନ୍ ସବୁଲକ୍ ରକିଆ ପାଇବାଇ ।

୧୧

୧ *ମୁଇ ଜେନ୍ତାରି ମାପୁରୁ ପଟେ ପଟେ ଗାଲିନି, ତମେମନ୍ ମିସା

☆ ୧୧:୧ ୧୧:୧ ୧ମ କରନ୍ତଃ ୪:୧୭; ପିଲିପିୟ ୩:୧୭

ସେନ୍ତାରି ମର ପତେ ପତେ ଆସା ।

ଉପାସନା କଲାବେଳେ ଅତ୍ତନା

^୨ ତମେ ସବୁ ବିସଇଟାନେ ମକେ ଏତାଇଲାସନି ଆରି ମୁଇ ତମକେ ଜନ୍ ସବୁ ବିଦିବିଦାନ ସିକାଇଆଚି, ସେ ସବୁ ମାନଲାସନି, ସେଟାର ପାଇ ମୁଇ ତମକେ ଦନିଅବାଦ୍ ଦେଲିନି । ^୩ କିରିସଟ ସବୁ ମୁନୁସ ପିଲାମନର ନେତା, ଆରି ମୁନୁସ ମାଇଜିର ନେତା, ଆରି ପରମେସର କିରିସଟର ନେତା । ଏଟା ତମେ ଜାନିରୁଆ ବଲି ମୁଇ ମନ୍ କଲିନି । ^୪ ଜେଡେବେଲେ ତମେ ମଣ୍ଡଲିଡେଇ ରୁଣ୍ଡିଆ, ତେଇ ଗଟେକ୍ ମୁନୁସ ପିଲା ପାରତନା କଲାନି କି ପରମେସରର କାତା ଜାନାଇଲାନି, ସେ ତାର ମୁଣ୍ଡ ଡାବ୍‌ବାର ନାଇ । ସେନ୍ତାର କଲେ ସେ କିରିସଟକେ ଲାଜ୍ କରାଇସି । ^୫ ସେନ୍ତାରିସେ ଗଟେକ୍ ମାଇଜି ପାରତନା କଲାନି, କି ପରମେସରର କାତା ଜାନାଇଲାନି, ସେ ତାର ମୁଣ୍ଡେ ଅତ୍ତନା ପାକାଇବାର୍ ଆତେ । ସେନ୍ତାର ନ କଲେ ସେ ମୁନୁସକେ ଲାଜ୍ କରାଇସି । ସେ ଗଟେକ୍ ମୁଣ୍ଡରି ମାଇଜିର ପାରା ରଇସି । ^୬ କାଇକେବଇଲେ ସେ ମାଇଜି ଜଦି ଅତ୍ତନା ନ ପାକାଏ, ତାର୍ ଚେଣ୍ଡି କାଟିଦେବାଟା ନିକ । ଗଟେକ୍ ମାଇଜି ଜଦି ତାର୍ ଚେଣ୍ଡି କାଟ୍‌ସି କି ମୁଣ୍ଡ କୁରାଇସି, ସେଟା ତାର୍ ପାଇ ଲାଜର ବିସଇ, ସେଟାର୍‌ପାଇ ସେ ମୁଣ୍ଡେ ଅତ୍ତନା ପାକାଇବାର୍ ଆତେ । ^୭ ମାତର୍ ଗଟେକ୍ ମୁନୁସ ପିଲା ପାରତନା କଲାବେଲେ ତାର୍ ମୁଣ୍ଡେ ଅତ୍ତନା ପାକାଇବାର୍ ଦରକାର୍ ନାଇ । କାଇକେ ବଇଲେ ସେ ପରମେସରର ଚାଇ ଆରି ତାର୍ ଡାକ୍‌ପୁଟା ଦେକାଇସି । ଆରି ମାଇଜି ମୁନୁସର ଡାକ୍‌ପୁଟା ଦେକାଇସି । ^୮ କାଇକେବଇଲେ ମୁନୁସ ମାଇଜିର ଡେଇଅନି ତିଆର୍ ଅଏନାଇ, ମାତର୍ ମାଇଜି ମୁନୁସରଡେଇ ଅନି ତିଆର୍ ଅଇଆତେ । ^୯ ମନସ୍ ମାଇଜିର ପାଇ ତିଆର୍ ଅଏନାଇ । ମାତର୍ ମାଇଜି ମୁନୁସର୍ ପାଇ ତିଆର୍ ଅଇଲାଆତେ । ^{୧୦} ସେଟାର୍ ପାଇ ମାଇଜିମନ୍ ମୁଣ୍ଡେ ଅତ୍ତନା ପାକାଇବାଟା ନିକ, ଜେନ୍ତିକି ସରଗର ଦୁଡ଼ମନ୍ ମିସା ସେ ତାର୍ ମୁନୁସର୍ ଅଦିକାରେ ଆତେ ବଲି ଜାନବାଇ । ^{୧୧} ମାତର୍ ଆମେ ବିସ୍‌ବାସିମନର୍‌ପାଇ ମାଇଜି ନଇଡେ ମୁନୁସ ରଇ ନାପାରେ କି ମୁନୁସ୍ ନଇଡେ ମାଇଜି ରଇ ନାପାରେ । ^{୧୨} ମାଇଜି ମୁନୁସର୍ ଗାଗଡେ ଅନି ଜାଡ୍ ଅଇଲେମିସା, ମୁନୁସ୍ ମିସା ମାଇଜି ଜନମ୍ ଦେଲାକେ

ଜାତୁ ଅଇଆଚେ । ମାତରୁ ସବୁ ବିସଇ ପର୍ଯ୍ୟେସର୍ ଟାନେଅନି ଜାତୁ ଅଇଆଚେ ।

୧୩ କନ୍ଟା ନିକ ବଲି ତମେ ନିଜେ ନିଜେ ବିଚାର କରା । ଜଦି ଗଟେକ୍ ମାଇଜି ମଣ୍ଡଲିତେଇ ସବୁର୍ ମୁଆଟେ ମୁଣ୍ଡେ ଅଡନା ନ ପାକାଇ ପାରତନା କଲେ ସେଟା ସୁନ୍ଦର୍ କି ? ନାଇ ସୁନ୍ଦର୍ ନାଇ । ୧୪ ସେନ୍ତାରିସେ ଜଗତର ଜାନ୍ବା ବିସଇ ନେଇକରି ମୁନ୍ଦୁସ୍ ପିଲା ଜଦି ମାଇଜିମନର୍ ପାରା ଚେଣ୍ଡି ବଡାଇରଲେ ସେଟା ଲାଜର୍ କାତା । ୧୫ ମାତରୁ ମାଇଜିଟକି ଚେଣ୍ଡି ବଡାଇଲେ ତାରପାଇ ସୁନ୍ଦର୍ ବିସଇ । କାଇକେବଇଲେ ପର୍ଯ୍ୟେସର୍ ତାରୁ ଡେକ୍ ଚେଣ୍ଡି ତାରୁ ମୁଣ୍ଡେ ଡାବି ଅଇବାକେ ଦେଲା ଆଚେ । ୧୬ ଜଦି ଏ ବିସଇନେଇ କେ ମିସା ମର୍ ଆଦେସ୍ ମାନ୍ବାକେ ମନ୍ ନ କରେ, ଆମେ କି ପର୍ଯ୍ୟେସରର୍ ବିନ୍ ମଣ୍ଡଲିମନ୍କେ ମିସା ଏଟା ଚାଡି ଆରି କାଇ ଅବିଆସ୍ ନାଇ ।

ମାପୁରୁର ବଜି

୧୭ ଆରି ଗଟେକ୍ ବିସଇ ମୁଇ କଇବାରୁ ଆଚେ । ତମେ ଉପାସନା କରବାକେ ରୁଣ୍ଡିଲାବେଲେ ଗଟେକ୍ କରବା ବିସଇ ମର୍ ମନ୍କେ ଜାଏନାଇ । କାଇକେବଇଲେ ତମେ ରୁଣ୍ଡିଲାରୁ ଲାଗି ତମର୍ ବିସବାସ୍ ତାଟ୍ ଅଏନାଇ, ମାତରୁ ଦୁରବଲ୍ ପାରା ଅଇଗାଲାନି । ୧୮ ମୁଇ ସୁନିଆଟି ଜେ, ତମେ ଉପାସନା କରବାକେ ରୁଣ୍ଡିଲାବେଲେ ବାଗ୍ ବାଗ୍ ଅଇକରି ଗଟେକ୍ ବାଟର୍ ଲକ୍ ଆରି ଗଟେକ୍ ବାଟର୍ ଲକ୍କେ ବିରଦ୍ କଲାସ୍ନି ଆରି ଏଟା ସତ୍ ବଲି ମୁଇ ଜାନି । ୧୯ ତମର୍ ବିତ୍ରେ ଏନ୍ତାରି ଅଇବାଟା ନିକ । ଜେନ୍ତାରି କି ତେଇଅନି ପରିକାଟାନେ ସିଦ୍ ଅଇଲା ଲକ୍ମନ୍ ବାରଇବାଇ । ୨୦ ଜେଡେବେଲେ ତମେ ମାପୁରୁର କାଦି କାଇବାକେ ଗଟେକ୍ ଜାଗାଇ ଜମ୍ଲାସ୍ନି, ସେଟା ସତଇସେ ମାପୁରୁର କାଦି ନଏ, ୨୧ କାଇକେ ବଇଲେ, ତମର୍ ବାଇମନର୍ପାଇ କାଇଟା ଚାଡାସ୍ ନାଇ । ଏଟାପାଇ କେତେଲକ୍ ବୁକେ ଉଟିଗାଲାଇନି । ଆରି କେତେଲକ୍ ମାଡଲାଇନି । ୨୨ ତମେ କାଇବାକେ କାଇ ନିଜର୍ ଗର୍ ନାଇ କି ? ତମର୍ ଲାଗି ତମର୍ ଗରିବ୍ ବାଇମନ୍ ଲାଜ୍ ଅଇଗାଲାଇନି । ଆରି ବାକି ବିସବାସିମନ୍କେ ଇଜଡ୍ ଜିକାଇଲାସ୍ନି । ଏ ବିସଇ ଆରି ମୁଇ ତମ୍କେ କାଇଟା ବଲି କଇବି ? ଏନ୍ତାରି ଅ ବଲି କଇବି କି ? ନାଇ, ନ କଇ ।

୨୩ କାଲକେବଲଲେ ମାପୁରୁର୍ ସିକିଆ ପାଇଲି ଆତି, ସେଟାସେ ମୁଇ ତମ୍ବକେ ସିକାଇଆତି । ଜନ୍ ରାତି ଆମର୍ ମାପୁରୁ ଜିସୁ ବିସବାସେ ବିସ୍ ଦେଲାପାରା ଅଇଲା, ସେ ରୁଟିନେଇ, ପରମେସର୍ବକେ ଦନିଅବାଦ୍ ଦେଲା । ୨୪ ଏଟା ତମର୍ ପାଇ ବଲିଅଇରଇବା ମର୍ ଗାଗଡ୍, ମକେ ଏତାଇବାକେ ଏନ୍ତାର୍ କରା । ୨୫ ସେନ୍ତାରିସେ କାଇଲା ପଟେ, ସେ ମୁତା ଦାରିକରି କଇଲା “ଏ ମୁତା ପରମେସର୍ବର ନୁଆ ରାଜିନାମା, ଜନ୍ଟା କି ମର୍ ନିଜର୍ ବନି ଦେଲାକେ, ଟିକ୍ ଅଇଲା ।”

୨୬ ଆମର୍ ମାପୁରୁ ଜିସୁ ବାଅଡ୍‌ବାଜାକ, ଜେଡ୍‌କିତର୍ ରୁଟି କାଇସା କି ଏ ମୁତାଇ ଅନି ତୁକ୍‌ସା, ତମେ ମାପୁରୁର୍ ମରନ୍ ବିସଇର୍ କବର୍ ଜାନାଇସା । ୨୭ ଏଟାର୍ ଅରଡ୍ ଅଇଲାନି, ଜେ ଜଦି ମାପୁରୁକେ ସନ୍‌ମାନ୍ ନ ଦେଇ, ଏ ରୁଟି କାଇସି କି ମୁତାଇ ଅନି ତୁକ୍‌ସି, ସେ ମାପୁରୁର୍ ଗାଗଡ୍ ଆରି ବନିର୍ ବିରୁଦେ ପାପ୍ କଲାନି । ୨୮ ସେଟାର୍‌ପାଇ ତମେ ନିଜ୍‌କେ ପରିକା କରି ଦେକ୍‌ବାର୍‌ଆଟେ, ଦେକି ସାରାଇ ଏ ରୁଟି କାଇଅଇସି ଆରି ମୁତାଇଅନି ତୁକି ଅଇସି । ୨୯ କାଲକେବଲଲେ ଜଦି ସେ ରୁଟି କାଇଲାବେଲେ ଜେ ମାପୁରୁର୍ ଗାଗଡ୍ ଆରି ମୁତାଇଅନି ତୁକ୍‌ଲାବେଲେ ସଡ୍‌ବିସଇ ନ ବୁଜଡ୍, ସେମନ୍ ନିଜେ ନିଜର୍ ଉପରେ ପରମେସର୍ବର ଡଣ୍ଡ୍ ଡାକି ଆନ୍‌ଲାଇନି । ୩୦ ସେଟାର୍‌ପାଇ ତମର୍ ବିଡ୍‌ରେ ବେସି ଲକ୍ ଦୁର୍‌ବଲ୍ ଆଟାସ୍ ଆରି ବିନ୍ ବିନ୍ ଜର୍ ଦାରାଇ ଅଇଆଟାସ୍ ଆରି ମଲାସ୍‌ନି ମିସା । ୩୧ ମାତର୍ ଆମେ ଜଦି ନିଜ୍‌କେ ପରିକା କରତା ଆଲେ, ପରମେସର୍ବର ଡଣ୍ଡ୍ ଆମର୍ ଉପରେ ନ ଆଇତା । ୩୨ ମାତର୍ ଜଗତର୍ ଲକ୍‌ମନର୍ ପଟର୍ ଡଣ୍ଡ୍‌ଲଗେ ଅନି ଆମ୍‌କେ ରକିଆ କର୍‌ବାକେ ପରମେସର୍ବ ଆମ୍‌କେ ବିଚାର୍ କରି ଦେଇସି ।

୩୩ ତେବେ ଏ ମର୍ ବାଇବଇନିମନ୍, ତମେ ଆମର୍ ମାପୁରୁର୍ କାଦି କାଇବାକେ ରୁଣ୍ଡ୍‌ଲା ବେଲେ ଗଟେକ୍ ଲକ୍ ଆରି ଗଟେକ୍ ଲକ୍‌କେ ଜାଗା । ୩୪ ଜଦି କେ ବୁକେ ଆଟେ, ସେ ନିଜର୍ ଗରେ କାଇକରି ଆଇବାର୍ ଆଟେ । ଜେଡ୍‌କି ତମେ ରୁଣ୍ଡ୍‌ଲାବେଲେ ପରମେସର୍ବର ଡଣ୍ଡ୍ ତମର୍ ଉପରେ ନ ଆସେ । ଆରି ରଇଲା ବିନ୍ ବିନ୍ ବିସଇମନ୍ ମୁଇ ଆଇଲେ, ପଟେ ବୁଜାଇ ଦେବି ।

୧୨

ସୁକଲ୍ ଆତ୍ମାର ଦାନ

^୧ ମର ବାଇମନ୍, ତମେ ସୁକଲ୍ ଆତ୍ମା ଦେବା ଦାନ ବିସଇର ଜାଇଟା ଲେକିରଇଲାସ୍ ସେଟା ନିକସଙ୍ଗ୍ ବୁଜା ବଲି ମୁଇ କଲିନି । ^୨ ତମେ ଜିସୁକେ ବିସ୍ବାସ୍ କରବା ଆଗ୍ତୁ ଜିବନ୍ ନ ରଇବା ପୁଡ଼ଲାମନ୍‌କେ ପୁଜାକରି ବାଟ୍ ବାନା ଅଇଜାଇ ରଇଲାସ୍ । ^୩ ସେଟାରପାଇ ମୁଇ ଏବେ ତମ୍‌କେ କଇଲିନି, ଜନ୍ ଲକ୍ ସୁକଲ୍ ଆତ୍ମାର ଚାଲିନା ପାଇଲାଆଚେ, ସେ ଜିସୁକେ ଅବିସାପ୍ ଦେଇ ନାପାଚେ । ଆରି ଜନ୍ ଲକ୍ ତାର୍ ଆତ୍ମା ପାଏନାଇ, ସେ ଜିସୁ ପରମେସର୍ ବଲି କଇନାପାଚେ ।

^୪ ✧ ସୁକଲ୍ ଆତ୍ମାର ଦାନ ବିନ୍ ବିନ୍ ରକାମ୍, ମାତର ଜନ୍ ଆତ୍ମା ସେଟାମନ୍ ଦେଇସି ସେ ଗଟେକ୍ ସେ । ^୫ ସେବା ବିନ୍ ବିନ୍ ରକାମର୍, ମାତର ଜନ୍ ମାପରୁ ସେବା ପାଇଲାନି, ସେ ଗଟେକ୍ ସେ । ^୬ କାମ୍ କରବା ବପୁ ବିନ୍ ବିନ୍ ରକାମର୍, ମାତର ପରମେସର୍ ଗଟେକ୍ । ସେ ଆକା ସବୁକେ ବପୁ ଦେଲାନି । ^୭ ମାତର ସବୁ ଲକର୍ ମଙ୍ଗଲ୍ ପୁରାପୁରୁନ୍ ଅଇବାକେ ବିନ୍ ବିନ୍ ଲକର୍ ବିତ୍‌ରେ ସୁକଲ୍ ଆତ୍ମାର ବପୁ ବିନ୍ ବିନ୍ ଇସାବେ ଜାନାପଡ଼ସି । ^୮ ସୁକଲ୍ ଆତ୍ମା କାକେ କାକେ ବୁଦିର୍ ବାକିଅ କଇବାକେ ଦେଇସି, ଆରି କାକେ କାକେ ଗିଆନର୍ ବାକିଅ ଦେଇସି । ^୯ ସେ ଗଟେକ୍ ସୁକଲ୍ ଆତ୍ମାସେ କାକେ କାକେ ବିସ୍ବାସ୍ ଦେଇସି ଆରି କାକେ କାକେ ନିକ ଅଇବା ବପୁର ଦାନ ଦେଇସି । ^{୧୦} କାକେ କାକେ କାବାଅଇଜିବା କାମ୍ କରପାରବା ବପୁ, କାକେ କାକେ ପରମେସର୍ ଜାନାଇଲା କାତା କଇବା ବପୁ, କେତେ ଲକ୍‌କେ ଆତ୍ମା ଦେଇରଇବା ଦାନ ଚିନ୍‌ବା ବପୁ, ଆରି କେତେକ୍ ଲକ୍‌କେ ସେ ନାଜାନି ରଇବା ବିନ୍ ବିନ୍ ବାସାଇ କାତା କଇବା ବପୁ, ଆରି କେତେକ୍ ଲକ୍‌କେ ସେ ବାସାର୍ ଅରଡ୍ ବୁଜାଇବା ବପୁ ଦେଇରଇସି । ^{୧୧} ମାତର ଏ ସବୁଜାକ ବପୁ ଗଟେକ୍ ଆତ୍ମାସେ କର ରଇସି । ସେ ନିଜର୍ ମନ୍ କଲା ଇସାବେ ବିନ୍ ବିନ୍ ଲକ୍‌ମନ୍‌କେ ବିନ୍ ବିନ୍ ବିସଇର ଦାନ ଦେଇରଇସି ।

ଗଟେକ୍ ଗାଗଡ୍ ମାତର ବେସି ଆଡ଼ଗଡ୍

✧ ୧୨:୪ ୧୨:୪ ରମିୟ ୧୨:୬-୮

୧୭ ☆ ଜେଷ୍ଟିକି ବିନ୍ ବିନ୍ ବାଗ୍ ମିସିକରି ରଇଲେ ମିସା ଗାଗଡ଼ ଗଟେକ୍‌ସେ, ସେନ୍ତାରିସେ କିରିସ୍‌ଟ ଗଟେକ୍ ଗାଗଡ଼ ପାରା । ଜନ୍‌ଡେଇ କି ବିନ୍ ବାଗ୍ ମିସିଆଟଡ଼ । ୧୩ କାଇକେବଇଲେ ଆମେ ସବୁ ଜିଉଦି ଅଇଲେ କି ଜିଉଦି ନ ଅଇଲେ ମିସା, ଗତିଦାଙ୍ଗଡ଼ା ଅଇଲେ କି ନିଜର୍ ଇସାବେ ଚଲାଚଲ୍‌ତି କଲେ ମିସା ପର୍ମେସରର୍ ସେ ସମାନ୍ ଗଟେକ୍ ଆଡ଼ମାର୍ ଲାଗି, ଗଟେକ୍ ଗାଗଡ଼ ଅଇବାକେ ତୁବନ୍ ନେଇଆରୁ । ଆରି ଏ ସମାନ୍ ସୁକଲ୍ ଆଡ଼ମା ପାଇଆରୁ ।

୧୪ ଆମର୍ ଗାଗଡ଼ ବିସଇ ଆରି ଗଟେକ୍‌ତର୍ ଚିନ୍ତା କରିଦେକୁ । ସେଟାକେ ଗଟେକ୍ ବାଗ୍ ନାଇ ମାତର୍ ବେସି ବାଗ୍ ଆଟେ । ୧୫ ଜଦି ପାଦ୍, “ମୁଇ ଆଡ଼ ନଇ, ମୁଇ ଗାଗଡ଼ର୍ ନଇ ।” ବଲିକରି କଇଲେ ମିସା ପାଦ୍ ଗାଗଡ଼ର୍ ସେ । ୧୬ ସେନ୍ତସେ କାନ୍ ଜଦି, ମୁଇ ଆଁକି ନଇ, ମୁଇ ଗାଗଡ଼େ ମିସ୍‌ବାଟା ନଇ ସେନ୍ତ କଇଲେ ମିସା ଆଁକି ଗାଗଡ଼ର୍‌ଟାସେ । ୧୭ ସବୁ ଗାଗଡ଼ ଜଦି ଗଟେକ୍ ଆଁକିସେ ରଇଲେ, ତେବେ ସୁନ୍‌ବାଟା କନ୍ତି ରଇତା ? ସବୁ ଗାଗଡ଼ ଜଦି ଗଟେକ୍ କାନ୍‌ସେ ଅଇତା, ତେବେ ସୁଙ୍ଗ୍‌ବାଟା କନ୍ତି ରଇତା ? ୧୮ ମାତର୍ ଗାଗଡ଼ ସେନ୍ତାରି ନର୍ । କାଇକେବଇଲେ ପର୍ମେସର୍ ତାର୍ ନିଜର୍ ମନ୍ କଲା ଇସାବେ ଗାଗଡ଼ର୍ ସବୁ ବାଗ୍, ସମାନ୍ ଜାଗାଇ ସାଜାଡ଼ି ସଙ୍ଗାଇଆଟେ । ୧୯ ଆରି ଗାଗଡ଼କେ ଜଦି ଗଟେକ୍‌ସେ ବାଗ୍ ରଇତା, ତେବେ ଗାଗଡ଼ ବଲି କେନ୍ତି ବଲାଇ ଅଇତା ? ୨୦ ମାତର୍ ସଡ଼ ବିସଇ ଅଇଲାନ୍ତି ବେସି ବାଗ୍ ରଇଲେ ମିସା ଗାଗଡ଼ ଗଟେକ୍‌ସେ ।

୨୧ ତର୍ ଟାନେ ମର୍ କାଇ ଲଡ଼ା ନାଇ, ବଲି ଆଁକି ଆଡ଼କେ କଇନାପାରେ କି, ମୁଣ୍ଡ ପାଦ୍‌କେ କଇ ନାପାରେ । ୨୨ କାଇକେବଇଲେ ଜନ୍ ଗାଗଡ଼ର୍ ବାଗ୍ ବିନ୍‌ଟାମନର୍ ତେଇଅନ୍ତି ଦୁର୍‌ବଲ୍ ଆଟେ ବଲି ଆମେ ବାବ୍‌ଲୁନି, ସେଟାମନ୍‌ସେ ଆମ୍‌କେ ବେସି ଲଡ଼ାକେ ଆଇସି । ୨୩ ଆରି ଜନ୍ ଗାଗଡ଼ର୍ ବାଗ୍ ବେସି ମୁକିଅ ନାଇ, ଆରି ସୁନ୍‌ଦର୍ ନ ଡ଼ିସେ, ସେଟାମନ୍‌ସେ ଆମେ ନିକସଙ୍ଗ୍ ଜତନ୍ କରି ଡ଼ାବ୍‌ଲୁନି । ୨୪ ଆରି ଜନ୍ ବାଗ୍ ବାଇରେ ଅନ୍ତି ସୁନ୍‌ଦର୍ ଡ଼ିସି, ସେଟାମନ୍ ସେନ୍ତାରି ଜତନ୍ କର୍‌ବା ଦର୍‌କାର୍ ନାଇ । ପର୍ମେସର୍ ଆମର୍ ଗାଗଡ଼ର୍ ବାଗ୍‌ମନ୍‌କେ କାଇକେ ଏନ୍ତି ସାଜାଇଲା ବଇଲେ,

☆ ୧୨:୧୨ ୧୨:୧୨ ରମିୟ ୧୨:୪,୫

ଜନ୍ମଟାକି ବେସି ମୁକିଅ ନାଇ ବଲି ଆମେ ବାବ୍ଲୁନି, ସେଟାମନକେ ଆମେ ନିକସଙ୍ଗ ଜତନ୍ କରି ସନ୍ମାନ ଦେବୁ । ୨୫ ଜେନ୍ତାରି କି ଗାଗଡର୍ ବାଗ୍ ସବୁ ଗଟେକ୍ ବାଗ୍ ଆରି ଗଟେକ୍ ବାଗ୍‌କେ ବିରଦ୍ ନ କରେ, ମାତର ତାକର ତାକର ବିତରେ ସାଇଜ ଅଇବାଇ । ତେବେ ଗାଗଡର୍ ଗଟେକ୍ ବାଗ୍‌କେ ଦୁକା ଅଇଲେ, ସେଟା ସବୁରପାଇ ଦୁକା । ୨୬ ଗଟେକ୍ ବାଗ୍ ଦୁକା ଅଇଲେ, ଆରି ଅଲ୍‌ଗା ବାଗ୍‌କେ ମିସା ଦୁକା ଅଇସି । ଗଟେକ୍ ବାଗ୍ ତାକ୍‌ପୁଟା ଅଇଲେ, ସେମନ୍ ସବୁ ମିସି ସାର୍‌ଦା ଅଇବାଇ ।

୨୭ ଆମେ ଜେଡକି ଲକ୍ ବିସ୍‌ବାସି, କିରିସର୍‌ ଗାଗଡ୍ ସଙ୍ଗ୍ ସମାନ କରିଅଇସି । ଆରି ତେଇ ଆମେ ଗଟେକ୍ ଗଟେକ୍ ବାଗ୍ । ୨୮ ✨କିରିସର୍ ଏ ଗାଗ୍‌ତେ ପରମେସର୍ ବିନ୍ ବିନ୍ ଲକ୍‌ମନକେ ବିନ୍ ବିନ୍ କାମ୍ ଦେଲାଆଟେ । ପର୍‌ଡୁମ୍ ପେରିଡ୍ ଇସାବେ ବାଟ୍‌ଲା ଲକ୍, ତାର୍ ପଟେ ବବିସଡ୍ କାତା କଇବା ଲକ୍‌ମନକେ, ସିକାଉମନକେ, କାବାଅଇଜିବା କାମ୍ କରବା ଲକ୍‌କେ, ନିକ କରବା ଲକ୍‌ମନକେ, ସାଇଜ କରବା ଲକ୍‌ମନକେ, ନେତା ଇସାବେ ଦାଇଡ୍ ନେବାକେ, ଆରି ନାଜାନୁଲା ବାସାଇ କାତା କଇବା ଲକ୍‌ମନକେ ବାଟ୍‌ଲା ଆଟେ । ୨୯ ସେମନ୍ ସବୁଲକ୍ ପେରିଡ୍ ନଅଡ୍ କି ବବିସଡ୍‌ବକ୍‌ତା କି ସିକାଉମନ୍ ନଅଡ୍ । ସବୁଲକ୍‌କେ କାବା ଅଇଜିବା କାମ୍ କରବା ବପୁ ନାଇ । ୩୦ କି ନିକ କରବା ବପୁ କି ନାଜାନୁବା କାତାଇ କଇବା ବପୁ, କି ଜନ୍ମଟା କଇଲାଟା ବୁଜାଇବା ବପୁ ନାଇ । ୩୧ ତେବେ ଅଦିକ୍ ମୁକିଅ ରଇବା ବପୁ ପାଇବାକେ ଆମେ ମନ୍ କରବାର୍ ଆଟେ । ସବୁରଟାନେ ଅନି ମୁକିଅ ବପୁର୍ ବିସଇ ମୁଇ ତମ୍‌କେ ଜାନାଇବି ।

୧୩

ଆଲାଦ୍

୧ ଜଦି ମୁଇ ଲକ୍‌ମନର୍ ବାସାଇ କି ସରଗର୍ ଦୁଡ୍‌ମନର୍ ବାସାଇ କାତା ଅଇବି । ମର୍ ବାଇମନକେ ମୁଇ ଆଲାଦ୍ ନ କରି ବଇଲେ, ମର୍ କାତା ତୁଟାଇସେ, ଜେନ୍ତିକି ଗଟେକ୍ ସବଦ୍ ଅଇକରି ବାଜ୍‌ବା ଗଟା ପାରା । ୨ ✨ସେନ୍ତାରି ମକେ ମାପୁରୁର୍ ବାକିଅ ବୁଜାଇବା ବପୁ

☆ ୧୨:୨୮ ୧୨:୨୮ ଏପିସିୟ ୪:୧୧

☆ ୧୩:୨ ୧୩:୨ ମାତିଉ ୧୭:୨୦; ୨୧:୨୧; ମାର୍କ ୧୧:୨୩

ରଇଲେ ମିସା, କି ମୁଇ ସବୁ ବିସଇ ଜାନିରଇଲେ ମିସା, ଟିକି ନିକି ବିସଇ ବୁଜିରଇଲେ ମିସା ଆରି ମର୍ ବିସବାସ୍ ଏଡେକ୍ ତାଟ୍ ଆଟେ ଜେ, ତଙ୍ଗର୍ ଉଟ୍‌କାଇବା ପାରା ମର୍ ଡାଟର୍ ବିସବାସ୍ ରଇଲେ ମିସା ବାଇମନର୍ ପାଇ ଆଲାଦ୍ ନାଇ ବଇଲେ ମୁଇ ରୁଟାଇସେ । ^୩ ଜଦି ମୁଇ ମର୍ ସବୁ ଦନ୍ ସପତି ଅରକିଡ୍ ଲକ୍‌ମନ୍କେ ଦେଇରଇଲେ ମିସା, ଆରି କିରିସ୍‌ଟର୍‌ପାଇ ମର୍ ଗାଗଡ୍ ପଡାଇବାକେ ସର୍ପି ଦେଲେ ମିସା ମର୍ ଆଲାଦ୍ ନାଇ ବଇଲେ, ମର୍‌ପାଇ କାଇ ଲାବ୍ ନାଇ ।

^୪ ଆମେ ବାଇମନ୍କେ ଆଲାଦ୍ କଲେ ଦାପେ ରିସା ନ ଅଇ ଦୟା ଦେକାଇବୁ । ଆଁକାର୍ ନ ଅଇ, ବଡ୍‌ପନ୍ ନ ଅଇ ଲକ୍‌ମନ୍କେ ନିଜର୍ ତଲିଆ ନ ଦେକୁ । ^୫ ଆମେ କାରାପ୍ ବେବାର୍ ନ କରୁ, ନିଜେ ପାଇବାକେ ମନ୍ ନ କରୁ । ଦାପେ ବିର୍‌ବିରା ନ ଅଉଁ ଆରି ଆଗେ କଲା ବୁଲ୍ କାମ୍‌ମନର୍ ଇସାବ୍ ନ କରୁ । ^୬ ଆମେ ଦରମ୍ ନଇଲାଟାକେ ଦେକି ସାର୍‌ଦା ନ ଅଉଁ, ମାତର୍ ସଡ୍ ଟାନେ ସାର୍‌ଦା ଅଇବୁ । ^୭ ସବୁ ବିସବାସ୍ କର୍‌ବୁ, ସବୁଟା ଆସାକର୍‌ବୁ, ସବୁବିସଇ ମୁରଟ୍‌ବାଟା ନ ଚାଡୁ ।

^୮ ଆଲାଦ୍ କରାକରି ଅଇବାଟାର୍ ସେସ୍ ନାଇ । ପର୍‌ମେସରର୍ ବାକିଅ କଇବା ବପୁ, ଆରି ନାଜାନ୍‌ବା ବାସା କଇବା ବପୁ, ସବୁ ସାରିଜାଇସି । ସେନ୍ତାରିସେ ଆମ୍‌କେ ଗିଆନ୍ ରଇଲେ ମିସା ସେଟା ଆଜିଜାଇସି । ^୯ ମାତର୍ ଆମର୍ ଗିଆନ୍ ଏବେ ଜାକ ପୁରାପୁରୁନ୍ ଅଏ ନାଇତା । ଆରି ପର୍‌ମେସରର୍ ବାକିଅ କଇବାଟା ମିସା ଏବେ ଜାକ ପୁରାପୁରୁନ୍ ଅଏ ନାଇତା । ^{୧୦} ମାତର୍ ଜେଡେବେଲେ ଗଟେକ୍ ଦିନ୍ ଆଇସି, ଆମେ ସବୁ ନିକକରି ଜାନ୍‌ବୁ । ସେ ଦିନ୍‌ମନ୍କେ ଲକ୍‌ମନ୍ ସଙ୍ଗର୍ ବିସବାସିମନ୍କେ ସିକାଇବାକେ ଦର୍‌କାର୍ ନ ପଡେ ।

^{୧୧} ମୁଇ ଜେଡେବେଲେ ପିଲା ରଇଲି, ପିଲାମନ୍ କଇଲାପାରା କାତା ଅଇଲି ଆରି ପିଲାମନ୍ ଚିନ୍ତା କଲାପାରା ଚିନ୍ତା କର୍‌ଡେରଇଲି ଆରି ସେମନ୍ ବାବ୍‌ଲା ପାରା ବାବ୍‌ଡେରଇଲି । ମାତର୍ ମୁଇ ଏବେ ବୟସେ ବଡ୍ ଅଇଗାଲିଜେ ପିଲାମନର୍ ପାରା ଚଲାଟଲ୍‌ଡି କର୍‌ବାଟା ଚାଡିଦେଲି । ^{୧୨} ମାତର୍ ଜନ୍‌ଟା ଆମେ ଏବେ ଦେକ୍‌ଲୁନି, ସେଟା ଦର୍‌ପନେ ଦେକ୍‌ଲାପାରା ସେଡେକ୍ ନିକ ଡିସେ ନାଇ । ମାତର୍ ଗଟେକ୍ ଦିନ୍ ଆଇସି, ଜେବେ କିରିସ୍‌ଟକେ ଆମର୍ ମୁଆଟେ ଦେକ୍‌ବୁ

। ସେ ବେଳେ ଆମେ ନିକସଙ୍ଗ ଜାନ୍‌ରୁ । ଏବେ ଆମେ ଉନା ବିସଇ ଜାନ୍‌ଲୁନି, ମାତର ସେ ଦିନମନ୍‌କେ ଆମେ ପୁରାପୁରୁନ୍ ବାବେ ଜାନ୍‌ବୁ । ଜେନ୍ତାର୍ କି ପର୍‌ମେସର୍ ଆମ୍‌କେ ପୁରାପୁରୁନ୍ ବାବେ ଜାନେ ।

^{୧୩} ସାରାସାରି ତିନ୍‌ଟା ବିସଇ ଆଚେ, ପର୍‌ମେସର୍ ଟାନେ ବିସ୍‌ବାସ୍ କରବାଟା, ସେ କାତା କଇଲାଟା ଆସା କରବାଟା, ଆରି ବାଇମନର୍ ପାଇ ରଇବା ଆମର୍ ଆଲାଦ୍ । ଏ ତିନ୍‌ଟା ବିତ୍‌ରେଅନି ବାଇମନ୍‌କେ ଆଲାଦ୍ କରବାଟା ସବୁର୍‌ଟାନେଅନି ମୁକିଅ ବିସଇ ।

୧୪

ସୁକଲ୍ ଆଡ଼ମାର୍ ଦାନ୍ ଦେବାଟା

^୧ ତେବେ ବାଇମନ୍‌କେ ଆଲାଦ୍ କରବାକେ ତମର୍ ସବୁ ବପୁ ସାରାଆ । ସୁକଲ୍‌ଆଡ଼ମା ଜନ୍ ସବୁ ବପୁ ଦେଲାନି, ସେଟା ପାଇବାକେ ମିସା ମନ୍ କରା । ସେ ବିତ୍‌ରେଅନି ପର୍‌ମେସର୍‌ର ବାକିଅ ଜାନାଇବା ବପୁ ପାଇବାକେ ମନ୍ କରା । ^୨ କାଇକେବଇଲେ ଜେ ନାଜାନ୍‌ଲା ବାସା ସଙ୍ଗ୍ କାତା ଅଇସି, ସେ ଲକ୍‌ମନର୍ ସଙ୍ଗ୍ ନାଇ, ମାତର ପର୍‌ମେସର୍ ସଙ୍ଗ୍ କାତା ଅଇଲାନି । କାଇକେବଇଲେ ତାର୍ କାତା କେ ମିସା ବୁଜଡ଼ ନାଇ । ସେମନ୍ ଆଡ଼ମାର୍ ବପୁର୍ ସଙ୍ଗ୍ ଲୁଟ୍‌ତେ ରଇବା ସଡ଼ ବିସଇ କାତା ଅଇଲାଇନି । ^୩ ମାତର ଜେ ପର୍‌ମେସର୍‌ର ବାକିଅ ଜାନାଇସି, ଲକ୍‌ମନର୍ ସଙ୍ଗ୍ କାତା ଅଇସି । ଜେନ୍ତାରିକି, ସେମନ୍‌କେ ସାଇଜ, ସାର୍‌ଦା ଆରି ଦୁକ୍ ସାରାଇବାଟା ଦେଇରଇସି । ^୪ ଜେ ନାଜାନ୍‌ଲା ବାସାଇ କାତାଅଇସି, ସେଟା ତାର୍ ନିଜର୍ ବିସ୍‌ବାସ୍‌କେ ଡାଟ୍ କରାଇସି । ମାତର ଜେ କି ପର୍‌ମେସର୍‌ର ବାକିଅ ଜାନାଇସି, ସେ ଗୁଲାଇ ମଣ୍ଡଲିର୍ ବିସ୍‌ବାସ୍ ଡାଟ୍ କରାଇସି ।

^୫ ତମେ ସବୁଲକ୍ ନାଜାନ୍‌ଲା ବାସାଇ କାତା ଅଇଲେ ମୁଇ ସାର୍‌ଦା ଅଇବି । ମାତର ପର୍‌ମେସର୍‌ର ବାକିଅ ଜାନାଇବାକେ ବପୁ ଉଆ ବଲି ମୁଇ ଅଦିକ୍ ମନ୍ କଲିନି । କାଇକେବଇଲେ ପର୍‌ମେସର୍‌ର ବାକିଅ ପାଇକରି ଜାନାଇବା ଲକ୍, ନାଜାନ୍‌ବା ବାସାଇ କାତା ଅଇବା ଲକର୍ ଟାନେଅନି ମୁକିଅ । ଜଦି ମଣ୍ଡଲିର୍ କେ ମିସା ସେ କଇଲା ବିସଇର୍ ଅରଡ଼ ନ ବୁଜାଇବାଜାକ ଗୁଲାଇ ମଣ୍ଡଲି ସାଇଜ ନଏ । ^୬ ତେବେ ଏ ବାଇବଇନିମନ୍ ମୁଇ ତମର୍‌ଟାନେ ଆଇଲାବେଲେ, ଜଦି ନାଜାନ୍‌ଲା ବାସାଇ କାତା କଇଲେ, ତମ୍‌କେ କେନ୍ତ୍ର ଡାଟ୍ କରାଇବି ?

ମୁଲକେ ନାଲ, ଜଦି ମୁଲ ପରମେସର୍ ଟାନେଅନି ପାଇଲା ବାକିଅ, କି ଗିଆନ୍, କି ବବିସତ୍ କାତା ସିକ୍‌ବା ବିସଇ ନ ଜାନାଇଲେ, ତେବେ ତମକେ କେନ୍ତୁ ଡାଟ୍ କରାଇବି ?

୭ ସେନ୍ତାରିସେ ବାଉଁସି ଆରି ହୁଡୁଙ୍ଗା ପାରା ଜିବନ୍ ନ ରଇବା ବାଇଦ୍ ବିସଇ ବାବିଦେକୁ, ସେଟା ଜଦି ବାଜନ୍‌ତେଇ ବିନ୍ ସର୍ ନ ରଇଲେ, ସେଟା ବାଜଲାନି ବଲିକରି ଜାନି ନଏ ।

୮ ସେନ୍ତାରିସେ ସନିଅମନ୍ ଜନ୍ ବାଁକା ବାଜାଇବାଇ, ଜଦି ତାର୍ ସବଦ୍ ଟିକ୍ ନାଲ, ଜୁଇଦେ ଜିବାଜେ କେ ମିସା ଜାଗରତ୍ ନ ଅଥତ୍ । ୯ ସେନ୍ତାରିସେ ନ ବୁଜ୍‌ବା କାତା କଇଲେ, ତମେ କାଇଟା କାତା ଅଇଲାସନି ବଲି କେ ବୁଜି ନାପାରତ୍ । ତମର୍ କାତା ପବନ୍ ଉତାଇନେଲା ପାରା ଅଇସି । ୧୦ ଏ ଜଗତେ କେତେକ୍ କେତେକ୍ ବାସା ଆଟେ । ଆରି ସେଟାର୍ ସବୁର୍ ଅରତ୍ ଆଟେ । ୧୧ ମାତର୍ କାତାଅଇରଇବା ବାସା ଜଦି ମୁଲ ବୁଜି ନାପାରଲିନି, ସେ ବାସାଇ କାତା ଅଇବା ଲକ୍‌ମନ୍ ମର୍ ଅଚିନାର୍ ଲକ୍ ପାରା, ମୁଲ ମିସା ସେମନର୍‌ପାଇ ଅଚିନାର୍ ପାରା । ୧୨ ତେବେ ତମେ ଜେନ୍ତାରିକି ସୁକଲ୍ ଆଡ୍‌ମାର୍ ବିନ୍ ବିନ୍ ରକାମର୍ ଦାନ୍ ପାଇବାକେ ମନ୍ କଲାସନି, ସେ ସବୁର୍ ଟାନେଅନି ଜନ୍ ସବୁ ଦାନ୍ ତମର୍ ମଣ୍ଡଲିକେ ଡାଟ୍ କରାଇସି, ସେ ଦାନ୍ ବାଇବାକେ ଚେସ୍‌ଟା କରା ।

୧୩ ତେବେ ଜେ ନାଜାନଲା ବାସାଇ କାତା ଅଇସି, ସେ କାତା ଅଇଲାଟା ବୁଜାଇବା ଦାନ୍ ମିଲ ବଲି ପାର୍‌ତନା କର । ୧୪ କାଇକେବଇଲେ ମୁଲ ଜଦି ନାଜାନ୍‌ବା ବାସାଇ ପାର୍‌ତନା କର୍‌ବି, ମର୍ ଆଡ୍‌ମା ପାର୍‌ତନା କଲାନି । ମାତର୍ ମର୍ ବୁଜ୍‌ବାର୍ ବପୁ ତେଇ ମିସେନାଇ । ୧୫ ତେବେ ମୁଲ କାଇଟା କର୍‌ବି ? ମର୍ ଆଡ୍‌ମାଇ ପାର୍‌ତନା କର୍‌ବି, ମାତର୍ ବୁଜ୍‌ଲା ପାରା ମିସା ପାର୍‌ତନା କର୍‌ବି । ମର୍ ଆଡ୍‌ମାଇ ଗିତ୍ କଇବି । ମାତର୍ ବୁଜ୍‌ଲାପାରା ମିସା ଗିତ୍ କଇବି । ୧୬ କାଇକେବଇଲେ ପରମେସର୍‌କେ ଆଡ୍‌ମାଇସେ ଦନିଅବାଦ୍ ଦେଇସା, ସବାଇ ରଇଲା ମାମୁଲି ଲକ୍‌ମନ୍ ତମର୍ ପାର୍‌ତନା ସୁନିକରି, କେ ଆମେନ୍ ବଲି କଇପାର୍‌ବାଇ ? ନାଇ ନା ପାରେ । କାଇକେବଇଲେ ତମେ କାଇଟା କଇଲାସନି, ସେଟା ସେ ନାଜାନେ । ୧୭ ତେବେ ପରମେସରର୍ ଟାନେ ତମର୍ ଦନିଅବାଦ୍ ଦେବାଟା

ବେସି ନିକ ରଇଲେ ମିସା ତମର୍ ବିନ୍ ବାଇମନ୍‌କେ ଡାଟ୍ କରାଇ ନାପାରୁଲାସ୍ ।

^{୧୮} ମୁଇ ପରମେସରକେ ଦନିଅବାଦ୍ ଦେଲିନି, ମୁଇ ତମର୍ ସବୁରଟାନେଅନି ଅଦିକ୍, ନାଜାନୁଲା ବାସାଇ କାତା କଇପାରି । ^{୧୯} ମାତର୍ ମଣ୍ଡଲିର୍ ଉପାସନା ବେଲାଇ, ନାଜାନୁଲା ବାସାଇ ଅଜାର୍ ଅଜାର୍ ପଦ୍ ନ କଇକରି ସବୁଲକ୍ ବୁଢ଼ଲା ପାରା ପାଁଟା ପଦ୍ କଇବାଟା ନିକ ।

^{୨୦} ଏ ବାଇବଇନିମନ୍ ତମେ ପିଲାମନର୍ ପାରା ଚିନ୍ତା କରାନାଇ । କାରାପ୍ ବିସଇତେଇ ପିଲାପାରା ଉଆ । ମାତର୍ ବୁଦି ଆରି ବିଚାର୍ କରବାତେଇ ବଡ଼ ଲକର୍ ପାରା ଅଇବାର୍ ଦରକାର୍ । ^{୨୧} ସାସ୍ତରେ ଲେକାଆରେ,

ମାପୁରୁ କଇଲାନି, ବିନ୍ ବାସା କଇବା ଲକ୍‌ମନର୍ ବାଟେଅନି

ଏ ଲକର୍ ସଙ୍ଗ୍ ମୁଇ କାତା ଅଇବି ।

ନାଜାନୁବା ବାସା କଇବା ଲକର୍ ଟଣ୍ଡେଅନି

ମୁଇ ଏ ଜାତିସଙ୍ଗ୍ କାତା ଅଇବି,

ଏଲେ ମିସା ସେମନ୍ ମର୍ କାତା ନ ସୁନଡ଼ ।

^{୨୨} ନାଜାନୁବା ବାସା କାତା ଅଇବା ବପୁ, ବିସ୍‌ବାସ୍ ନ କଲା ଲକ୍‌ମନର୍ ପାଇ ଗଟେକ୍ ଚିନ୍ ପାରା । ମାତର୍ ବିସ୍‌ବାସିମନର୍‌ପାଇ ନାଇ । ଆରି ପରମେସରର୍ ବାକିଅ ଜାନାଇବା ବପୁ ବିସ୍‌ବାସି ମନର୍‌ପାଇ ଗଟେକ୍ ଚିନ୍, ଆରି ବିସ୍‌ବାସ୍ ନ କରବା ଲକ୍‌ମନର୍ ପାଇ ନାଇ ।

^{୨୩} ତେବେ ତମେ ମଣ୍ଡଲି ଇସାବେ ରୁଣ୍ଡୁଲା ବେଲେ ନାଜାନୁଲା କାତା କଇସା ବଇଲେ, ତେଇରଇବା ବିନ୍ ଲକ୍‌ମନ୍ ଆରି ବିସ୍‌ବାସ୍ ନ କରବା ଲକ୍‌ମନ୍ କାଇଟା ବଲି କଇବାଇ ? “ଏ ତା ବାୟା ଅଇଗାଲା ଆରେ !” ^{୨୪} ଜଦି ସବୁଲକ୍ ପରମେସର୍ ଜାନାଇଲା କାତା କଇଲାସ୍‌ନି, ଜଦି ତେଇ ଗଟେକ୍ ବିସ୍‌ବାସ୍ ନ କଲା ଲକ୍ କି ଗଟେକ୍ ମାମୁଲି ଲକ୍ ଆଇଲେ, ତେବେ ସେ ନିଜର୍ ପାପର୍ ବିସଇର୍ ଚେଡ଼ନା ପାଇସି । ଆରି ସେ ସୁନ୍‌ଲା ସବୁ ବିସଇର୍ କାତାଇଅନି ତାକେ ବିଚାର୍ ଅଇସି । ^{୨୫} ଆରି ତାର୍ ମନେ ଲୁଚି ରଇବା ବିସଇ ସବୁ ଜାନାପଡ଼ସି । ପଚେ ସେ ପରମେସରକେ ଡାଣ୍ଡାସନ୍ ପଡ଼ି, ତାର୍ କରିରଇବା ପାପ୍ ମାନିଅଇକରି “ତମର୍ ବିତ୍‌ରେ ସତଇସେ ପରମେସର୍ ଆରେ !” ବଲି କଇସି ।

ମଣ୍ଡଲି ସାନ୍ତି ରକିଆ କରବାଟା

୨୭ ଏ ବାଲବଇନିମନ୍, ମର୍ କଇବା କାତା ଅଇଲାନି, ତମେ ଉପାସନା କରବାକେ ରୁଣ୍ଡୁଲା ବେଲାଇ ଏନ୍ତାରି କରା । ତମର୍ ବିତ୍ରେଅନି କାକେ କାକେ ଗିଡ୍ ଆଚେ, କାକେ କାକେ, ସିକିଆ ଦେବାଟା ଆଚେ, ଆରି କାକେ କାକେ ପର୍ମେସରର୍ ଟାନେ ଅନି କାତା ପାଇ, ସେଟା ଜାନାଇବାଟା ଆଚେ, କି ନାଜାନୁଲା ବାସାଇ କାତା କଇବାଟା ଆଚେ, ଆରି କାକେ କାକେ ନାଜାନୁଲା ବାସାଇ କଇଲା କାତାର୍ ଅରଡ୍ ବୁଜାଇବା ବପୁ ଆଚେ, ଏନ୍ତି କାଇଟା ନଇଲେ କାଇଟା ଆଚେ । ଏଟା ସବୁ ଅଇସି, ତେବେ ମଣ୍ଡଲିର୍ ବିସ୍ବାସି ମନର୍ ବିସ୍ବାସ୍ ଡାଁର୍ ଅଇସି । ୨୭ ଜଦି କେ ନାଜାନୁଲା ବାସାଇ କାତା ଅଇଲେ, ଦୁଇ ତିନ୍ ଲକର୍ ତେଇଅନି ଅଦିକ୍ ଲକ୍ ନ କଅଡ୍ । ଆରି ଗଟେକ୍ ଲକର୍ ପଚେ ଗଟେକ୍ ଲକ୍ କଇବାର୍ ଆଚେ । ଆରି ସେ କାତା ବୁଜାଇ ଦେବା ଲକ୍ ମିସା ତେଇ ରଇବାର୍ ଆଚେ । ୨୮ ଜଦି ସେଟା ବୁଜାଇବାକେ ତେଇ କେ ନାଇ, ସେ ଉପାସନାଇ ବୁଝ୍ ଅଇ ରଅ । ସେ ଅଦକା ମନେ ମନେ ପର୍ମେସରର୍ ସଙ୍ଗ୍ କାତା ଅ । ୨୯ ଜଦି ପର୍ମେସରର୍ଟାନେଅନି କାତା ପାଇ, ଜାନାଇବା ଲକ୍ ଆଚଡ୍, ତେବେ ଦୁଇ ଲକ୍ କି ତିନ୍ ଲକ୍ ରଇବାର୍ । ସେ ବେଲାଇ ତେଇ ରଇଲା ଲକ୍ମନ୍ ସେ ବାକିଅ ବିଚାର୍ କରବାର୍ ଆଚେ । ୩୦ ମାତର୍ ଉପାସନାତେଇ ରଇବା ଜଦି କାକେ ଅଟାଡ୍ ପର୍ମେସରର୍ ଟାନେ ଅନି କାତା ପାଇସି, ତେବେ ବାକିଅ କଇତେରଇବା ଲକ୍ ତେଇ ବନ୍ଦ୍ କରିରଇବାର୍ ଆଚେ । ୩୧ କାଇକେବଇଲେ ତମେ ଏନ୍ତାରି କଲେ ପର୍ମେସରର୍ ବାକିଅ, ଗଟେକ୍ ଲକର୍ ପଚେ ଗଟେକ୍ ଲକ୍, କଇ ପାରାସ୍ । ଜେନ୍ତିକି ସବୁଲକ୍ ସିକିଆ ପାଇକରି ଚେଡ୍ନା ଅଇବାଇ । ୩୨ ମାତର୍ ପର୍ମେସରର୍ ବାକିଅ ଜାନାଇବା ଦାନ୍, ଜାନାଇବା ଲକର୍ ତଲିଆ ରଇବା ଦରକାର୍ । ୩୩ କାଇକେବଇଲେ ପର୍ମେସର୍ ଆଗାପଟା ନ ଅଇକରି ସବୁ ବିସଇ ଅର୍ସା ସଙ୍ଗ୍ ଅ, ବଲି ମନ୍ କଲାନି ।

ପର୍ମେସରର୍ ବିନ୍ ଉପାସନା ମଣ୍ଡଲିତେଇ ଜେନ୍ତାରି, ୩୪ ତମେ ମଣ୍ଡଲି ଇସାବେ ରୁଣ୍ଡୁଲା ବେଲେ, ମାଇଜିମନ୍ ବୁଝ୍ଟାପୁ ଅଇରଇବାର୍ ଆଚେ । ତେଇ ସେମନ୍ କାତା କଇବାକେ ସେମନ୍କେ ଆଦେସ୍ ମିଲେନାଇ । ଜିଉଦି ନିୟମ୍ ଇସାବେ ସେମନ୍ ମନସ୍

ପିଲାଟୁ ତଲିଆ ରଇବାରୁ ଆଚେ । ୩୫ ସେମନ୍ ଜଦି କାଇ ବିସଇ ବୁଜ୍‌ବାକେ ମନ୍ କଲାଇନି, ଗରେ ଜାଇ କରି ନିଜର୍ ମୁନ୍‌ସୁକେ ପାଚାର । କାଇକେବଇଲେ ମଣ୍ଡୁଲିଗାନେ କାତା କଇବାଟା ମାଇଜିମନର୍ ପାଇ ଗଟେକ୍ ଲାଜର୍ କାତା ।

୩୬ କାଇଟା ? ପର୍ମେସରର୍ ବାକିଅ ତମର୍ ଚାନେଅନି ଜାତ୍ ଅଇଲା ଆଚେ କି ? ସେ ବାକିଅ କାଇ ତମର୍‌ଟାନେସେ ଆସିରଇଲା କି ? ନାଇ ଆସି ନ ରଇଲା । ୩୭ କେ ଜଦି ତମର୍ ବିତ୍‌ରେ ପର୍ମେସରର୍ ବାକିଅ ଜାନାଇବା ଲକ୍ କି ସୁକଲ୍ ଆତ୍‌ମା ଅନି ଦାନ୍ ପାଇଲିଆତି ବଲି ବାସି, ସେନ୍ତିଆଲେ ମୁଇ ତମ୍‌କେ ଜାଇ ଜାଇଟା ଲେକ୍‌ଲିନି, ସେ ସବୁ ଜେ ମାପୁରୁର୍ ଆଦେସ, ଏଟା ସେ ଜାନବାରୁ ଆଚେ । ୩୮ ଜଦି ସେ ଏ ସବୁ କାତା ନ ସୁନେ କି ନ ମାନେ, ତମେ ମିସା ତାର୍ କାତା ସୁନା ନାଇ କି ମାନା ନାଇ ।

୩୯ ସେଟାର୍‌ପାଇ ଏ ବାଇବଇନିମନ୍ ପର୍ମେସରର୍ କାତା ଜାନାଇବାକେ ମନ୍ କରା, ମାତର୍ ନ ବୁଜ୍‌ବା ବାସାଇ କାତା କଇବାକେ କାକେ ନିରୁ ବଲି କୁଆନାଇ । ୪୦ ତମର୍ ସବୁ କାମ୍ ଟିକ୍ ବାବେ ଆରି ଅର୍‌ସା ସଙ୍ଗ୍ କର୍‌ବାର୍ ଦର୍‌କାର୍ ।

୧୫

କିରିସ୍‌ଟ ଆରିତରେକ୍ ଉଟ୍‌ଲାଟା

୧ ଏ ବାଇବଇନିମନ୍, ମୁଇ ତମର୍ ଲଗେ ଜନ୍ ସୁବ୍‌କବର୍ ଜାନାଇରଇଲି ସେଟା ତମ୍‌କେ ଏତାଇଦେବି ବଲି ମନ୍ କଲିନି । ସେଟା ତମେ ମାନି ରଇଲାସ୍ ଆରି ତେଇସେ ତମର୍ ବିସ୍‌ବାସ୍ ଡାଟ୍ ଆଚେ । ୨ ଜଦି ଏ ସୁସମାଚାର୍ ତମେ ତାଟ୍ ସଙ୍ଗ୍ ଦାରିରଇସା, ତେବେ ଉଦାର୍ ପାଇସା, ନଇଲେ ତମେ ବେକାର୍ ବିସ୍‌ବାସି ଅଇ ଆଚାସ୍ ।

୩ କାଇକେବଇଲେ ଜନ୍ ସିକିଆ ମୁଇ ପାଇରଇଲି, ତେଇଅନି ଏ ବଡ୍ ସିକିଆ ତମ୍‌କେ ସିକାଇ ରଇଲି । ସାସ୍‌ତର୍ ଇସାବେ କିରିସ୍‌ଟ ଆମର୍ ପାପ୍ କେମା ଅଇବାକେ ମରିଗାଲା । ୪ ତାକେ ତପିରଇଲାଇଜେ, ସାସ୍‌ତର୍ ଇସାବେ ତିନ୍‌ଦିନ୍ ନ ଅଇତେ ତାକେ ପର୍ମେସର୍ ଜିବନ୍ କରି ଉଟାଇଲା । ୫ ସେ ପିତର୍ ଆରି ତାର୍

☆ ୧୫:୪ ୧୫:୪ ମାତିଉ ୧୨:୪୦; ପେରିଡ୍ ୨:୨୪-୩୨ ☆ ୧୫:୫ ୧୫:୫ ଲୁକ୍ ୨୪:୩୪; ମାତିଉ ୨୮:୧୬,୧୭; ମାର୍କ ୧୬:୧୪; ଲୁକ୍ ୨୪:୩୬; ଜଅନ୍ ୨୦:୧୯

ବାର୍ତ୍ତା ପେରିଡ଼ ସିସ୍ତମନ୍‌କେ ଦର୍ସନ୍‌ଦେଲା । ୬ ତାର ପଚେ
ତର ସଙ୍ଗ୍ ଜାଇତେରଇବା ଏକାତର ପାଁସ୍‌ଅ ଲଗେଅନି ଅଦିକ୍
ବାଇମନ୍‌କେ ଦର୍ସନ୍‌ ଦେଲା । ସେମନ୍‌ର ବିଡ଼ରେ ଅନି କେତେଲକ୍
ମରିଗାଲାଇ ଆରି ବେସି ଲକ୍ ଆଜିକେ ଜାକ ଜିବନ୍ ଆଚଡ଼ ।
୭ ତାରପଚେ ସେ ଜାକୁବ୍‌କେ ଆରି ସବୁ ପେରିଡ଼ମନ୍‌କେ ଦର୍ସନ୍‌
ଦେଲା ।

୮ ✨ସେ ଦର୍ସନ୍‌ ଦେଲା ଲକ୍‌ମନ୍‌ର ବିଡ଼ରେ ସାରାସାରି ମୁଇ
ରଇଲି । ସବୁର ପଚେ, ଦିନ୍ ନ କେଟ୍‌ତେ, ଜନମ୍ ଅଇଲା ପିଲା
ପାରା ମକେ ମିସା ଦର୍ସନ୍‌ ଦେଲା । ୯ ✨ସବୁ ପେରିଡ଼ ସିସ୍ତମନ୍‌
ବିଡ଼ରେ ଅନି ମୁଇସେ ସାନ୍ । ପେରିଡ଼ ବଲି ଡାକାଇ ଅଇବାକେ
ମର୍ ଅଦିକାର ନାଇ । କାଇକେବଇଲେ ପର୍‌ମେସରର୍ ମଣ୍ଡଲିର୍
ବିସ୍‌ବାସିମନ୍‌କେ ମୁଇ କସ୍‌ଟ ଦେଇତେ ରଇଲି । ୧୦ ଅଇଲେ ମିସା,
ପର୍‌ମେସରର୍ ଜିବନ୍ ଦୁକାଇଲାଟାନେଅନି ମୁଇ ଏବେ ଏନ୍ତାରି ଆତି
। ତାର ଜିବନ୍ ଦୁକାଇଲାଟା ମକେ ଦାରି ଆଚେ ବଲି ଜାନା ପଡ଼ଲାନି
। କାଇକେବଇଲେ ମର୍ ସଙ୍ଗ୍‌ର ପେରିଡ଼ ମନ୍‌ଟାନେଅନି ମୁଇ
ଅଦିକ୍ କାମ୍ କରିଆତି । ମାତର ସେଟା ମର୍ ନିଜର୍ ବସୁସଙ୍ଗ୍ ନାଇ,
ପର୍‌ମେସର ଜିବନ୍ ଦୁକାଇ ମକେ ସାଇଜ କଲା । ୧୧ ଅଇଲେ ମିସା
ମୁଇ ସୁବକବର୍ ଜାନାଇଲେ କି ସେମନ୍ ଜାନାଇଲେ ମିସା କିଟି
ବିନ୍ ନାଇ । କାଇକେବଇଲେ ଆମେ ସବୁ ଜାନାଇବାଟା ଗଟେକ୍
ବିସ୍‌ଇସେ । ସେଟା ତମେ ବିସ୍‌ବାସ୍ କରିଆଟାସ୍ ।

ଆମେ ଆରିତରେକ୍ ଉଟ୍‌ବା ବିସ୍‌ଇ

୧୨ ଜଦି କିରିସ୍‌ଟକେ ପର୍‌ମେସର ମଲାତେଇଅନି ଜିବନ୍ କରି
ଉଟାଇଆଚେ ବଲି ଆମେ ସିକାଇଲୁନି, ତେବେ କାଇକେ ତମର୍
ବିଡ଼ରେ କେତେଲକ୍, ମଲା ଲକ୍‌ମନ୍‌ର, ଆରି ତରେକ୍ ଜିବନ୍
ଅଇବାଟା ନଏଁ, ବଲି କଇଲାସ୍‌ନି ? ୧୩ ମଲା ଲକ୍‌ମନ୍ ଆରିତରେକ୍
ଜିବନ୍ ନ ଅଇବାଟା ଜଦି ସଡ଼, ତେବେ କିରିସ୍‌ଟକେ ମିସା ଜିବନ୍
କରାଇ ଉଟାଏ ନାଇ । ୧୪ ଆରି, ଜଦି କିରିସ୍‌ଟକେ ମଲାତେଇ
ଅନି ଉଟାଏ ନାଇ, ତେବେ ଆମେ ଜାନାଇବାଟା ରୁଚାଇସେ, ତମେ
ବିସ୍‌ବାସ୍ କରବାଟା ମିସା ରୁଚାଇସେ । ୧୫ ସେଡ଼କିସେ ନଏଁ,

✨ ୧୫:୮ ୧୫:୮ ପେରିଡ଼ ୯:୩-୬ ✨ ୧୫:୯ ୧୫:୯ ପେରିଡ଼ ୮:୩

ଆମେ ପରମେସରର ବିସଇର୍ ମିର୍ ସାକି ଦେଇତେରଇଲୁ ବଲି ଜାନାପଡ଼ସି । କାଇକେବଇଲେ ଆମେ କିରିସ୍ଟକେ ଜିବନ୍ କରାଇ ଉଟାଇ ଆତେ ବଲି କଇରଇଲୁ । ମାତର୍ ମଲାଲକ୍ ଜିବନ୍ ଅଇ ନ ଉଟଡ଼, ସେଟା ଜଦି ସଡ଼, ସେନ୍ତାରିଆଲେ ପରମେସର୍ କିରିସ୍ଟକେ ଜିବନ୍ କରାଇ ଉଟାଏ ନାଇ । ^{୧୭} ଜଦି ମଲା ଲକ୍ମନ୍‌କେ ନ ଉଟାଏ, ତେବେ, କିରିସ୍ଟକେ ମିସା ଉଟାଏ ନାଇ । ^{୧୭} ଜଦି କିରିସ୍ଟକେ ଉଟାଏ ନାଇ, ତେବେ ତମର୍ ବିସ୍ବାସ୍ କରବାଟା ତୁଚାଇସେ । ଆରି ତମେ ଏବେ ଜାକ ନିଜର୍ ନିଜର୍ ପାପେ ଆଟାସ୍ । ^{୧୮} ସେନ୍ତାରିସେ ଜନ୍ ଲକ୍ କିରିସ୍ଟକେ ବିସ୍ବାସ୍ କରି ମରିଗାଲାଇ ଆତଡ଼, ସେମନ୍ ରକିଆ ଅଅଡ଼ ନାଇ, ମାତର୍ ନସ୍ଟ ଅଇଆତଡ଼ । ^{୧୯} ଜଦି କିରିସ୍ଟର୍ ଟାନେ ଆମର୍ ଆସା କରିରଇବାଟା ଏ ଜଗତର୍ ଜିବନ୍ ସଙ୍ଗ୍ ସାରସି, ତେବେ ସବୁଲକର୍ ତେଇଅନି ଆମର୍ କେଡେକ୍ କାକୁର୍ତିର୍ କରମ୍ ।

^{୨୦} ମାତର୍ କିରିସ୍ଟକେ ମଲାତେଇଅନି ଉଟାଇଆତେ, ଏଟା ଅଇଲାନି ସଡ଼ ଆରି ଏନ୍ତାରିସେ ସବୁ ମଲା ଲକ୍ମନ୍‌କେ ପରମେସର୍ ଜିବନ୍ କରି ଉଟାଇସି, ଏଟା ଆମେ ଜାନ୍ତୁ । ^{୨୧} କାଇକେବଇଲେ ଗଟେକ୍ ଲକର୍ ଲାଗି ଗୁଲାଇ ଲକ୍ ମର୍ବାଟାଆତେ । ସେନ୍ତାରିସେ ଗଟେକ୍ ଲକର୍ ଲାଗି ଗୁଲାଇ ଲକ୍‌କେ ମଲାତେଇଅନି ଉଟାଅଇସି । ^{୨୨} ଜେନ୍ତି ଆଦମର୍ ବସେଅନି ଆଇଲା ଲକ୍ମନ୍ ମର୍ବାଇ, ସେନ୍ତାରିସେ କିରିସ୍ଟର୍ତେଇ ରଇଲା ସବୁଲକ୍ ଜିବନ୍ ଅଇ ଉଟବାଇ । ^{୨୩} ମାତର୍ ଗଟେକ୍ ଗଟେକ୍ ଲକ୍ ଆଗାପଟା ଇସାବେ ଉଟବାଇ । ପର୍ତୁମ୍ କିରିସ୍ଟ ତାରପତେ ସେ ଆଇବା ଦିନେ ଜେଡ଼କି ଲକ୍ ସବୁ ତାରଲଗେ ରଇଲାଇ । ^{୨୪} ତାରପତେ ଜୁଗର୍ ସାରାସାରି ଦିନ୍ କେଟସି । ସେଡ଼କିବେଲେ ସବୁ ସାସନ୍‌କାରିଆମନ୍‌କେ, ଅଦିକାର୍ ଆରି ବପ୍ତୁ ରଇଲା ଲକ୍ମନ୍‌କେ ସେ ଆରାଇସି ଆରି ବାବା ପରମେସର୍‌କେ ସେ ରାଇଜ୍ ସର୍ପି ଦେଇସି । ^{୨୫} କାଇକେବଇଲେ ପରମେସର୍ ତାର୍ ସବୁ ସଡ଼ୁମନ୍‌କେ ଆରାଇ, ତାର୍ ପାଦ୍‌ତଲେ ଆନ୍‌ବାଜାକ କିରିସ୍ଟ ସାସନ୍ କର୍ବାଟ୍ ଆତେ । ^{୨୬} ସାରାସାରି ପତେ ସଡ଼ୁମନ୍ ମିସା ଆରିଜିବାଇ । ^{୨୭} ଜେନ୍ତି କି ସାସ୍ତରେ ଲେକା ଅଇଲାଆତେ, ପରମେସର୍ ସବୁ ବିସଇ ତାର୍ ପାଦ୍‌ତଲେ ସଙ୍ଗ୍‌ଆତେ । ସବୁ ବିସଇ ବଲି, କଇବା ବେଲେ ତାର୍ ଅରଡ଼

ଅଇଲାନି, ପରମେସ୍ୱରକେ ଚାଡ଼ି ସବୁ ବିସଇ । ସେ ଆକା ସବୁ ବିସଇ କିରିସ୍ତର୍ ତଲିଆ କରି ସଙ୍ଗିଆତେ । ୨୮ ସବୁ ବିସଇ କିରିସ୍ତର୍ ତଲେ ସଙ୍ଗିଆତେ, ନିଜେ କିରିସ୍ତର୍ ଜେ କି ପଅ, ସେ ପରମେସ୍ୱର ତଲିଆ ଅଇ ରଇସି । ସବୁ ବିସଇ ପରମେସ୍ୱର ତାର ତଲିଆ କରି ସଙ୍ଗିଆତେ ଆରି ପରମେସ୍ୱର ପୁରାପୁରୁନ୍ ସବୁର ଉପରେ ସାସନ୍ କରସି ।

୨୯ ମଲାଲକ୍ତକେ ଆରିତରେକ୍ ନ ଉଟାଏ, ଜଦି ଏଟା କେନ୍ତାର୍ ଜେ ମଲା ଲକ୍ତମନର୍ ପାଇ ତାର୍ ମଇତର୍ମନ୍ ଡୁବନ୍ ନେଲାଇନି ? ତେବେ ସେମନକେ କାଇଟା ମିଲସି ? ଜଦି ମଲାଲକ୍ତମନକେ ନ ଉଟାଅଡ଼, ସେନ୍ତାର୍ ଆଲେ କାଇକେ ଏମନ୍ ମଲା ଲକ୍ତମନର୍ପାଇ ଡୁବନ୍ ନେଲାଇନି ? ୩୦ ଆରି ଆମେ ମିସା କାଇକେ ସବୁ ବେଲେ ଆମର୍ ଜିବନ୍ ବିପଦେ ପାକାଇତେ ରଇବୁ ? ୩୧ ଏ ମର୍ ବାଇବଇନିମନ୍ ଦିନକେ ଦିନ୍, ଲକ୍ତମନ୍ ମକେ ମରାଇବାକେ ଚେସ୍ଟା କଲାଇନି । ମୁଇ ଏଟା କାଇକେ କଇଲିନି ବଇଲେ, ତମର୍ଟାନେ ମର୍ ଜନ୍ ବଡ଼ପନ୍ ଆତେ, ଆରି ଆମର୍ ମାପୁରୁ ଜିସୁକିରିସ୍ତର୍ ଟାନେ ଆମର୍ ଜିବନ୍ ମିସିରଇଲାଜେ ମୁଇ କଇଲିନି । ୩୨ ଏପିସି ସଅରେ ମୁଇ ବେସି କସ୍ତ ପାଇଲି । କାଇକେବଇଲେ ଜନ୍ ଲକ୍ତମନ୍ ମକେ ବିରଦ୍ କଲାଇ, ସେମନର୍ ସଙ୍ଗି ତଙ୍ଗରେ ରଇବା ପସୁମନର୍ ପାରା ଜୁଜିରଇଲି । ତେଇ ଆମେ ଜେନ୍ତି କସ୍ତ ପାଇତେରଇଲୁ, ସେନ୍ତାରି ଅଇଲାକେ ଆମକେ କାଇ ଲାବ୍ ମିଲଲା ? ଜଦି ମଲା ଲକ୍ତମନକେ ନ ଉଟାଏ, ତେବେ ଏନ୍ତାରି କଇବାଟା ନିକ ରଇସି । “ଆସା ଆମେ ବଜିକରି କାଉଁ, କାଇକେବଇଲେ ଆମେ କାଲିକେ ମର୍ବାର୍ ଅଇସିବେ ।”

୩୩ ନାଡ଼ାଇ ଉଆନାଇ, କାରାପ୍ ଲକ୍ତମନର୍ ସଙ୍ଗି, ସାଙ୍ଗି ଅଇଲେ ସେମନ୍ ତମର୍ ନିକ ଚଲାଚଲ୍ତି କର୍ବାଟା ନସାଇ ଦେବାଇ । ୩୪ ଚିକ୍ତସଙ୍ଗି ଚିନ୍ତା କରା । ତମର୍ ପାପର୍ ଚଲାଚଲ୍ତି କର୍ବାଟା ଚାଡ଼ିଦିଆସ୍ । କାଇକେବଇଲେ ପରମେସ୍ୱରକେ ନାଜାନ୍ଲା କେତେକ୍ ଲକ୍ତ ତମର୍ ବିତ୍ରେ ଆଚଡ଼ । ଏଟା ମୁଇ ତମକେ ଲାଜ୍ କରାଇବାକେ କଇଲିନି ।

ଆରିତରେକ୍ ଜିବନ୍ ଅଇବା ଗାଗଡ଼

୩୫ କେତେଲକ୍ ପାଚାର୍‌ବାଇ, “ମଲା ଲକ୍‌ମନ୍‌କେ କେ ଜିବନ୍ ଦେଇ ଉଟାଇସି ? ଆରି ସେମନ୍‌ର ଗାଗଡ଼ କେନ୍ତାର ରଇସି ?” ଜେ ଏନ୍ତାରି ପର୍‌ସନ୍ ପାଚାର୍‌ସି, ସେ ବକ୍‌ଆଟା । ୩୬ ତମେ ଜାନାସ୍ । ଜେତେବେଲେ ଗଟେକ୍ ମୁଞ୍ଜି ରପା ଅଇସି, ମୁଞ୍ଜିର୍ ଉପ୍‌ରର୍ ଚପା କୁଇଜାଇସି, ମାତର୍ ବିଡ଼୍‌ରର୍‌ଟା ଆଁକର୍‌ସି । ୩୭ ଜେତେବେଲେ ଗଟେକ୍ ମୁଞ୍ଜି ରପା ଅଇସି, ସେଟା ଦାନ୍ ଅ, କି ଆରି କାଇ ମୁଞ୍ଜି ଅ, ମୁଞ୍ଜିସେ ରପି ଅଇସି । ପଟେ ବଡ଼ିରଇବା ବୁଟା ନ ରପଡ଼ । ୩୮ ପର୍‌ମେସର୍ ନିଜର୍ ମନ୍ କଲା ଇସାବେ ମୁଞ୍ଜିତେଇଅନି ଆଁକ୍‌ରି ଗର୍ ଅ, ବଲି ଟିକ୍ କଲା । ଆରି ସେ ବିନ୍ ବିନ୍ ରକାମର୍ ମୁଞ୍ଜି ବଡ଼୍‌ବାକେ ଦେଲା, ଜେନ୍ତିକି ଗଟେକ୍ ଗଟେକ୍‌କେ ତାର୍ ଗାଗଡ଼ର୍ ରୁପ୍ ବାଦ୍‌ଲାଇସି ।

୩୯ ଜିବନ୍ ରଇବା ସବୁ ଗାଗଡ଼ ସମାନ୍ ନଏଁ । ଲକ୍‌ମନ୍‌କେ ଗଟେକ୍ ରକାମ୍ ଗାଗଡ଼, ପସୁ ଚଡ଼ଇ ଆରି ମାଟ୍‌ମନ୍‌କେ ବିନ୍ ବିନ୍ ରକାମ୍ ଗାଗଡ଼ ଆଟେ ।

୪୦ ସେନ୍ତିସେ ସର୍‌ଗେ ରଇବାଟାମନ୍ ଆରି ଦର୍‌ତନି ରଇବାଟାମନ୍ ଆଟଡ଼ । ଜେନ୍ତିକି ସର୍‌ଗେ ରଇବାଟାମନ୍‌ର୍ ସୁନ୍‌ର୍ ଗଟେକ୍ ରକାମ୍, ଦର୍‌ତନି ରଇବାଟାମନ୍‌ର୍ ବିନ୍ ବିନ୍ ରକାମ୍ । ୪୧ ବେଲ୍ ତାର୍ ନିଜର୍ ଇସାବେ ସୁନ୍‌ର୍ ଆଟେ । ସେନ୍ତାରିସେ ଜନ୍ ତାରାମନ୍ ମିସା ନିଜର୍ ନିଜର୍ ଇସାବେ ସୁନ୍‌ର୍ ଆଟଡ଼ ।

୪୨ ସେନ୍ତାରିସେ ଆମର୍ ଗାଗଡ଼ ଆରି ଜନ୍ ଗାଗଡ଼ ପର୍‌ମେସର୍ ଉଟାଇସି, ଦୁଇଟାଜାକ ବିନ୍ ଆଟେ । କାଇକେବଇଲେ ଆମର୍ ଗାଗଡ଼ ଏବେ ମରିକରି କୁଇଜାଇସି । ମାତର୍ ଜନ୍ ଗାଗଡ଼ ପର୍‌ମେସର୍ ଉଟାଇସି, ସେଟା କେବେ ନ ମରେ । ୪୩ ସେଟା ତପ୍‌ଲାବେଲେ ଦୁର୍‌ବଲ୍ ଅଇ ସୁନ୍‌ର୍ ନ ରଏ । ମାତର୍ ଉଟାଇଲାବେଲେ ସୁନ୍‌ର୍ ରଇକରି ଝାଟ୍ ରଇସି । ୪୪ ତପ୍‌ଲା ବେଲେ ଅବ୍‌କା ଗାଗଡ଼, ମାତର୍ ଉଟାଇଲାବେଲେ ଆଡ଼୍‌ମାର୍ ଗାଗଡ଼ ଅଇସି । ଅବ୍‌କା ଗାଗଡ଼ ଆଟେ ବଇଲେ ଆଡ଼୍‌ମାର୍ ଗାଗଡ଼ ମିସା ରଇବାର୍ ଆଟେ । ୪୫ ଜେନ୍ତାରିକି ଲେକା ଅଇଲାଆଟେ, ପର୍‌ତୁମ୍ ମୁନ୍‌ସ୍ ଜେ କି ଆଦମ୍, ତାକେ ତିଆର୍ କରି ଜିବନ୍ ଦେଇରଇଲା, ମାତର୍ ସାରାସାରିପଟର୍ ଆଦମ୍ ନ ସାର୍‌ବା ଜିବନ୍ ଦେବା ଆଡ଼୍‌ମା ଅଇଲା । ୪୬ ମାତର୍ ଆଡ଼୍‌ମାର୍ ଗାଗଡ଼ ପର୍‌ତୁମ୍ ନ ଆସେ । ତୁଟାଇ

ଗାଗଡ଼ ଆଇସି, ତାର୍ପଚେ ଆଡ଼ମାର୍ ଗାଗଡ଼ । ୪୭ ପରତୁମ୍ ଆଦମ୍ ମାଟିସଙ୍ଗ୍ ତିଆର୍ ଅଇ ଏ ଦର୍ତ୍ତନି ଆଇଲା । ମାତର୍ ପଚର୍ ଆଦମ୍ ସର୍ଗେ ଅନି ଆଇଲା । ୪୮ ଜନ୍ ଲକ୍ମନ୍ ଏ ଦର୍ତ୍ତନିର୍, ସେମନ୍ ଜେ କି ମାଟି ସଙ୍ଗ୍ ତିଆର୍ ଅଇରଇଲା, ତାର୍ପାରା । ଆରି ଜନ୍ ଲକ୍ ସର୍ଗର୍, ଜେ କି ସର୍ଗେ ଅନି ଆଇଲା, ତାର୍ପାରା । ୪୯ ଜେନ୍ତିକି ଆମେ ଜନ୍ଲକ୍ ମାଟିସଙ୍ଗ୍ ତିଆର୍ ଅଇରଇଲା, ତାର୍ ବାନିମୁରତି ଆରୁ, ସେନ୍ତାରିସେ ଜେ ସର୍ଗେଅନି ଆଇଲା ତାର୍ ପାରା ବାନିମୁରତି ଦାର୍ବୁ ।

୫୦ ଏ ବାଇବଇନିମନ୍, ମୁଇ କଇବା ଅରଡ଼ ଅଇଲାନି ବନି ମାଉଁସ୍ ରଇବା ଗାଗଡ଼ ପର୍ମେସରର୍ ରାଇଜେ ମିସିନାପାରଡ଼ । ଆରି ଜନ୍ ଗାଗଡ଼ ମର୍ବାଇ, ସେମନ୍କେ ନ ସାର୍ବା ଜିବନ୍ ଦେଇ ନଏ ।

୫୧ ☆ସୁନା, ମୁଇ ତମ୍କେ ଗଟେକ୍ ଆଗ୍ତୁ ନ ଜାନାଇରଇବା ବିସଇ କଇବି । ଆମେ ସବୁଲକ୍ ନ ମରୁ, ମାତର୍ ଆମର୍ ଗାଗଡ଼ ସବୁ ବାଦ୍ଲି ଜାଇସି । ୫୨ ଗଟେକ୍ ଲକ୍ ଆକି ମିଟ୍ଟା ମାର୍ଲା ବିଡ଼ରେ ସେଟା ଗଟ୍ସି । ସାରାସାରିର୍ ମଇରି ବାଜ୍ଲା ବେଲେ ମଲା ଲକ୍ମନ୍ ଜିବନ୍ ଅଇ ଉର୍ବାଇ । ସେମନ୍ ଆରି କେବେ ମିସା ନ ମରଡ଼ ଆରି ଆମେ ସବୁ ବାଦ୍ଲି ଜିରୁ । ୫୩ କାଇକେବଇଲେ ଆମର୍ ଏ ମର୍ବା ଗାଗଡ଼ ନ ମର୍ବା ଗାଗଡ଼ ଅଇ ବାଦ୍ଲିଜାଇସି । ୫୪ ସେଟା ଅଇଲାବେଲେ ଜନ୍ଟା କି ସାସତରେ ଲେକା ଅଇରଇଲା, ସେଟା ପୁରାପୁରୁନ୍ ଅଇସି ମରନ୍ ଆରିଜାଇକରି, ଜିଡ଼ବାଟା ପୁରାପୁରୁନ୍ ଅଇଲା ।

୫୫ ତେବେ ଆମେ କଇ ପାର୍ବୁ,
ଅଇରେ ମରନ୍ ! ତୁଇ କେନେ ଜିଡ଼ଲୁସ୍ ?
ଅଇରେ ମରନ୍ ! କେନେ ତର୍ ବପୁ ?

୫୬ ଆମର୍ ପାପେଅନି ଆମ୍କେ ବାଦ୍ବା ବପୁ ମରନ୍ ପାଇଲା ଆଚେ । ଆରି ପର୍ମେସରର୍ ନିୟମ୍ ନ ମାନିଲାତେଇଅନି ପାପ୍ ବପୁ ପାଇସି । ୫୭ ମାତର୍ ଆମେ ପର୍ମେସର୍କେ ଦନିଆବାଦ୍ ଦେଲୁନି । କାଇକେବଇଲେ ଆମର୍ ମାପୁରୁ ଜିସୁ କିରିସ୍ଟ କଲା କାମେଅନି ପାପ୍କେ ଆରି ମରନ୍କେ ଆରାଇବା ବପୁ ସେ ଆମ୍କେ ଦେଲାଆଚେ ।

☆ ୧୫:୫୧ ୧୫:୫୧ ଏମ ତେସଲନିକିୟ ୪:୧୫-୧୭

୫୮ ସେଗାର୍ପାଈ ଏ ମର ଆଲାଦର ବାଈବଇନିମନ୍, ଡାଁଟ୍ ଅଈକରି ରୁଆ । ମାପରୁ ଜିସୁକିରିସ୍ଟର୍ ସେବା କାମ୍ ଆବଡ୍ ଅଈକରି କରା । କାଈକେବଇଲେ ତମେ ଜାନାସ୍, ତାର୍ପାଈ ଜନ୍ କାମ୍ ସବୁ କରସା, ସେଟା ସବୁ ଲତାକେ ଆଈସି ।

୧୭

ସାଦୁ ଲକର ପାଈ ଦାନ୍

୧ *ଜିଉଦା ମଣ୍ଡୁଲିର୍ ବିସ୍ବାସିମନ୍କେ ତାରୁ ସାଈଜ କରବା ବିସଈ ମୁ ଲେକ୍ଲିନି । ମୁ ଗାଲାତିଅ ମଣ୍ଡୁଲିମନ୍କେ ଜାଈଟା କରବାକେ ଆଦେସ୍ ଦେଲିଆତି, ସେ ଆଦେସ୍ ଡାଁଟ୍ ସଈ କରବାର୍ଆଟେ ।
 ୨ ତମର କାମାଈବା ଈସାବେ, ସବୁ ବିସ୍ବାସିମନ୍, ବିସ୍ରାମ୍ ଦିନେ ମଣ୍ଡୁଲିତେଈ ରୁଣ୍ଡୁଲାବେଲେ ଅଲପ୍ ଅଲପ୍ ତାରୁ ଜମାଈବାର୍ ଆଟେ । ଜେଫ୍ରିକି ମୁଈ ଆଈଲାବେଲେ ଆରି ତାରୁ ତଲ୍ବାକେ ନ ଲାଗେ ।
 ୩ ମୁଈ ଆଈଲାବେଲେ ତମେ ବାତିରଈବା ଲକ୍ମନ୍କେ ଗଟେକ୍ ଚିଟି ଲେକିଦେବି ଆରି ସେମନ୍ ଜମାଈଲା ତାରୁ ଆରି ସେମନ୍କେ ଜାନାଈବା ଚିଟି ଦାରି, ଜିରୁସାଲାମ୍ ଜିବାଈ । ୪ ଜଦି ମର ଜିବାକେ ଦରକାର୍ ଅଈସି ବଈଲେ ସେମନ୍ ମରସଈ ଜାଈପାରଡ୍ ।

ପାଈଲର ଉପାଈ

୫ *ମାତର ମୁଈ ଏବେ ମାକିଦନିଆଈ ଗାଲିନି । ତେଈଅନି ଜାଈ ଆଈଲେ ତମର ଲାଗେ ଆଈବି । ୬ ମୁଈ ତେଈ ତମର ସଈ କେତେକ୍ ଦିନ୍ ରଈବି । ଅଈପାରେ ସିଡ୍ଦିନ୍ ସାରବା ଜାକ । ତାର୍ପଟେ ଜନ୍ତି ଜିବାକେ ମନ୍ କଲିନି, ତେଈ ଜିବାକେ ତମେ ମକେ ସାଈଜ କରପାରାସ୍ । ୭ କାଈକେବଈଲେ ଜିବାବେଲେ ବାଟେ ତମର ସଈ ବେଟ୍ ଅଈକରି ଚନେକ୍ସେ ରଈବାକେ ମର ମନ୍ ନାଈ । ମୁଈ ଆସା କଲିନି ମାପରୁ ମନ୍ କଲେ ମୁଈ ତମର ସଈ ଏତର ବେସି ଦିନ୍ ରଈବି ।

୮ *ମାତର ମୁଈ ପେନ୍ଟିକସ୍ଟ୍ ପରବ୍ ଜାକ ଏପିସିଏ ରଈବି, ୯ ଈତି ମର ବିରଦେ ବେସିଲକ୍ ରଈଲେ ମିସା, ସପଲ୍ ଅଈବା କାମ୍ କରବାକେ ମର ପାଈ ଦୁଆର୍ ଉଗାଡି ଅଈଆଟେ ।

☆ ୧୭:୧ ୧୭:୧ ରମିୟ ୧୫:୨୫,୨୬ ☆ ୧୭:୫ ୧୭:୫ ପେରିଡ୍ ୧୯:୨୧ ☆ ୧୭:୮ ୧୭:୮ ପେରିଡ୍ ୧୯:୮-୧୦

୧୦ ✨ଜଦି ତିମତି ତମରଟାନେ ଆଇଲେ, ତାକେ ଗତିଆ କରି ତାକିନିଆ । କାଇକେବଇଲେ ସେ ମିସା ମରପାରା ମାପୁରୁର୍ କାମ୍ କଲାନି । ୧୧ ସେଟାର୍ ପାଇ ତାକେ କେ ମିସା ସାନ୍ ପାରା ଦେକାନାଇ । ମାତର୍ ତାକେ ସାଇଜ କରା, ଜେକ୍ଟିକି, ସେ ତମର୍ ଜାଗାଇଅନି ଗାଲାବେଲେ, ସାନ୍ତିସଙ୍ଗ୍ ଜାଇପାରସି । ଆରି ସେ ମରଲଗେ ବାଅଡସି । ଇତିର୍ ବାଇବଇନିମନର୍ ସଙ୍ଗ୍ ମୁଇ ତାକେ ଜାଗଲିନି ।

୧୨ ବାଇ ଆପଲର୍ ବିସଇ ମୁଇ କଇଲିନି । ବିନ୍ ବିସବାସିମନର୍ ସଙ୍ଗ୍ ତମ୍‌କେ ବେଟ୍ ଅଇବାକେ ମୁଇ ତାକେ ବେସି ତର୍ ସାର୍‌ଦା କରାଇଲି, ମାତର୍ ସେ ଏବେ ଜିବାକେ ମୁଲ୍‌କେ ରାଜି ଅଏନାଇ । ପତେ ସୁଜଗ୍ ମିଲ୍‌ଲେ ସେ ତମରଟାନେ ଆଇସି ଆକା ।

ସାରାସାରିର୍ କାତା

୧୩ ତମେ ଜାଗରଡ୍ ରଇକରି ବିସବାସେ ଡାଁର୍ ରୁଆ । ବପୁ ଅଇକରି ସାଆସେ ରୁଆ । ୧୪ ତମେ କର୍‌ବା ସବୁ କାମ୍ ଆଲାଦେ ସାରାଇବାର୍ ଆତେ ।

୧୫ ✨ଏ ବାଇମନ୍, ତମେ ତିପାନ୍ ଆରି ତାର୍ କୁଟୁମ୍ ବିସଇ ଜାନାସ୍ । ସେମନ୍ ଆକାୟାର୍ ପରୁଟୁମ୍ ବିସବାସିମନ୍ ଆରି ପର୍‌ମେସରର୍ ଲକ୍‌ମନର୍ ସେବାଇ ନିଜେ ସର୍‌ପି ଅଇଲାଇ ଆତଡ୍ । ଏ ବାଇବଇନିମନ୍ ମୁଇ ତମ୍‌କେ ବାବୁଜିଆ କଲିନି, ୧୬ ଏନ୍ତାରି ଦାଇଡ୍ ନେବା ଲକ୍‌ମନର୍ ତଲିଆ ରୁଆ । ଆରି ସେମନର୍ ସଙ୍ଗ୍ ସେବା କର୍‌ବା ଲକ୍‌ମନର୍ ତଲିଆ ଉଆ ।

୧୭ ତିପାନା, ପରୁଟୁନାଡ୍ ଆରି ଆକାଇ ଇତି ଆଇଲାକେ ମୁଇ ବେସି ସାର୍‌ଦା ଅଇଲିନି । କାଇକେବଇଲେ ତମେ ନ ରଇଲେ ମିସା ସେମନ୍ ତମର୍ ଜାଗାଇ ରଇଲା ପାରା । ୧୮ ତମ୍‌କେ ଜେକ୍ଟି ସାର୍‌ଦା କରାଇଲାଇ, ମକେ ମିସା ସେକ୍ଟି ସାର୍‌ଦା କରାଇଲାଇ । ଏନ୍ତାରି ଲକ୍‌ମନ୍‌କେ ନାମ୍‌ବାର୍ ଆତେ ।

୧୯ ✨ଆସିଆ ଦେସର୍ ମଣ୍ଡଲିମନ୍ ତମ୍‌କେ ଜୁଆର୍ ଜାନାଇଲାଇନି । ଆକିଲା, ପିରିସ୍‌କିଲା ଆରି ସେମନର୍ ଗରେ ଉପାସନା

☆ ୧୭:୧୦ ୧୭:୧୦ ଏମ କରନ୍ତଃ ୪:୧୭

☆ ୧୭:୧୫ ୧୭:୧୫ ଏମ କରନ୍ତଃ ୧:୧୭

☆ ୧୭:୧୯ ୧୭:୧୯ ପେରିଡ୍ ୧୮:୨

କରତେରଇବା ମଣ୍ଡଳି ମାପୁରୁ ନାଉଁ ଦାରି ତମ୍ଭେ ତାକର୍
ମନ୍ ବିତ୍ତରେ ଅନି ଜୁଆର୍ ଜାନାଇଲାଇନି ।

୨୦ ଇତିର୍ ବାଇବଇନିମନ୍ ସବୁ ତମ୍ଭେ ଜୁଆର୍ ଜାନାଇଲାଇନି ।
ତମର୍ ତମର୍ ବିତ୍ତରେ ଆତେ ଦାରାଦାରି ଅଇ କିରିସ୍ତର୍ ଆଲାଦେ
ସାଲାମ୍ କରି ଜୁଆର୍ବେଟ୍ ଉଆ ।

୨୧ ମୁଇ ପାଉଲ୍, ଏଡକିସେ ଲେକି ଜୁଆର୍ ଜାନାଇଲିନି ।

୨୨ ଜିଦି କେ ମାପୁରୁକେ ଲାଡ୍ ନ କରେ, ସେ ଅବିସାପ୍ ପାଅ ।
ମାରାନାତା, ଆମର୍ ମାପୁରୁ ଆସ ।

୨୩ ମାପୁରୁ ଜିସୁର୍ ଜିବନ୍ ଦୁକାନି ତମର୍ଗାନେ ରଅ ।

୨୪ କିରିସ୍ତ ଜିସୁକିରିସ୍ତର୍ ସଙ୍ଗ୍ ମିସିରଇବା ସବୁକେ ମର୍
ଆଲାଦ୍ ରଅ ।

ସତ୍ତ୍ୱିୟ ବାବ୍
The New Testament in the Desiya language of India:
ସତ୍ତ୍ୱିୟ ବାବ୍ (Bible)

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

ସତ୍ତ୍ୱିୟ ବାବ୍
ଦ୍ୱିତୀୟା ନିୟମ, 2020

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde